

MALATUIHNYO GUNUANG TUJUAH SELASIH

rektorat
dayaan



DEPARTEMEN PENDIDIKAN DAN KEBUDAYAAN

8992244 SELM

PPS/Mn/1/86

Milik Depdikbud
Tidak diperdagangkan

MALATUIHNYO GUNUANG TUJUAH

Oleh
SELASIH



Departemen Pendidikan dan Kebudayaan
PROYEK PENERBITAN BUKU SASTRA
INDONESIA DAN DAERAH
Jakarta 1987

Diterbitkan oleh
Proyek Penerbitan Buku Sastra
Indonesia dan Daerah

Hak pengarang dilindungi undang-undang

BPUSTAKAAN KEBUDAYAAN	
DITJEN KEBUDAYAAN	
TGL TERIMA	17-01-00
TGL CATAT	17-01-00
NO. INDUK	955 / 00
NO. CLASS	819 . SEL . m .
KOPI KE	1

KATA PENGANTAR

Buku berjudul *Malatuihnyo Gunuang Tujuah* (meletusnya Gunung Tujuh) ini diolah oleh Selasih dari perbendaharaan Sastra Lisan Minangkabau Lama. Kisahnya terjadi pada masa silam sebelum agama Islam masuk ke daerah Minangkabau. Penduduk menganut kepercayaan akan kekuatan alam (langit dan bumi). Adat dipegang teguh, tidak boleh dilanggar. Akan terjadi bencana alam kalau seseorang melanggar adat tanpa dihukum. Sebaliknya alam akan marah, kalau orang yang tidak bersalah dihukum gara-gara fitnah. Hukum memegang peranan yang menentukan. Apapun menurut tenungan dukun orang akan mempercayainya tanpa berusaha untuk menyelidiki lebih lanjut.

Dalam kisah ini digambarkan akibat dari fitnah anak raja dan hasil tenung dukun yang tidak benar, kemenakan dan putra adik raja dijatuhi hukuman dibuang ke telaga dan ke hutan. Bagaimanapun juga akhirnya kejahatan dikalahkan oleh kebenaran. Orang yang tidak bersalah terhindar dari gempa akibat Gunung Tujuh meletus. Anak-anak raja beserta dukun yang telah berbuat jahat hancur ditelan bumi.

Buku ini diterbitkan oleh Proyek Penerbitan Buku Sastra Indonesia dan Daerah Departemen Pendidikan dan Kebudayaan Jakarta. Tak lain harapan dari Proyek, Buku ini dapat memberikan gambaran mengenai masyarakat Minangkabau di masa lampau.

Mudah-mudahan buku ini dapat dimanfaatkan oleh para pencinta sastra Minangkabau.

Jakarta, 1986
Proyek Penerbitan Buku Sastra
Indonesia dan Daerah Departemen
Pendidikan dan Kebudayaan.

DAFTAR ISI

Ringkasan Cerita	7
Kato Panganta	11
1. Nagari Koto Tujuah	15
2. Mancari Jodoh Kambang Aruih	27
3. Sutan Rumah Panjang Sakik	36
4. Galanggang Puti Kambang Aruih	77
5. Kambang Aruih Kanai Pitanah	108
6. Hukum Putuih	122
7. Sapakan Sabalun Mati	152
8. Hari Taakia Dek Si Kambang	165
9. Penutuik	179

RINGKASAN CERITA

Pada masa dahulu di Kota Tujuah (kira-kira di Maninjau sekarang) memerintah seorang raja bernama Datuak Tumangguang Sati. Dia beristri 5 orang. Anaknya berjumlah 16 orang, 13 laki-laki dan 3 perempuan. Dengan istrinya yang bernama Puti Ambun Pagi, Ibu Suri di Kota Tujuah, ia mempunyai 9 anak laki-laki dan seorang anak perempuan. Kesembilan putranya itu mempunyai watak yang kasar. Ibu bapaknya tidak berdaya menghadapi kekasaran putranya itu.

Datuak Tumangguang Sati pun sebagai seorang raja juga bertindak dan memerintah menurut kemauannya saja. Segala putusan dia yang mengambil, tanpa mendengarkan pendapat orang. Datuak Tumangguang mempunyai dua saudara, seorang laki-laki bernama Sutan Rumah Panjang dan seorang perempuan bernama Puti Kasumbo Ampai.

Sutan Rumah Panjang mempunyai dua orang anak, yang laki-laki bernama Sutan Mambang Langik dan yang perempuan Hindun Sari. Puti Kasumbo Ampai mempunyai dua orang anak, yang laki-laki bernama Sutan Lelo Marajo yang menjadi tongkat yang akan menggantikan raja kelak, yang perempuan bernama Kambang Aruih. Kambang Aruih berkasih-kasihan dengan anak mamaknya yang bernama Mambang Langik, sedangkan Sutan Lelo Marajo berkasih-kasihan dengan anak mamaknya yang bernama Hindun Sari, adik Mambang Langik. Pada suatu hari diadakan rapat oleh raja, adik dan kemenakannya serta penghulu-penghulu yang banyak. Rapat membicarakan mengenai jodoh untuk Kambang Aruih.

Sutan Rumah Panjang, adik raja mengutarakan bahwa kedua kemenakannya, Sutan Lelo Marajo dan Kambang Aruih telah saling berkasihan dengan kedua anaknya yaitu Hindun Sari dan Mambang Langik. Raja tidak menyetujui itu karena ia mengharapkan kedua kemenakannya itu akan dikawinkannya dengan anaknya.

Untuk menghindari perselisihan rapat memutuskan untuk mengadakan gelanggang. Dalam gelanggang itu nanti Kambang Aruih akan memilih sendiri calon suaminya.

Sutan Membang Langik tidak boleh jadi peserta dalam gelanggang itu, sebab ia termasuk panitia penyelenggara.

Sementara itu Sutan Rumah Panjang ayah Mambang Langik sudah berjanji dengan temannya Datuak Tongga, raja di Palimbayan untuk mengawini Kambang Aruih untuk setahun saja. Sesudah setahun akan diceraikannya dan Mambang Langik akan mengawini Kambang Aruih. Dalam gelanggang nanti Kambang Aruih akan memilih Datuak Tongga sebagai calon suaminya, Kambang Aruih dapat menyetujui siasat mamaknya itu.

Dalam gelanggang memang Datuak Tongga yang dipilih oleh Kambang Aruih, meskipun banyak anak raja yang lebih kaya dan tampan. Kesembilan anak raja tidak senang akan keputusan Kambang Aruih itu, karena mereka juga menginginkannya. Karena maksudnya tidak tercapai, kesembilan anak raja kemudian melancarkan fitnah menuduh Kambang Aruih telah berbuat serong dengan Mambang Langik dan Datuak Tongga. Tuduhan itu diperbuat oleh seorang dukun yang mengutuk Kambang Aruih sedang hamil menurut tenungannya. Rapat memutuskan Sutan Mambang Langik dibuang seumur hidup ke hutan balantara sedangkan Kambang Aruih harus terjun ke telaga yang ada di puncak Gunung Tujuah dan dihuni oleh Ular Gerang dan Buaya Putih.

Sutan Mambang Langik dihukum beberapa hari lebih dahulu dari Kambang Aruih.

Kambang Aruih sebelum dihukum menceritakan mimpiinya bahwa Gunung Tujuah akan meletus menghancurkan negeri dan penduduknya, tetapi orang yang tidak bersalah tetap hidup yang memfitnah akan binasa. Pada hari yang telah ditetapkan Kambang Aruih diantarkan keluarganya beserta orang banyak ke puncak Gunung Tujuah. Sesudah sampai di puncak Kambang melompat ke telaga diikuti oleh Mambang Langik yang tidak diketahui orang dari mana datangnya.

Setelah lama menunggu dan kedua orang itu tidak muncul lagi ke permukaan air, kembalilah pengantarnya pulang. Baik orang tua Mambang Langik maupun Kambang Aruih sesudah kejadian itu, meninggalkan kampungnya merantau ke tempat lain karena sedih ditinggalkan anak.

Seminggu sesudah mereka berangkat terjadilah gempa besar menghancurkan negeri Kota Tujuah. Semua putra raja meninggal termasuk dukun yang berkata bohong itu. Sutan Mambang Langik berjumpa kembali dengan orang tuanya dan mereka akan dikawinkan oleh orang tuanya.

KATO PANGANTA

Siap kaba sabuah lai
Kaba rang lamo rang saisuak
Mungkin labiah itu garan
Iyo sapuluah abad nan lalu
Sabab tasabuik dalam kaba
Maso itu iyo Gunuang Tujuah
Ado juo tagak baru
Alun lai jatuah kasadonyo
Danau Maninjau ketek baru
Nagari Maninjau alun ado
Nan ado di tampek tu garan
Iyo nagari banamo Koto Tujuah
Islam lamo lai kan masuak
Urang manyambah langik jo bumi
Caro manyambahnya iyo garan
Hampia samo jo Islam.

Carito iko iyo mangabakan
Baapo karehnyo rang saisuak
Mamacik adaik jo limbago
Bia anak mati dibunuah
Asa adaik ndak tapijak
"Kumpul kebo" kato rang kini
Dibiakan sajo dek rang banyak
Indak tampak manghangek mandingin
Pado maso dahulu garan
Itu banamo marompak pantang
Hukum mati im'balannya
Mungkin gadang urang nan basalah
Mungkin barek hukumannyo.

Sabuah lai nan dikabakan
Barapo buruak akibaik nyo garan
Iyo duto, pitanah, sumpah palasu
Sahingga gunuang sampai berang
Doso iko ndak ado bukti
Bukti nan dapek diliek tarang
Indak dapek mah dihukum
Nan bungkuak dimakan saruang
Nan bana lai mah tagak luruih.

Tasabuik juo dalam kaba
Padusi haruuh balaki
Laki-laki haruuh babini
Indak usaho rang baduo
Iyo mancari kan judohnyo
Indak usaho ayah jo andehnyo
Tapi usaho miniak mamak
Sarato urang nan sakampuang
Bia buto bia tengkak
Bia sumbiang atau langiah
Kok tibo baban dikuduak
Indak buliah mah mailakkan
Nan dapek diilakkan dek padusi
Iyo parampok jo panyamun
Panciluik bagadang-gadang
Tapi urang ko jarang ado
Sabab aturan adaik kareh bana
Hukuman iyo kareh juo
Mungkin sanagari dubalang kalua
Bapuluah urang mah banyakkyo
Iyo manangkok parampok duo tigo.

Nan ditakuik maso itu
Iyo Rajo dalam nagari
Iyo sumpah jo kutuak bumi
Sarato sumpah kutuak rajo
Anak rajo jo kamanakkanno
Dianggap urang nan batuah juo
Indak barani rang manyapo
Bia urangko iyo basalah

Itu mah nan mangacau nagari
Dalam kaba nan iko ko.

Ado juo mah nan buruak
Urang picayo pada dukun
Picayo bulek-bulek
Indak ado nan barani
Manantang panglihatan dukun
Dalam carito iko garan
Kato dukun iyo nan palasunyo
Tapaso dijadikan bukti
Indak nan dapek manyanggahnyo
Dukun tu iyo dihukum juo.

Pekanbaru, 1 Desember 1985

(SELASIH)

1. NAGARI KOTO TUJUAH.

Kaba nan iko iyo sanak
Lah lamo bana tajadinyo
Nagaritu lah lamo hilang
Tampek tajadi caritoko
Kok kito pai ka sinan kini
Kito sampai di Maninjau
Ditapi danau Maninjau
Danau barasa dari gunuang
Iyo gunuang Bagombak
Bagombak bapuncak tujuah
Saparintah Datuak Tumangguang Sati
Nagari tu agak kacau garan
Bukan toh kacau dek parampok
Atau panyamun urang jahek
Kacau nyo iyo itu garan
Dek urang banyak nan pandai
Pandainyo ndak dapek tampek baguru
Nan dinyo sajo nyo kamukokan
Nan di urang iyo tu kawan
Indak amuah inyo mandangkan
Urang barajo dihatinyo
Iyo basutan di matonyo.

Tasabuik Datuak Tumangguang Sati
Bukan urang lamah pulo
Nan namuah manyarah sajo
Pado urang surang baduo
Inyo ado kan rapek acok-acok
Acok baulang tigo'ampek kali



Kok alun ado kato sapakaik
Inyo maambiak gantiang putuih
Indak dapek diurak lai
Dek itu banyak rang nan berang
Iyo urang nan tak satuju
Nan di Rajo inyo iyokan
Nan dinyo inyo lakukan
Banyak bengkok nan indak diluruihkan
Banyak sandiang nan indak didatakan
Sadonyo tahu jo adaik
Bia anak mati garan
Asa adaik jan nyo rusak.

Tasabuik Datuak Tumangguang Sati
Anaknyo iyo banyak bana
Ado sambilan laki-laki
Saurang pulo mah padusi
Ito jo Puti Ambun Pagi
Andeh Suri di Koto Tujuah
Jo Puti lain ado pulo
Iyo indak urang-Koto Tujuah
Di Bayua iyo baduo
Di Lubuak Basuang baduo pulo
Di Sungai Batang ado surang
Anam baleh kasadonyo
Tigo baleh laki-laki garan
Nan batigo iyo padusi

Kasadonyo anaknyo tu garan
Kareh kasa bawaannyo
Kacuali anak Andeh Suri
Nan banamo *Puti Reno Intan*
Nan talabiah nan tuonyo
Nan banamo *Sutan nan Gadang*
Keduo *Sutan Ampiang Basi*
Katigo *Sutan Hantam Tanah*
Kaampek *Sutan Gudam Palu*
Kalimo *Sutan Tampiak Habih*
Kaanam *Bujang Kareh Hati*

Katujuah *Bujang Kareh Insang*
Kasalapan *Bujang Kareh Hiduang*
Kasambilan *Bujang Kareh Karak*
Kasadonyo kareh niak dapek ditakiak
Antah mah itu lah namonyo
Atou dikarang urang sajo
Dek parangainyo caro itu
Indak lah tahu kito garan
Ayahnyo iyo makan hati
Indak tahu apo nan kanyo buek
Iyo jo anak sambilan tu
Andehnyo iyo agak lamah
Lamah badan lamah hati
Sasuai garan jo namonyo
Iyolah Puti Ambun Pagi
Nan diparambiak Datuak Tumanguang

Dari inyo iko garan
Wakatu kan kawin dahulunyo
Iyolah dek rancaknya sajo
Sarato lamah lambuik bawaannya
Kok tasuo nan indak nyo sukoi
Indaknya berang indak maradang
Inyo mananghi ndak basuaro.

Kini manjadi Andeh Suri
Indak nyo tahu indak nyo pandai
Maatua manyusun karajonyo
Iyo sabagai urang nan dituokan
Kapai tampek batanya
Kapulang katampek babarito
Dek inyo iyo rancak bana
Manyarah habih bakeh rajo
Harinyo habih ateh katia
Iyo katia di anjuang kaamasan
Diulik Rajo siang malam
Karajo nyo iyo ndak nan lain
Baranak ciek satahun dangai
Nan tuo manyusu baru

Nan tangah alah lahia pulo
Baitu sajo sataruihnyo
Indak ado umpang ampiangnyo
Sampai kini sapuluah urang.

Kini lah gadang paja-paja ko
Inyo iyo indak manyusukan lai
Tapi nyo paniang tiok hari
Dek parangai anak-anaknyo ko
Ado pulo nan tabedo
Inyo samo inyo garan
Indak amuah pulo turuik manuruik
Sambanyo sajo lâi balain
Baitu kain bajunyo
Payah inang jo pangasuh
Baitu pulo dayang-dayang
Banyak nan mintak pulang sajo
Bamacam-macam alasannya
Panggantinyo payah dicari
Dipaso urang tambah lari
Diagiah pitih banyak-banyak
Sarato pakaian kain baju
Indak urang mangharokkan itu.

Acok bana itu garan
Andeh Suri turun ka dapua
Ditolong anaknyo nan padusi
Nan banamo Puti Reno Intan
Paja ko iyo elok bana
Muko rancak, bantuaknyo elok
Hati parangai elok pulo
Inyo sayang ka Andeh nyo
Dek itu tapaso bakarajo
Iyo dari umua salapan.

Tasabuik *Mandeh Rubiah*
Mandeh Rubiah Reno Kayo
Urang gadang urang babangso
Anak dek mamak Datuak Tumangguang

Lai mah urang baiak-baiak
Banyak pandai banyak tahununyo
Tapi sabuah itu kini
Inyo jarang ka Ustano
Inyo camburu ka Ambun Pag
Dek Datuak Tumangguang garan
Tunangannya dari ketek
Tapi inyo kawin dahulu
Dikawinkan dek Andehnyo
Dek inyo satahun labiah tuo
Dari Tuangku Datuak Tumangguang.

Suaminyo iyo Manti Tuo
Manti tuo dalam nagari
Baliau ko iyo lakeh mati
Maninggakan anak surang sajo
Nan banamo *Sutan Sari Alam*
Katiko inyo jadi jando
Iyo urang Mandeh Rubiah
Inyo mamintak pulo kini
Iyo kawin jo Tuak Tumangguang
Rajo ko iyo lai amuah
Dek sayangnya iyo ado juo
Tapi indak buliah manuruik adaik
Sabab Manti nan mati tu
Kakaknya dusanak ibu
Niniak mamak di Koto Tujuah
Urangko iyo mah sasuku
Indak buliah ambiak maambiak
Buliah juo manyiliahan lapiak
Tapi haruuh dalam sapakan
Dalam pakan wakatu kamatian
Indak ado nan mangana
Dek urang nan tuo-tuo
Rusuah risau kamatian.

Sabagai pulo itu kawan
Iyo Mandeh Rubiah ko
Sasuku pulo inyo garan

Jo bini Datuak Tumangguang
Iyo bininyo nan kaduo
Kito mah lah samo tahu juo
Dek urang sapasukuan
Indak buliah nyo dimadukan.

Dek kawin indak mah buliah
Alun satahun kakaknyo mati
Urangko marampak pantang
Datuak Tumangguang Mandeh Rubiah
Acok basamo itu garan
Di rumah Mandeh Rubiah
Indak nyo datang malam sajo
Tapi jo siang hari
Indak inyo manyuruak-nyuruak
Indak basuluah batang pisang
Tapi basuluah matohari
Alasannya iyo macam-macam
Indak ditarimo dek rajaik
Mandapek kutuak nyo jadinyo
Indak urang babisiaik-bisiaik
Tapi mangecek taruih tarang
Sindia manyindia dalam alek
Urang tuladan di nagari
Mambuek conto nan ndak elok
Hebohlah Pakan dibueknyo
Urang bairiang ka sawah ka ladang
Itu juo nan disabuik.

Anak rajo lah gadang-gadang
Kamanakkannya baitu pulo
Panyakik ko iyo manurun
Kapado urang mudo-mudo ko
Kamanakan rajo Sutan Lelo Mangarajo
Nan kan manggantikan rajo isuak
Io maraso malu gadang
Maraso nagari alah tatindiah
Kecek lah sampai mah kalua
Alah tadanga dek rang Bayua

Baitu urang Sungai Batang
Mungkin jauah lai dari itu.

Pado katiko iyo nan baiak
Mamintak inyo itu agran
Pado mamaknya nan surang lai
Nan bagala *Sutan Rumah Panjang*
Nan babini di Koto Diateh
Untuak manyapo Mak Rajo nyo
Iyo Datuak Tumangguang Sati.

”Mamak ambo iyo Mak Panjang
Baapo kini ko garan
Mangapo mamak antok sajo
Lah teleng tampak nagari
Kok langik runtuah, bumi taban
Tangganam kito kasadonyo.”

”Mano Nak Buyuang Sutan Lelo
Dek Mamak iyo mah taraso
Tapi baapo kato kito
Siapo nan kan mambukak kato
Ambo ko iyo adiak dek Kak Rajo
Baitu pulo Andeh Buyuang
Nan tuo-tuo indak hiduik lai.”

”Mamintak ambo bakeh Mamak
Baduo Mamak jo Andeh
Pai mangecek ka Ustano
Pai baiyo jo batido
Iyo jo urang Mak Rajo ko
Kito cubo iyo jo lamah
Kok itu indak doh bahasia
Baru kito batindak kareh.”

”Kok baitu kan baiaknya
Ambo cubo malah pai
Ambo baok Andeh Buyuang
Iyo si *Puti Kasumbo Ampai.*”

Lah pai urang nan baduo

Pai manjalang kakak kanduangnyo
Nan banamo *Datuak Tumangguang Sati*
Tuangku Rajo nagari Koto Tujuah
Dibukak kato dek Sutan Rumah Panjang.

”Ampunlah kami Kakak Rajo
Kami ko iyo nak mangecek
Kato buruak nak disambahkan
Sabatuanyo bukan baban kami
Bukan barek nan kami junjuang
Iyo baban nan tuo-tuo
Tapi rang tuo-tuo kito
Habih dahulu kasadonyo
Indak ado nan sadarah jo Kakak
Salain kami baduo ko
Tuah Kakak iyo tuah kami
Hino Kakak iyo hino kami
Kok Kakak iyo kanai cubik
Sakiknyo taraso mah dek kami
Dek itu nak kami sabuik kini
Nan takalang iyo di mato
Nan tasakek di rangkuangan
Dilulua indak mah tatalan
Mungkin Kakak tahu juo
Apo garan nan kan kami sabuik.”

Tahanok sajo Datuak Tumangguang
Tunduak tangadah inyo garan
Alah manangih mah adiaknyo
Nan banamo Kasumbo Ampai
Baru inyo mambukak kecek.

”Mano kalian keduonyo
Kok jaleh Kakak ko salah
Indak baapo tu Diak Kanduang
Kalian managua Kakak nangko
Kan ganti Ayah jo Andeh kito
Tapi Kakak indak tahu
Di mano garan salah Kakak
Nagari lai aman sajo

Indak ado urang babunuahan
Parampok panyamun indak ado pulo
Padi jo jaguang iyo manjadi
Indak ado urang kalaparan
Batang kayu manggih durian
Lansek rambai babuah labek
Karambia indak habih dek kito
Buliah dijua ka Lawang ka Cubadak
Sampai ka Matua ka Ujuang Pandan.”

”Kok itu nan Kakak sabuik
Lah samo tahu kito Kakak
Tapi salain dari itu garan
Ado mah juo itu mah Kakak
Nan jadi sabutan urang banyak
Iyo tantang jangga jo sumbang
Nan tajadi di nagari ko
Jangga dipandang urang banyak
Sumbang di adaik jo limbag
Kok kurang paham Kakak garan
Ambo bukak kulik tampak isi
Tantang panyakik nan ciek ko
Indak kan ado urang nan barani
Iyo manyabuik pada Kakak
Salain kami baduo ko
Nan taraso dek rang banyak
Iyo karajo Kakak kanduang
Sarato Kakak Reno Kayo
Urang nan tuo di nagari
Ka pai tampek rang batanyo
Kok pulang tampek babarito
Nan kan mamimpin urang laweh
Talabiah gadih jo rando
Kakak baok babuek salah
Baapo janyo itu Kakak
Kan mancari urang lain.”

”Kok itu nan kalian sabuik
Indak doh itu salah gadang

Ambo rajo dalam nagari
Buliah babini duo tigo
Ampek limo sampai sapuluah
Indak salah itu garan
Pangulu buliah barampek
Pandeka buliah batigo
Dubalang jo sudaga kayo
Iyo buliah mah baduo sajo
Urang ka sawah urang karajo barek
Iyo babini surang sajo.”

”Kok kakak kawin jo inyo
Iyo kawin manuruik adaik
Indak doh marompak pantang
Indak ado urang kan berang
Indak kutuak tibo di Kakak
Tapi nan iko iyo kini
Kakak indak buliah kawin jo inyo
Kakak datangi dilua kawin
Lah tahu urang kasadonyo.”

”Ambo ibo padu si Reno
Inyo nan baru mudo mantah
Ditinggakan dek Tuan Manti Tuo
Anaknyo iyo ketek baru
Jo siapo inyo kan barundiang
Dari mano inyo dapek balanjo
Urang kampuang nan kabanyakan
Indak amuah kawin jo inyo
Urang ko takuik katulahan
Dek inyo jando turunan rajo.”

”Tantang urang nan kan amuah kawin
Kito cari malah Kakak
Iyo kalua Koto Tujuah ko
Tantang balanjonyo jo anaknyo
Suruah ambo maantakannya
Atau si Upiak Kasumbo Ampai
Kakak ambiak pitih nagari

Indak doh salah itu Kakak
Manjalang inyo dapek suami
Dek inyo jando kakak kito
Urang nan sato mamarintah.

Sabagai pulo itu Kakak
Kok karajo ko Kakak taruihkan
Kutuaknyo indak dari langik sajo
Sarato bumi nan batuah
Rakyaik sato mangutuak pulo
Sarato bini-bini Kakak
Sajak Kakak suko ka rumah
Iyo ka rumah Kakak Reno
Nan lain indak Kakak acuahkan
Sampai-sampai Kak Ambun Pag
Handak lari nyo ka Lawang.”

”Sabuah lai nak ambo sabuik
Anak kito lah gadang-gadang
Lah ado tampak nak maniru
Si Upiak si Kambang Aruih
Surang itu kamanakan kakak
Acok digaduah paja-paja tu
Anak kakak nan sambilan
Barabuik urangko manandanginyo
Inyo alun buliah dipingik
Dek alun baumua duo baleh.”
Kato Puti Kasumbo Ampai.

”Kok baitu kato kalian
Baranti malah ambo nyo lai
Iyo ka rumah Reno Kayo
Tapi mamintak kakak ka kalian
Usah inyo dicarikan laki
Usah pulo ang Buyuang Sutan Panjang
Mangawini si Reno ko
Sayang kakak alun lai habih
Kok Kakak indak rajo lai
Kakak caraikan mah adiaknyo
Buliah kakak kawin jo inyo.”

Tagalak Sutan Rumah Panjang
"Manolah Kakak kanduang Buyuang
Usah camburu bakeh ambo
Kak Reno jauah labiah tuo
Nan gadih nan rancak-rancak
Banyak lai itu garan
Nan kan amuah padō ambo
Cuman ambo nan indak amuah
Cukuik surang itu bini ambo
Anak lah gadang-gadang pulo
Elok minantu nan dicari."

Tadiam Tuangku Koto Tujuah
Taraso inyo kanai sindia
Bininyo iyo mah balimo
Dek anak anam baleh urang
Inyo ndak pulo kayo rayo
Pitih nagari ndak banyak pulo.

2. Mancari jodoh Kambang Aruih.

Tasabuik Bujang nan Sambilan
Anak laki-laki Datuak Tumangguang
Iyo jo Puti Ambun Pagi
Nan ampek lah buliah barumah tanggo
Nan limo bujang tangguang baru
Tapi sadonyo acok datang
Iyo ka rumah Kambang Aruih
Pai manjujuik paja nangko
Katiko si Kambang alah dipingik
Inyo iyo badatangan juo
Dilarang indak doh talarang.

Dek si Kambang alah mah gadang
Barapek urang sanagari
Siapo patuik ditarimo garan
Untuk samando Rumah Gadang
Urang nan patuik ditarimo
Bukan sutan sambarang sutan
Dicaliak asa usuanyo dangai
Dipareso katurunannyo pulo
Adokah urang baiak-baiak
Urang tasangko di alam ko
Dek mamak si Kambang Aruih
Datuak Tumangguang nan Sati ko
Katurunan Basa nan Barapek
Ayahnyo Datuak Maruhun
Iyo urang nan Ampek juo
Neneknyo si Kambang Manih
Dari Ustano Pagaruyuang

Simpang balahan dari rajo
Dek rupo si Kambang Aruih
Sapadan jo katurunannya
Sariklah rajo kan jodohnyo
Payahlah Puti kan tandiangnya
Pajako iyo masak pangaja
Andehnyo dek baitu pulo
Kasumbo Ampai tasabuik baiak
Iyo di nagari Koto Tujuah ko
Dari rumah Gadang nan lain-lain
Tapi namonyo inyo jago
Baitu pulo mah anaknya.

Babaliak kito ka nan cako
Iyo adonyo rapek gadang
Rapek gadang di Koto Tujuah
Rapek rajo jo Niniak Mamak
Manti, Pangulu saandiko
Disatokan pulo Ibu Bapo
Dek rapek bukan tantang nagari
Tapi tantang mancari rang sumondo
Anak dek urang Ibu Bapako
Manuruik nan biaso juo
Ibu Bapak hanyo iyo mandanga
Jarang diajak mamutuihkan
Baitu Bapak si Kambang Aruih
Makan hati dalam rapek ko
Nasib anak awak dikunyah-kunyah
Awak indak buliah sato mangecek.

Tuangku Rajo Datuak Tumangguang
Mamintak iyo kini garan
Anaknya sajo nan dipilih
Kan manjadi suami si Kambang
Tapi Sutan Marajo Lelo garan
Bia inyo alun babini
Lah buliah sato nyo mangecek
Dek inyo itu iyo garan
Alah satahun jadi Tungkek

Dek mamaknyo Sutan Rumah Panjang
Ndak amuah manarimo karajo ko.

”Ampun ambo Tuangku Rajo
Dangakan juo sambah ambo
Anak mamak nan sambilan ko
Alah basumpah itu garan
Nak kawin jo adiak ambo
Kok indak dapek inyo kawin
Bia sadonyo indak mandapek
Iko lah acok inyo sabuik
Iyo tahadok Kambang Aruih
Nan tampak dek ambo garan
Urang nan patuik kan diambiak
Iyolah Sutan Mambang Langik
Anak Mak Sutan Rumah Panjang
Urang nan elok lua dalam
Pandai garan inyo isuak
Iyo mangasuh mangaja anaknyo
Amak manjadi urang patuik
Patuik manjadi pangganti mamak
Kok mamak alah tuo isuak.”

Bakato pulo Manti Tuo
”Ampun lah ambo Tuangku Rajo
Ambo sabalah bakeh Sutan Lelo
Inyo anak Tuangku juo
Dek Tuangku Sutan Rumah Panjang
Indak doh urang lain garan
Patuik inyo manjadi Tungkek
Sabagai pulo tu Tuangku
Ambo mandanga kaba angin
Paja-paja ko basuka-an
Lah tampak garan dari jauah
Alah tajalin kasiah sayang.”

”Mano mah Buyuang Sutan Lelo
Sarato kakak Manti Tuo
Dangakan malah kato denai

Mangapo kito putuihkan sajo
Anak denai indak mah buliah
Iyo kawin jo si Kambang Aruih
Kok ndak buliah jo nan sambilan
Ado mah inyo tigo lai
Itan di Bayua Sungai Batang
Nan surang lai di Lubuak Basuang.”

”Ampun lah ambo Mamak Rajo
Dangakan pulo nan diambo
Mangapo kito maliek kaken
Iyo ka Adiak nan batigo
Inyo iyo ketek-ketek baru
Labiah mudo dari si Kambang
Sabagai pulo itu Mak Rajo
Urang nyo jauah dari siko
Indaklah kito tahu bana
Baapo budi parangainyo.”

”Manolah rapek sa andiko
Adiak denai Sutan Rumah Panjang
Kamanakan denai Sutan Marajo Lelo
Sarato Kakak Manti Tuo
Manti Pangulu Ibu Bapo
Lah tigo hari kito rapek
Indak doh bakasudahan garan
Pisau rajo nan kan mamutuihkan
Kito maeto kain saruang
Pabilo biang kan tabuak
Pabilo gantiang kan putuih
Dangakan bana elok-elok
Denai putuihkan, denai patahkan
Denai tutua denai papakan
Tantang si Upiak Kambang Aruih
Indak buliah jo anak denai
Indak juo jo anak Sutan Panjang
Kito mancari ka nan lain.”

”Ampun lah ambo Mamak kanduang

Manukek ambo tantang itu
Adiak ambo saikua Nuri kasayangan
Nan dimanjokan salamo ko
Ditatiang bak minyak panuah
Indak satuju ambo garan
Inyo kan kito paso isuak
Kawin jo urang nan ndak di hatinyo
Antah tuo antah mah kasa
Kito tantu io mencari garan
Urang gadang urang tenggi
Tenggi, gadang dalam kadudukan.”

Kok itu nan Buyuang sabuik
Alah biaso tu Nak Kanduang
‘Dari dahulu sampai kini
Anak gaduh buliah mamiliah
Salain dalam galanggang
Hari patamo lah kito putuihkan
Kito indak mancang galanggang
Dek pitih kito indak banyak
Galanggang iyo manghabihkan
Rayaik kito bangsaik-bangsaik
Ka mano kito kan batenggang
Kok nyampang kito kakurangan.”

Bakato kini surang Pangulu tuo
“Ampunlah hambo padu Tuangku
Nak sato ambo mengecek
Manyabuik nan buruak jo nan baiak
Tantang si Upiak puti kito
Nan banamo si Kambang Aruih
Bungo kambang dalam nagari
Kasayangan kami rayaik ko
Indak doh amuah kami garan
Inyo tapaso itu nanti
Mandapek urang nan katuju
Katuju dek kito sajo
Saribu sambah hambo sambahkan
Dari rayaik nan banyak ko

Tuangku ubah kaputusan
Babaliak kito ka pangka
Suaro kami sasuduik ko
Iyo mintak diadokan garan
Iyo pancang galanggang juo
Kito mintak malah bakeh inyo
Usah mamiliah Mambang Langik
Tantang pitih untuak baralek
Jiko lai samo amuah
Jo hati gadang baralek ko
Indak kayu janjang dikapiang
Indak ameh bungka diasah
Kami kalangkan badan kami
Iyo untuak mancari pitih.”

Manyambah kini Datuak Bandaro
”Ampunlah hambo padu Tuangku
Hambo sabalah bakeh rang ujuang cako
Galanggang alek rayaik garan
Tangguangan Pangulu nan banyak ko
Karajo iyo ditulang kami
Pitih di dalam kapuak padi
Asa hati samo kasinan
Indak kan sarik itu isuak
Sabuah lai ambo mintak
Sakali mambukak puro
Duo tigo hutang tabayia
Sakali marangkauh dayuang
Duo tigo pulau talampau
Puti kito ado mah batigo
Dalam Koto Tujuah nangko
Patamo Upiak Kambang Aruih
Kamannakan kontan dek Tuangku
Puti sambahan Koto Tujuah
Kaduo Upiak Reno Intan
Anak kanduang dek Tuangku
Bia inyo indak urang sikd
Anak kanduang Andeh Suri
Inyo lahia di nagari ko

Kito iko iyo garan
Manjadi niniak mamaknyo
Katigo Puti Hindun Suri
Anak Tuangku Sutan Rumah Panjang
Baun kunik baun sarai
Pajako jo Ustano ko
Mandehnyo babako ka Ustano ko
Anak Datuak Tumangguang Tuo
Anduangnyo iyo anak rang Koto Tangah
Lah patuik inyo disatokan.”

Manyambah kini Sutan Rumah Panjang
“Ampunlah ambo pado kak Rajo
Dangakan pulo sambah ambo
Ambo satuju jo Mak Bandaro
Kito mancang galanggang garan
Mancari jodoh paja-paja tu
Tapi sabuah pintak ambo
Tantang si Upiak Hindun Suri
Usah inyo dimasuakkan pulo
Gadih nan kito carikan jodoh
Mangko baitu kato ambo
Ado tasamek dalam hati
Kalua alun disampaikan
Handak maambiak kamanakan kito
Iyolah Sutan Majo Lelo ko
Untuak si Upiak Hindun Suri
Kasumbo Ampai iyo suko bana
Ayah si Buyuang amuah pulo.”

Agak tasunguik Rajo Tumangguang
Lah sirah tampak mukonyo
“Manolah Buyung Sutan Panjang
Pandai bana ang kironyo
Maraiah kasiku adiak denai
Denai dilinteh dilangkahi
Sabao denai jadi rajo
Kalian mambuek aturan surang
Nyampang denai ndak hiduik lai

Indak baapo tu mah garan
Di muko mato denai nangko
Kalain mambuek nan katuju
Adaik di mano tu Diak kanduang
Limbago mano kalian tuang
Anak denai si Reno Intan
Labiah tuo dari Hindun Suri
Romannya iyo lai rancak
Jiko ditimbang samo barek
Iyo jo Upiak Hindun Suri
Mangapo si Lelo untuak si Hindun
Tantang si Upiak Kasumbo Ampai
Inyo adiak kito baduo
Patuik ambo nyo dahulukan
Dek ambo nan labiah tuo
Anak Kasumbo iyo baduo
Nak ang ambiak kaduonyo
Si Kambang untuak si Mambang
Si Lelo untuak Hindun Suri pulo
Jadi apo denai ko dek kalian.”

”Ampunlah ambo pada Kak Rajo
Nan sabananyo iko Kakak
Di mano latak rasionyo
Buliah juo itu garan
Ambo bukak dalam rapek ko
Tantang si Mambang jo si Lelo
Indak doh ambo nan maatua
Indak pulo Kasumbo Ampai
Iyo paja nan baduo ko
Iyo nan datang pada kami
Bapikia kami maso itu
Mangapo mamaga karambia condong
Buahnyo jatuah ka ladang urang
Karambia awak lai ado
Gulai tatumpah nyo kanasi
Sananglah kito maluluanyo
Si Lelo si Hindun Sari

Katurunan kito sunduik basunduik.”

Manyambah baliak Datuak Bandaro
”Pado pikiran hati Ambo
Elok juo itu garan
Kito mancang galanggang
Kok indak urang manalangkai
Nan katuju dek anak kito
Kito ambiak jalan nan cako.”

Tahaniang urang kasodonyo
Lai sabanta antaronyo
Baru manitah Tuangku Datuak Tumangguang
”Manolah Kakak Manti Tuo
Sarato sanak nan duduak ko
Kok lah banyak kato baitu
Manuruik denai tantang itu
Mancang galanggang malah kito
Tapi usah bagageh bana
Nak salamaik alek kito
Kito kumpuakan malah pitih
Sarato kabau jawi kambiang
Kok bareh mungkin lai cukuik
Iyo padi dari Gajah Menong
Sarato dari Badak Gapuak
Kok kurang juo itu beko
Kito ambaik dari rangkiang
Rangkiang nan ampek lai
Si Tinjau Lauik ciek sajo
Cukuik untuk rang Ustano ko
Sabab Bujang nan sambilan
Jarang inyo makan di rumah
Sagalo karajo baase ko
Mamak sarahkan bakeh Buyuang
Iyo Byuang nan Tungkek di nagari
Dibantu Mamak Manti Tuo.”

3. Sutan Rumah Panjang Sakik

Takajuik si Kambang Aruih
Mandanga urang mandaham
Urang mandaham tigo kali
Manjanguak inyo ka tingkok
Dibukakan pintu dek si Kambang
Lah naiak urang nan datang ko
Tapakiak si Kambang maso itu
Diuluakkannya tangan panjang-panjang
"Kak Mambang mah kironyo
Taragak Upiak indak tabado
Rasokan indak basuo lai
Mangapo Kakak ka mari garan
Kakak ndak buliah ka rumah ko
Sabulum ambo basuami
Baitu kaba Upiak danga."

Diduduakkannya elok-elok dangai
Nyo pai duduak agak jauah
Indak inyo mangecek-ngecek
Inyo iyo manangih pulo
Ado sabanta antaronyo
Naiak sajo urang ka rumah
Urang itu surang dari Bujang Sambilan
Sutan nan Gadang tu mah garan
"Elok bana laku kalian
Duduak baduo dalam rumah

Mamak Datuak ndak di rumah
Amai Kasumbo indak pulo
Kak Majo Lelo lah jaleh kini
Baliau tu pai jauah
Mancari alaik-alaik nan kurang
Iyountuak mancang galanggang.”

”Manolah Kakak Sutan Nan Gadang
Ambo baru sajo naiak rumah
Alun mengecek sapatah juo
Ambo ndak tahu itu garan
Urang lain indak di rumah.”

”Kok baru sabanta Mambang naiak
Alun kan dapek mangapo tido
Kini tampaknya si Kambang manangih
Mungkin dipaso itu garan
Iyountuak babuek salah
Inyo iyo paja elok
Indak amuah mambuek salah
Dek itu inyo manangih.”

”Sabagai pulo itu garan
Kito indak buliah ka rumah ko
Iyo datang surang-surang
Baitu kaputusan rapek gadang
Rapek nagari maso itu
Kito turun kini nangko
Mambang kan iyo ambo adokkan
Iyo pada Pandeka Rajo
Inyo mambaok pada rapek
Baapo hukuman kan ang tarimo
Laku parangai itu garan
Kami ko adiak baradiak
Disabuik balaku maningkahak
Iko mah garan nan rancak tu
Iko laku ang nan elok tu
Mambuek malu ayah Mudo.”

”Ampun ambo Kakak Sutan Gadang
Usah ambo dibaok kini

Iyo pada Pandeka Rajo
Ambo datang hamari ko cako
Iyo disuruhay ayah kito
Liau iyo sakik kini
Lah tigo hari indak makan
Ambo disuruhay iyo ka mari
Mintak buukkan gulai bawal
Pado Amai di rumah ko.”

”Kok iyo Ayah Mudo sakik
Mangapo ayah Rajo indak tahu
Waang ka mari iyo datang
Ka Ustano indak ang singgah
Adaik di mano itu kawan
Lah jaleh kini kalian sakongkol
Sangajo disuruhay ang ka mari
Untuak basuo jo si Kambang
Untuang si Kambang indak amuah
Indak amuah marompak pantang
Iyo kok amuah inyo garan
Indak doh inyo kan manangih
Di anjuang kalian ambo dapeki
Ambo panggang rumah gadang ko.”

Kok iyo Ayah Mudo garan
Ingin mamakan gulai bawal
Indak ang paralu mah ka mari
Andeh ang urang pandai mamasak
Baitu Adiak Hindun Sari
Apo urang ko nan ndak pandai
Kato bacari itu cako
Cadiak pandai ang kironyo
Nak manyuruak di lalang sahalai
Ikua buruak ang tampak juo
Turuik kan ambo kini nangko
Kito pai ka Pandeka Rajo.”

Tahaniang tampak Mambang Langik
Indak inyo dapek mengecek

"Mano Kakak Sutan Nan Gadang
Mangapo buruak sangko sajo
Ayah jo Andeh ndak di rumah
Tapi ambo bukannya surang
Barampek dayang di rumah ko
Balimo jo Inang pangasuh
Urang di dapua ado pulo
Di anjuang ambo ado puti-puti
Nan kan kawan di galanggang
Kami ko bukan binatang
Nan mambuek ulah di nan rami
"Manolah Adiak Kambang Aruih
Indak tajadi tu nan buruak
Dek Upiak iyo urang elok
Kok iyo itu samo amuah
Inang pangasuh dayang-dayang
Manutuik muluik kasadonyo
Kok Tuannya nak baulah."

Ambo mambaok Mambang Langik
Iyo kapado Pandeka Rajo
Kasalahannya alah nyato
Inyo datang ka rumah ko
Iyo datang surang sajo
Sabalum dibuek iyo galanggang."

”Kok itu nan Kakak sabuik
Kaƙak kan datang surang pulo
Kak Mambang datang disuruah Mamak
Kakak datang siapo manyuruah.”

”Manolah Adiak Kambang Aruih
Ambo datang untuak malarang
Inyo ko mambuek salah
Tahadok Adiak urang nan tacenai
Urang dianjuangkan di Koto Tujuah.”

”Tapi Kakak indak tahu garan
Baso inyo di rumah ko
Ambo maraso iko garan
Kasalahan Kakak labiah gadang
Dari salahnya Kakak Mambang
Kakak Mambang datang disuruah
Iyo disuruah Mamak Rumah
Niniak mamak di nagari ko.”

”Ambo indak bamakasuik naiak
Tapi maliek inyo naiak
Ambo iyo naiak pulo.”

”Kan samo salah keduonyo
Dek Kakak Gadang mah indak juo
Mambaok kawan datang ka mari.”

Dalam batangka nan baitu
Tabuka pintu maso itu
Sutan Majo Lelo mah nan masuak
Tacangang gadang inyo garan
Maliek urang basirahan muko
Tantang urang nan baduo
Sutan nan Gadang itu dangai
Indak iyo panah mah bakawan
Iyo jo Sutan Mambang Langik
Dari ketek sampai gadang ko
Dek parangainyo indak sarupo
Bakato inyo maso itu.

"Mano Kak mudo Sutan nan Gadang
Sarato Adiak Mambang Langik
Apo garan nan tajadi
Dek muko bakasirahan
Mangapo pulo itu garan
Si Kambang Aruih iyo dangai
Indak kau di ateh Anjuang."

Bakato si Kambang maso itu,
"Manolah Kakak kanduang Upiak
Dangakan malah kato Upiak
Nyo caritokan mah sadonyo
Apo garan nan tajadi
Tadiam Sutan Majo Lelo
Sabanta inyo bapikia
Bakato inyo maso itu.

"Manolah Kakak Sutan Nan Gadang
Sarato Adiak Sutan Mambang
Kok baitu bunyi carito
Iyo mah salah kaduonyo
Mamintak ambo kini nangko
Kito adokkan pakaroko
Kito simpan uantuak kito sajo
Iyo kito barampek ko
Usah dibaok ka nan lain
Kok heboh hagari beko
Dek kito pamacik adaik
Kito pulo nak malangga
Kito nan patuik iko garan
Patuah karapek nan lah putuih
Diputuihkan dek Rajo kito.

Manolah Kakak Sutan Nan Gadang
Babaliak Kakak ka Ustano
Mano Adiak Mambang Langik
Mari turuik ambo jo kudo
Kito pai maliek Mamak
Kok iyo liau sakik kini

Parah ndak parah panyakiknyo
Dari sinan kito ka Ustano
Maagiah tahu Mamak Rajo.

Mano Upiak Kambang Aruih
Babaliak kau kateh anjuang
Indak buliah turun ka bawah
Kok indak ado nan maimbau
Kakak kan mamintak padu Mamak
Si Reno Intan si Hindun Sari
Di siko disuruahnya bapingik
Nak ado garan kawan Upiak
Kawan nan lain nan barampek
Nan kan manjadi kawan Upiak
Iyo dalam galanggang nantik
Usah dinantik duo bulan lai
Inyo masuak ka rumah ko
Sudah pakan ko kakak suruah
Iyo inyo datang ka mari
Baeko patang o adiak kanduang
Kakak rundiangkan jo Mak Manti
Sabagai pulo itu Kambang
Kok pulang Andeh dari pakan
Suruah mancari bumbu gulai
Iyo bumbu panggulai bawal
Ikannya kakak kan mancari
Sarik didapek di pakan kito
Maalum bawal lauak lauik.”

Lah turun urang nan batigo
Naiak si Kambang kateh anjuang
Dihampehkan badan ka tilam garan
Manangih inyo taisak-isak
Manangih babuah-buah.

Salasiah takulai di tapi tabek
Batangnya kuruih talinduang lado
Kasiah dimulai dari ketek
Gadang diputuih urang pulo.

Kakak sayang si Kambang Langik
Urang iyo pancang galanggang
Mancari pangganti Kakak
Urang nan kan jadi jodoh Upiak.

Sapuluah kudo balari o Kak
Indak samo jo kudo balang
Sambuah ganti'buliah dicari, Kak
Indak kan samo jo nan hilang.

Samo tutuah Kak lain roman
Baapo jo roman buliah samo
Parangi di mano ka sarupo.

Lah pulang Andehnya dari pakan
Mandanga urang taisak-isak
Naiak putiko ka teh anjuang
Nyo dapeki si Kambang manalungkuik
Manalungkuik mamaluak banta
Sadu sadan nyo manangih
Maliek andehnyo datang garan
Indak doh inyo baranti
Manahan dado malulua tangih
Nan biaso dibueknyo
Kok iyo inyo kanai berang.

”Mangapo baiko Nak sayang
Mangapo Upiak sayang Andeh
Siapo urang nan manggaduah
Siapo urang nan berang garan
Cubo sabuik Nak apo nan tasuo.

”Indak ado urang nan berang
Andeh sayang, Ayah iyo kasiah
Kakak tungga baitu pulo
Mamak baduo bakuaso
Iyo manyabuik sayang juo
Tapi sayang ko pado muluik
Indak doh sampai masuak hati.

Kok iyo sayang rang ka Upiak
Mangapo Upiak kan dipaso
Iyo kawin jo urang lain
Kasiah Upiak bakeh Kak Mambang
Iyo diputuih jo parang tajam
Jo padang kakuasaan Rajo
Jo karih pusako adaik lamo.”

”Danga juo Sayang Andeh
Amak ditutua dipapakan
Iyo dek sayang bakeh Upiak
Dilarang garan Upiak kawin
Jo si Buyuang anak mamak Upiak
Sabab nan patuik iyo garan
Iyo anak Mak Rajo Upiak
Manuruik adaik iyo sayang
Indak inyo batanyo lai
Dirapek garan diputuihkan
Anaknyo nan tuo garan
Iyo dijadikan tunangan Upiak
Nan buliah dielakkan
Patamo cacek tubuahnyo
Iyo pincang, iyo lumpuh
Kaduo indo utamo nyo
Iyo pakak buto bisu
Katigo buruak lakunyo
Nan tabendang iyo ka langik
Tabarito di alam laweh
Iyo parampok yo panyamun
Mangarajokan sia baka
Marusak kampuang jo nagari
Kok umua kurang dari Upiak
Indak buliah jadi alangan
Baitu pulo buruak roman
Capuak, hitam, sumbiang, juliang
Indak alangan itu sayang
Gadang tenggi buncik paruik
Randah rindin, janjang balang
Indak buliah ditulak Puti

Puti tuo dalam nagari
Kamanakan Rajo nagari tu
Baapo bana kan rancaknyo
Haruih manyarah inyo garan
Andeh surang, nan padusi
Upiak iyo surang pulo
Indak ado nan lain dari Upiak
Kok ado kakak Andeh nan padusi
Ado pulo anak padusinyo
Buliah mailak kito Sayang
Kok adiak pulo mah nan ado
Alun buliah kito mailak
Sabagai pulo itu sayang
Kok Upiak mah nan buruak
Mamak indak buliah pulo
Mancari manantu ka nan lain

Bayangkan pulo mah dek Upiak
Baapo raso urang nantun
Urang rancak tampa anggun
Kakawin jo padusi buruak
Mungkin sumbiang, mungkin juliang
Tapi indak buliah inyo manulak
Baitu adaik salamonyo
Dek Puti tu haruih kawin
Indak kan ado urang lain
Nan kan namuah mah jo inyo
Dek itu ipanyo yo dipaso
Anak mamaknyo nan paliang tuo
Kok ayahnyo iyo nan rajo
Kamanakan ayahnyo nan tuo pulo.”

”Kok itu indak baapo bana,”
Katanya Puti Kambang Aruih
”Dek laki-laki itu garan
Buliah mancari padusi duo tigo.”

”Laki-laki buliah babini lain
Kok bininya nan buruak tu
Alah baranak laki-laki

Nan kan manjadi rajo isuak
Kok padusi sajo mah anaknyo
Sampai tujuah itu garan
Baru inyo buliah ka nan lain
Dek adaik mancari katurunan
Kuaik dipacik niniak mamak
Iyo salamaik alam
Iko mah tuo Andeh nangko
Alun mandanga Andeh garan
Dari carito niniak tuyang
Nan padusi atau laki-laki
Nan indak kawin saumua hiduik
Urang nan marando lamo
Indak mah ado juo tadanga
Bia timpang bia tengkak
Bia buto bia pakak
Habih kawin kasadonyo.

Untuang juo Upiak sayang
Amuah kak Rajo mah mangalah
Upiak indak doh dipasonyo
Iyo kawin jo anaknyo sayang
Amuah inyo mancang galanggang
Mancari jodoh untoak Upiak
Anaknyo takah mah kasadonyo
Indak ado nan cacek calo.

Tantang si Buyuang Majo Lelo
Indak pulo inyo paso
Kawin jo anaknyo nan batigo
Iyo mamiliah salah surang
Inyo amuah si Reno Intan
Ikuik duduak dalam galanggang
Asa si Hindun ikuik pulo.

Jo Andeh si Majo lai bajanji
Kok indak ado nan katuju
Dek Reno Intan garan
Urang nan ado di galanggang
Inyo kan kawin jo si Intan ko

Kudian jo si Hindun Sari pulo
Si Reno tuo dari si Hindun
Indak baapo nyo dahulu
Iyo satahun duo tahun.

Kok Kakak Upiak manjadi Rajo
Iyo Rajo Koto Tujuah ko
Tasarah dinyo itu isuak
Siapo nan dipiliahnyo
Iyo Puti untuak Ustano
Nan kan manjadi Andeh Suri.”

Lah habih tangih Kambang Aruih
Baru pulo inyo katokan
”Baso Mak Mudonyo iyo sakik
Liau bakandak gulai bawal
Bagageh si Kasumbo iyo ka dapua
Di tolong kini dek si Kambang
Maasekan bumbu santan pakek
Santan panggulai ikan bawal.

Ado sabanta antaronyo
Lah datang garan Majo Lelo
Baduo jo Mambang Langik
Mambaok ikan duo ikua.

”Manolah Andeh kanduang Buyuang
Tolong masak ikan nan duo ko
Nan sikua untuak Mamak Mudo
Sikua pulo untuak kito siko
Mak Mudo iyo mah sakik
Lah tigo hari indak makan
Inyo mintak padu Buyuang
Mambaok Andeh mah kasinan
Sarato Upiak Kambang Aruih
Inyo taragak ka si Kambang
Sajak si Kambang iyo bapingik
Alun sakali diliekno
Taragak bana nyo kironyo.”

Patang harinyo itu garan
Barangkek si Kambang jo Andehnyo
Manuju kampuang Koto Di ateh
Pai manyilau mamak nyo sakik
Mambaok nasi gulai bawal
Si Kambang masuak kain saruang
Matonyo sajo mah nan jaleh
Badannya tatutuik sampai ka tumik
Tapi urang tahu juo

Baso inyo nan bajalan
Jalannya capek-capek sajo
Indak maliek kida kanan
Indak tahu inyo garan
Batigo urang manuruiki
Manuruik dari balakang dangai
Sutan Nan Gadang mah kironyo
Sarato Bujang duo urang
Adiak dek Sutan Nan Gadang.

Dek lamo lambek di jalan
Hari basarang patang juo
Sampai kini urang nangko
Ka rumah Gadang Sutan Rumah Panjang
Mandaham si Kasumbo tigo kali
Kalua garan Mambang Langik
Dituruikkan adiaknya Hindun Suri.”

”Lai mah datang Amai ambo
Sarato adiak Kambang Aruih
Lai kan lakeh ayah cegak
Alah gak rusuah kami garan
Damam ayah iyo hangek bana
Dukun baduo indak turun lai
Iyo di siko siang jo malam
Lah panuah rumah dek paureh
Damam nan indak turun juo
Naiaklah Amai sarato Upiak
Ayah alah di ruang tangah
Indak lai naiak kateh Anjuang.”

Lah naiak si Kambang jo Andehnyo
Dikajanyo mamaknya ka ruang tangah
Nan tagolek di ateh tilam
Dijago urang kida kanan.

”O Mak kanduang sayang Upiak
Mangapo mamak sakik pulo
Usah kami mamak tinggakan
Paratian iyo sadang hangek
Hati nan angek-ankek dingin
Sitawa iyo di tangan Mamak
Indak di tangan urang lain.

Biakan nan baduo ko
Lari ka nagari urang lain
Ka Batipuhu ka Padang Panjang
Ka Bunguih ka Ujung Karang
Kan apo Upiak jadi rang Gadang
Kan makan hati saumua hiduik
Upiak dikasiah disayang dangai
Dek sagalo urang dari ketek
Lah gadang Upiak diracun
Apo gunonyo hiduik Upiak
Elok maminum racun surang
Atau malumpek ka batang aia
Indak ado nan kan dirusuahkan
Rusuah mah maadokan galanggang
Galanggang mambuang pitih.”

”Manolah Upiak adiak kakak
Liek tu aia mato ayah kito
Kalua manghujan labek
Usah digaduah liau sayang
Jo kato-kato macam iko
Batambah barek tangguangannya
Batambah laruik pikirannya
Pado raso kakak nangko
Iko panyabab liau sakik.”

Katonyo Sutan Mambang Langik.
Diiud si Kambang muko mamaknyo
Disekanyo aia mato jo pipinyo
Batambah dareh mah kalua
Aia mato Sutan Rumah Panjang
Bakato kini Kasumbo Ampai.

”Usah Kak Mudo manangih juo
Batambah hangek badan Kakak
Usah si Kambang ditangisi
Kito umbuak kito banari
Kok inyo kito tangisi pulo
Manyabalah kito kainyo
Batambah paralt panyakik nyo
Tiok sabanta inyo sabuik
Inyo kan lari inyo kan tajun
Indak ibo inyo di kito
Inyo sangko itu garan
Kok itu inyo lakukan
Kan sanang kito kasadonyo
Ado nyo liek jo matonyo
Sutan Majo Lelo jo kakaknyo
Kusuak kasak patang pagi
Manyadiokan alaik untuk galanggang
Mancari pitih hilia mudiak
Usah mangharok rayaik sajo.”

Bakato pulo Mambang Langik,
”Mano Adiak kanduang Kambang Aruih
Itu nasi alah tahidang
Dihidangkam si Hindun Sari
Ambiak malah agak sapiriang
Suokkan pado ayah kito
Upiak datang maliek liau sakik
Sakik Upiak na'n Upiak sabuik
Itu tandanga kudo datang
Mungkin Kak Lelo, jo Mamak ayahnyo
Hapuihlah aia mato Upiak
Usah disabuik nan bak cako

Maruntuah hati tu adiak kanduang
Malintuhakan tulang kami laki-laki
Di Upiak mungkin pamainan lidah
Dikami iyo kan tabayang-bayang
Dibayang di ruang mato dangai
Kok itu iyo tajadi
Didorong setan jo ibilih
Pisuruah langik jo bumi
Langik jo bumi iyo mandanga
Kato-kato Upiak cako tu
Indak doh kato-kato elok
Kok langik alah sato berang
Ka mano kito kan lari
Lari ka rimbo rimbo tabaka
Lari ka lauik lauik makan kito
Kok lari ka nagari urang
Urang nan indak manarimo.”

Sabanta pintu tabukak
Masuaklah Tuangku Datuak Tumangguang
Diiringangkan Sutan Gampo Alam
Ayah si Kambang jo Sutan Majo Lelo
Di balakangnya iyo Majo Lelo
Iyo Sutan Majo Lelo sandiri
Diiringangkan Sutan Nan Gadang
Sarato adiaknya nan baduo
Bakuak urang kasadonyo
Nan bakuliliang Sutan Panjang.

Baruari Tuangku Rajo Tumangguang
Dirasokannya kapalo adiaknya tu
Sudah itu tangannya pulo
Kudian ka kaki sampai ka tumik
”Mano ang Buyuang Mambang Langik
Lah macam iko ayah ang garan
Ayah ko indak diagiah tahu
Mangapo ayah ko kalain sisahkan
Jiko nan buruak nan tasuo
Apo raso ayah ko Buyuang

Si Kasumbo baitu pulo
Kau surang datang ka mari
Kok tibo kakak ko mah nan sakik
Bagageh kalian baduo datang
Mambaok dukun jo paureh
Baitu juo salamo ko
Si Buyuang Sutan Panjang ko
Jarang bana inyo sakik
Dek itu ambo takajuik cako
Mandanga si Sutan sakik kini.

Mano ang Buyuang Sutan Gadang
Pai japuik Dukun nan Sati
Dukun Sati dari Koto Tangah
Suruah datang inyo kini juo
Baok Buyuang kudo ayah
Buliah inyo japuik tabaok
Suruah baok limau tujuah ragam
Sarato talua ayam denak
Buliah diliek itu garan
Iyo sakik ayah Mudo ang ko.

”Ampun Buyuang ayah kanduang
Buyuang barangkek kini nangko
Mano ka cambuik Samburani
Nak capek Buyuang pulang baliak.”

”Cambuik iyo di palano kudo
Indak di baok doh ka rumah
Makasuik ayah tadi nyo ko
Indak kan lamo ateh rumah
Tapi maliek ayah mudo ang
Macam iko garan agak parah
Ayah duduak lah sabanta
Manjalang Dukun Sati datang.”

Badatang sambah Hindun Sari
”Manolah ayah Tuo Upiak
Ayah ndak lakeh dibari tahu
Dek ayah ambo sakik garan

Sakiknyo toga hari nangko
Indak parah saroman hari ko
Hari ko hangeknyo naiak
Inyo mintak gulai bawal
Iko mah lai dibuek Amai
Lah disuokkan Kak Kambang yo saketek
Tigo sudu dapek dilulua liau
Iko ikan ikua-ikua gadang
Elok ayah makan di siko
Sarato Mamak jo kak Lelo
Untuang lai lamak makan Ayah
Maliek urang banyak makan.”

Mangecek kini lambek-lambek
Iyo Sutan Rumah Panjang,
”Mano kak Rajo kakak ambo
Hari ko paneh badan ambo
Iyo mah naiak rasonyo
Tapi mancaliak lah datang kasodonyo
Lah ringan raso kapalo
Makanlah Kakak jo diak Gampo
Sarato Sutan Majo Lelo
Buliah ambo disudukan pulo
Iyo dek Upiak Kambang Aruih.”

Makanlah urang nan batigo
Babisiak si Kambang Aruih
”Untuang ikan tu kito baok
Iyo kaduonyo garan tadi ko
Mancaliak ikañ lai banyak
Samba ayam ado pulo
Lamak tampaknya makan Mak Rajo”
Bakato inyo maso itu.

”Manolah Mak Rajo kato Upiak
Lai mah lamak di Mamak gulai bawal
Gulai bawal masakan Upiak
Acok Upiak maanta samba
Alun panah gulai bawal
Isuak-isuak nak Upiak buek

Usah manantik mamak sakik
Wakatu cegak labiah lamak.”

”Mano Nak sayang makan Mamak
Indak doh panah Mamak lupo
Mamakan samba baokan Upiak
Cuman maso kudian ko
Upiak jarang ka Ustano
Saroman Upiak berang garan
Pado Mamak nan tuo ko.”

”Mangapo Upiak berang ka Mamak
Upiak dek patuah bakeh Mamak
Mangko Upiak ndak datang lai
Mamak manyuruah Upiak dipingik
Dek Mamak nak mancang galanggang.”

”Upiak dipingik untuak rang banyak
Dek baitu manuruik adai
Kok Upiak datang ka Ustano
Indak salah manuruik adai
Asa Upiak indak datang surang
Ka mari ko lai Upiak datang
Ustano Upiak jauahi
Agak taibo hati Mamak
Ka mari ko Upiak datang
Dek dijapuik kakak Mambang Langik
Ka Ustano mangapo Upiak garan
Indak kan amuah datang
Kok dijapuik dek Kak Sutan Nan Gadang
Atau Kak Sutan Nan Tangah
Kasambilannyo elok bana
Indak langang Upiak bajalan.”

Tataku urang mandangkan
Talabiah Datuak Gampo Alam
Sarato Sutan Majo Lelo
Tapakiak si Kasumbo Ampai
Dikajanyo anaknyo tu
Ditutuik nyo mulaik paja tu

"Lancang bana Kau Kambang
Dari siapo Kau baraja
Sádang urang taťakua tu
Masuak Sutan nan Gadang dangai
Diiriangkan Dukun Sati
"Ampun ambo Tuangku Rajo
Mangapo sakik ngilu paniang
Ambo biaso ka Ustano
Kini ko disuruh jauah
Apokah Tuangku ndak lamak badan
Tuangku nan Gadang bagagéh bana
Indak manyabuik apo-apo."

Manitah Tuangku Datuak Tumangguang
"Bukan denai yo nan sakik
Tapi iyo adiak denai
Iyolah Sutan Rumah Panjang
Biaso kak Dukun maubeknyo
Pado maso dahulunyo."

"Dukun di siko tantu ado
Indak koh inyo berang beko
Ambo maubek rang di siko
Adaik kami dukun-dukun
Talabiah nan sapaguruan
Indak buliah rabuik marabuik
Iyo karajo kawan-kawan
Kawan buliah manjadi lawan
Kok alah' bakaberangan."

"Mano kak Dukun janyo denai
Bukan tu denai indak tahu
Kabiasaan nan bak itu
Tapi padò raso denai
Dukun Ustano itu garan
Iyo kapalo sagalo dukun
Labiah pandai dari nan lain."

Itu balun Tuangku katokan
Dek itu ambo agak takuik

Kawan manyangko ambo garan
Ambo mambuek sakandak hati
Indak tahu babaso basi
Tuangku iyo rajo kami
Tapi sabuah itu garan
Manuruik titah Tuangku juo
Kito barajo ka mupakaik
Mupakaik diambiak dalam rapek
Rapek Tuangku jo Pangulu
Iyo Pangulu saandiko.

”Nan kini ko iyo kak Dukun
Tolonglah dahulu Adiak denai
Kok salah ambo kironyo
Denai sambahkan dalam rapek
Iyo rapek nan kan tibo
Salah Kak Dukun salah denai.”

”Kok baitu titah Tuangku
Ambo cubokan pandai ambo
Langik jo bumi mancegakkan
Mamintak kito bakeh inyo.”

”Tuangku Sutan Rumah Panjang
Barapo hari Tuangku sakik
Alun kok ado nan maubek
Iyo Dukun Koto Di ateh ko.”

Manjawek Sutan Mambang Langik
”Manolah Mamak Dukun Sati
Lah tigo hari Ayah garan
Manyabuik badan indak lamak
Alun kami maimbau dukun
Kami ureh kami limaui
Kami tampah kapalo jo sidingin
Hari ko batambah paneh badan Ayah
Mamak Rajo kami agiah tahu
Mamak Dukun iyo nan liau imbau
Tolong lah Ayah kini nangko
Indak ado urang nan ka berang.”

Tasangai galak Sutan nan Gadang

Katiko inyo datang garan
Sarato adiaknyo nan baduo
Inyo lai mangecek-ngecek
Iyo jo dukun Koto Diateh
Baduo urang itu garan
Lah tigo hari di rumah tu
Indak doh turun siang malam
Katiko inyo manyabuik dangai
Nak pai manjapuik Dukun Sati
Urang ko pulang kaduonyo
Bapikia inyo maso itu
"Baiko caro Mambang Langik
Manggalamai jo muluik manih
Iko malah nan disabuik urang
Inyo iyo elok bana."

Dimintak kini dek Dukun Sati
Iyo sabuah pisau tajam
Sarato aia dalam mundam
Manyambua inyo kida kanan
Dimantokannya limau nan tujuah
Agak takareh disabuiknya garan
Tadanga dek urang badakekan
"Limau silimau tujuah
Nan tumbuhan di tabiang curam
Urek dilingka ula gerang
Batang dililik ula taduang
Daun dijago panyangek gilo
Sarato tabuan gilo sati
Indak tadakek dek rang lalu

Indak tausiak dek sambarang urang
Bajalan angkau dalam mundam
Tunjuakkan panyakik Tuangku kami
Iyo Tuangku Sutan Rumah Panjang
Nan marupo di dalam mundam
Iyolah talua ayam denak."

Sambia inyo mamantokan tu
Nyo pacahkan talua ayam denak
Nyo masuakkan kuniangnyo sajo
Ka dalam aia dalam mundam
Nyo saik limau nipih-nipih
Nyo masuakkan pulo ka dalam mundam
Dimulai jo limau lunggo
Iyo limau nan paliang gadang
Marupokan kakuatan nan gadang pulo
Di bawah itu limau puruik
Katigo limau karatan
Kaampek iyo limau kapeh
Kalimo iyo limau sariang
Kaanam limau kasturi kawan
Katujuih kalingkiang harum manih
Diambiaknyo lidi karambia hijau
Duo batang panjang sajangka
Digarakkannya limau kida kanan
Bakuliliang kuniang talua ayam.

Ado sabanta antaronyo dangai
Inyo manakua manangadah
Nyo naiakkan tangan ka langik
Sudah itu nyo takankan pulo ka bumi
Basaru inyo maso itu
"Buyuang Hitam kawan nan satia
Urang nan arih bijaksano
Nan turun dari langik nan katujuah
Nan bajalan salingka alam
Tolong malah sanak katokan
Iyo panyakik Tuangku Mudo
Adiak Tuangku Rajo kami,"
Inyo manyambua tigo kali
Ka kida ka suok, jo ka bawah
Matonyo iyo manuruik
Manuruik garak tangannya
Nan nyo angkek tenggi-tenggi
Nan nyo rantang panjang-panjang
Nyo takankan iyo ka lantai

Sudah itu ka dadonyo pulo
Karuik kaniangnyo tujuah kini
Tampak malintang panjang-panjang
Sabanta inyo manakua
Nyo sambahkan panglihatannya.

”Ampun Tuangku Rajo kami
Sakik Tuangku ko iyo agak parah
Tapi kok dapek ubek nan sarasi
Basuo buku jo rueh
Mudah mudahan itu garan
Dangan tolong langik jo bumi
Lai mah indak kan mambaok
Mamintak kito basamo-samo.

”Manolah Kak Dukun nan Sati
Apo garan namo panyakik
Apo pulo namo ubeknya
Iyo ramuan nan kan dicari.”

”Ampunlah ambo Tuangku Rajo
Tuanku ko tampaknya tatagua
Iyo tatagua dalam rimbo
Baliau bajalan di rimbo gadang
Iyo di lereng Gunuang Tujuah ko
Bajalan manunggang kudo
Ado surang di balakangnya
Jauah mudo nyo urang tu garan
Jauah nagari nan liau turuik
Kan pai kan pulang liauta tagua
Mungkin kudonyo kanai juo
Wakatu kan pulang itu garan
Kudo itu lah agak layua
Tampak jaleh dalam tanuang.

Mungkin dicakiak nyo saketek
Dek itu karongkongannya sakik
Iyo sakik dibaok malulua
Saleronyo tantu patah dangai
Dek badannya iyo paneh bana

Tapi kudian turun pulo
Dek itu badannya angek dingin.

Tigo macam ubek dicari
Patamo untuak rangkungan tu
Iyolah tigo sikek pisang kalek
Sambilan talua ayam denak
Tigo buah karambia hijau mudo
Mudonyo iyo maingua dangai
Indak buliah nan lah malakek
Nan alah manganduang santan
Sarato madu labah nan baru
Saketek asam limau kapeh
Mambueknya itu garan.

Sasikek pisang tu yo dirameh
Dirameh jo batang alang-alang
Dibawok pulo mah ureknya
Dirameh sampai sarupo bubua
Sabuah talua dipacah dalam karambia
Sabuah pulo karambia nyo
Dimasuakkan sasudu madu labah
Aia limau tigo saik pulo
Dikacau jo batang sitawa mudo
Iyo nan rabuang alun bapucuak
Titituak-tutuak dahulu saketek
Baru sitawa dikacaukan
Kaduonyo ubek ko dicampuakan
Wakatu akan diminium dangai
Diminum habih sahari samalam
Iyo sabuah karambia tu
Sasikek pisang kalek
Piliah malah nan elok-elok
Nan gadang mah sikeknya
Tigo karambia untuak tigo hari
Kok nantik alun lai cegak
Diulang tigo hari lai.

Ubek paneh nan naiak turun
Indak doh amuah diureh sajo

Ditangeh agak tigo kali
Iyo sakali mah sahari
Indak doh tanggeh dibaka
Tanggeh diabuih sajo Tuangku
Dek liau sakik karongkongan
Usah paneh masuak ka dalam
Katumbuhan masuak ka dalam
Untuang tasangkuik nyo di lihia
Kok jantuang hati jo rabu
Inyo dapek dek panyakik ko
Indak ado harapan lai.

Ubek tanggeh itu garan
Iyo daun pinang daun paraweh
Sikumpai jo cikarau
Jariangau jo kunik bolai
Daun langgundi tambahnyo pulo
Diabuih itu kasadonyo garan
Iyo di dalam pariuak gadang
Kok aianyo alah manggalagak
Baru pariuak diangkek
Dibuek tungku dalam rumah ko
Dijarangkan malah pariuak
Kok hangeknyo alah gak kurang
Duduak Tuangku di atehnyo
Dilingka jo lapiak pandan
Di ateh lapiak pandan pulo
Asok indak buliah kalua
Tuangku pakai kain saruang sajo
Pariuak di dalam kain saruang
Hangeknyo langsuang masuak ka badan
Kalau hangeknyo alah habih
Tuangku batuak tigo kali
Angin ka lua dari bawah
Baru buliah ka lua dari lapiak.

Kok hangek nan datang dari tanggeh
Alah habih iyo beko
Baru Tuangku buliah diureh
Dilakekkan tampah di kapalo

Tampah si tawa sidingin daun salasiah
Urehnyo iyo bungo tujuah ragam
Kok Tuangku indak dapek duduak
Iyo duduak di ateh pariuak
Buliah basanda padō rang lain
Urangko, tagak di balakang Tuangku
Dari pinggang ka bawah garan
Masuak ka lapiak panguruang tanggeh
Nan mulo-mulo ko iyo ambo
Barisuak jo sataruinyo iyo nan lain
Tanggehnyo iyo tigo hari
Kok alun cegak tigo hari
Iyo duo kali tigo hari
Kok alun juo cegak
Tambah sahari duo lai.

Pantangnya iyo ado pulo
Kurangi mamakan garam
Pantangkan dagiang nan bakaki ampek
Ruak, arak, tapai niro, tabu hitam
Iyo mah indak buliah pulo
Minuman nan elok iyo Tuangku
Aia karambia aia talang.

Sasudah itu anak rambuiknyo indak ruruik
Gosok jo dama (kamiri) nan dibaka
Gosokkan di kulik kapalo
Sarato sunguik bulu mato
Karajokan tiok pagi patang.

Makan nan elok iyo bubua
Santannya usah banyak pulo
Atau ayam nan dicancang haluih
Iyo elok itu garan
Dicampukan ka bubua cako.

Barehnyo iyo bareh carai
Bareh si puluik indak buliah
Talabiah sipuluik hitam jo sirah
Dek iko barang untoak tapai.”

”Tadanga dek kalian paja-paja
Apo barang nan kan dicari
Usah sarahkan kadubalang
Kalian bana nan mancari
Dibagi limo kasadonyo
Buyuang Gadang tigo baradiak
Nan ado duduak samo jo kito
Sudah itu si Majo Lelo, garan
Kalimo iyo Mambang Langik
Dek kini hari lah malam bana
Pagi buto kalian barangkek,”
Baitu titah Rajo Tumangguang.

Manyambah kini Dukun Sati
”Ampun Tuangku Rajo kami
Limau nan Tujuah jo kumanyan
Itiu iyo tangguangan ambo
Usah itu dicari pulo
Dek Tuangku Sutan nan balimo
Sarik itu kan dapek beko
Kini dek hari alah malam
Tolong Diak Sutan nan cako tu
Iyo maanta ambo pulang
Barisuak ambo babaliak
Untuak mambao ubek-ubek tu
Sarato mamariso kudo Tuangku ko
Kok inyo dapek sakik pulo
Urang nan duduak di balakang
Di balakang Tuangku nan sakik ko
Elok juo ambo pariso.”

Bakato si Mambang maso itu
”Manolah Mamak Dukun Sati
Urang nan surang itu garan
Iyo ambo mah nan pai
Pai maanta ayah ambo
Ka rumah kawannya nan baralek
Hari patang kami pulang
Iyo agak hangek badan ambo

Ambo minum aia karambia mudo
Nan bacampua talua ayam
Barisuaknyo taraso agak cegak
Dek rusuah maliek ayah sakik
Indak lai ado nan taraso..

”Mano lah Adjak Tuangku Mudo
Ado mah juo Tuangku kanai
Untuang iyo indak tapek bana
Tapi elok ditaruihkan garan
Iyo maminun aia karambia
Usah Tuangku mandi di pancuran
Seka sajo badan Tuangku
Eloknyo juo aia hangek kuku
Usah bapaneh jo barangin
Naiak kudo ilakkan dahulu.”

Bakato kini Sutan nan Gadang
”Manolah Adjak Mambang Langik
Usah adiak ka lua rumah
Unyikan sajo ayah kito
Bia kami nan batigo
Iyo pai mancari ubek
Salain bungo tujuah ragam
Dek bungo tu iyo ditanam
Di rumah andeh Rubiah.”

Bakato kini Kasumbo Ampai
”Antakan ambo dek si Lelo
Bia ambo nan mamintak
Indak kan amuah inyo garan
Maagiah ka nan mudo-mudo
Sabab barang itu ubek bana
Ubekuntuak mambuek pakasiah.

”Dek itu kami indak amuah
Pai mamintak mah ka sinan
Labiah-labiah daun salasiah
Sadang dibali inyo ndak amuah
Kok kunun pulo lai diminto.”

Bakato Dukun sambia galak
"Daun salasiah tu Tuangku
Kok sakada utuak ureh sajo
Buliah diganti itu garan
Iyo jo daunrasam tabiang
Tapi kok utuak ubek nan lain
Indak doh ado panggantinyo
Dek itu acok urang pakai
Iyo siriah sakapua sajo
Tapi iko ko jarang mampan
Talabiah dek urang laki-laki."

Bakato kini Andeh si Mambang
"Mano kakak Tuangku Rajo
Kok Si Dukun iyo bakandak pulang
Elok kito makan kini-kini
Sabalun malam laruik bana."

"Kito patang ko baru makan
Suruah Kak Dukun sajo makan
Ambo iyo kanyang baru
Baok kamari carano siriah
Ambo makan siriah sajo
Mangawani Kak Dukun makan nasi."

Lah sudah Dukun ko minun makan
Inyo pulang dianta Sutan nan Gadang
Batanyo Tuangku Rajo kini
Iyo kapado Mambang Langik
"Manolah Buyuang anak Ayah
Anak Ayah si Mambang Langik
Ka mano garan kalian pai
Malalui rimbo nan gadang
Mangapo ka rimbo lalu
Labuah lah banyak kida kanan."

Ayah pai ka Palimbayan
Ambo diajak mangawani
Ayah iyo pai baralek

Bapak di sinan Rajo nagari
Baralek ketek baliau garan
Mangawinkan anaknyo nan tuo sakali.”

”Tuak Tungga garan nan baralek tu
Mangapo Ayah ko indak diundang
Ayah ko lai tah u jo inyo
Inyo acok datang ka mari.”

Manuruik kato Ayah ambo
Undangan indak pada rajo
Tapi kawan karik sajo
Dek aleknyo indak doh gadang
Ayah pai bapakaian biaso
Indak mamakai kabasaran
Sarupo adaik rajo-rajo
Dek ambo baitu juo.”

”Tapi sungguahpun baitu
Indak patuik itu garan
Inyo pai sajauah itu
Indak maagiah ambo tahu
Iyo indak doh izin rajo
Tapi iyo izin kakak kanduangnyo

Urang pangganti Ayah jo Andehnyo
Dek inyo ketek baru
Ditingga kan urang nan baduo.”

”Mungkin dek Liau katulahan
Mangko sakik sapayah iko
Ayah mahapkan ayah ambo
Nak lakeh baliau cegak
Kito mah iyo kan baralek
Ayah sakik saroman iko.”
”Indak doh lamak parasaan
Talabiah kami nan baduo
Si Kasumbo sarato Ambo
Tapaso galanggang diunduakan

Kok indak cegak inyo garan
Iyo sabulan duo nangko.”

Pado malam samalam i tu
Indak doh pulang Tuangku Tumangguang
Baitu Kasumbo sarumah tanggo
Urang lai mah bagolek
Tapi indak tatiduakan
Dek mandanga arang Sutan Panjang
Si Kambang, si Hindun kida kanannyao
Tiok sabanta itu garan
Mangganti tampah di kapalo
Sarato ureh kaki tangan
Maagiah aia minum sasudu-sudu
Aia nasi nan diberikan
Diagiah bagulo mah saketek.

Indak carito dipanjangakan
Sapuluah hari Sutan Panjang
Mamakai ubek Dukun Sati
Baru panyakik barangsua pai
Baru nyo dapek iyo dangai
Mangecek saktetek-saketek
Indak lai angguak geleng sajo
Makannyao iyo bubua juo
Tapi alah agak banyak.
Dalam hari nan sapuluah
Rajo datang tiok hari
Iyo sabanta-sabanta sajo
Anak bininyo turuik pulo
Si Reno Intan iyo garan
Baitu Sutan nan Gadang
Manatok di sinan sapuluah hari tu
Basamo Kasumbo jo Kambang Aruih
Si Sutan Mudo Tungkek Nagari

Indak nyo lalok mah di sinan
Dek karajo banyak juo
Tapi barulang jo ayahnyo
Banyak di sinan dari di rumah

Minun makan di sinan juo
Di rumah indak ado nan mauruih
Inang jo dayang sakahandaknyo.

Dalam sahari nan sapuluah tu
Bia indak ado nan basuko
Ndak ado galak nan badarai
Banyak tangih dari galak
Talabiah hari nan limo
Hari nan limo mulo-mulo
Karajo banyak dihadoki
Indak doh untuak rang pambantu
Puti jo Sutan nan karajo
Bagalau sajo tuok hari
Sanyum ka kida jo ka kanan
Ado juo mah saketek
Talabiah sudah limo hari
Dek nan sakik alah mah tatidua
Babisia-k-bisia-k nan manjago.

Alah tahu si Kambang kini
Baitu pulo mah Andehnyo
Iyo urang Kasumbo Ampai
Apo makasuik Sutan Panjang
Iyo pai ka Palimbayan
Sutan Mambang nyo bacarito
Kapado urang baduo ko
Sapatah-sapatah nyo sabuik
Indak doh duduak atau tagak
Nan lain indak buliah tahu
Bia si Hindun atau Andehnyo
Indak sato barasio ko.

Nan barundiang si Mambang garan
Barundiang sambia bagolek-golek
Di biliak gadang tampeknyo lalok
Di rumah sabalah suok garan
Iyolah rumah pambujangan
Iyo jo Sutan Majo Lelo
Babisia-k-bisia-k nyo mangecek

Karano Sutan-Sutan lain
Anak Tuangku Datuak Tumangguang
Nan tigo baleh urang tu
Iyo barulang ka rumah tu
Banyak pulo nan lalok di sinan.

Tasabuik *Sutan Sari Alam*
Anak Rubiah Reno kayo
Inyo rancak tampan pulo
Bakasukoan tampaknyo dangai
Iyo jo Puti Reno Intan
Sajak si Reno yo mandanga
Hati si Sutan Majo Lelo
Iyo maadok itu dangai
Pado si Upiak Hindun Sari.

Katiko inyo ditanyoi dangai
Dek urang Mandeh Rubiah
Jaweknyo iyo pendek sajo
"Kok iyo Kakak Sari Alam
Amuah jo urang rantau nangko
Urang buruak indak baroman
Indak pulo bakapandaian
Manarimo suko ambo garan
Untuak apo urang dipaso
Iyo manjadi suami ambo
Urang nan kasiah ka nan lain
Urang indak sayang jo ambo
Indak tacinto doh dek ambo
Untuak manjadi Andeh Suri
Kok kakak Majo Lelo garan
Iyo manjadi rajo isuak."

Mandeh Rubiah bagadang hati garan
Kan baminantu anak rajo
Rajo urang nan nyo sayangi
Nan sayang pulo mah kainyo
Pucuak nyo cinto ulam tibo
Inyo acok kini datang maliek

Iyo maliek Sutan Nan Panjang
Mambaok makanan nan katuju
Iyo garan dek urang sakik
Sarato makanan untuak nan manjago
Inyo dianta mah jo kudo
Dek si Buyuang Sari Alam
Lah dapek bana dek si Buyuang ko
Hatinyo Pati Reno Intan
Dek Rajo alah pulo tahu
Acok inyo mangecek baduo
Gadanglah hati Kambang Aruih
Sarato kakaknyo Majo Lelo.

Mandeh Rubiah itu garan
Maagiah maso nan elok
Untuak anaknyo Sari Alam
Basuo jo Puti Reno Intan
Dek itu iyo dapek pulo
Si Sutan Majo Lelo garan
Agak dapek nyo datang
Iyo jo Upiak Hindun Sari
Mamaknyo Datuak Tumangguang Sati
Indak lai mangharokkan inyo
Untuak anaknyo Reno Intan.

Acok urang nan baduo ko
Iyo manjago Sutan Panjang
Surang di kanan surang di kida
Dibiakan sajo dek nan tuo-tuo
Kok takalok mah si Hindun
Tangannya di badan ayahnyo
Dipacik arek dek si Lelo
Kok inyo basalisiah jalan
Iyo dalam Rumah gadang ko
Inyo bapacik tangan
Indak nyo tahu rang maintai
Urang maintai dari jauah.

Nan maintai itu garan

Iyo Bujang nan Sambilan
Dek inyo salalu sinan
Salamo Ayah ketek sakik
Iyo indak makali kasadonyo
Hanyo baduo atou batigo
Tapi itu cukuik garan
Untuak inyo mambuek heboh
Urangko indak manyangko
Baso si Majo jo si Hindun
Nan alah pasiak pulo kini
Dek kaduonyo urang tanang
Kaduonyo punyo lauik tanang
Indak bariak salamo ko
Kok kini pulo bagalombang
Nan kanai tduah iyo si Mambang
Si Mambang jo Puti Kambang Aruih
Buruak kecek banyak gunjiang
Nan dibebekan urang banyak
Kapado urang baduoko.

Urang ko iyo samo rusuah
Talabiah si Kambang Aruih
Kok pendek tasuo dek Sutan Panjang
Indak ado urangkan manolong
Rancano jo Tuangku Datuak Tungga
Indakkan dapek dilangsuangkan
Acok pulo itu garan
Inyo maraok ka dado mamaknyo
Sambia manangih taisak-isak
Kadang dibujuak dek si Mambang
Tangannya sajo dicium kasiah
Iyo dek urang Mambang Langik
Indak doh panah pipih jo bibianyo
Acok pulo mah tasuo
Batigo inyo manjago
Kasumbo Ampai sabalah kanan
Si Kambang sabalah kida
Si Mambang mauruik kaki
Wakatu itu mah nan acok

Si Kambang maratok ketek
Urang baduo manangih pulo.

”O Mak kanduang tumpuan Upiak
Dek dahan tampek bagantuang
Iyo tanah tampek bapijak
Kok nyo sakah inyo taban
Ka mano Upiak kan maraok
Ka siapo Upiak kan mangadu
Kakak Upiak alah mah tanang
Mamunguik ameh sabungka

Upiak manggapai ka awang-awang
Handak manjangkau buah tenggi
Indak ado urang manolong
Mamak kanduang tampek Upiak harok
Usah Upiak mamak tinggakan.

Untuak apo Mak Rancak Upiak
Untuak apo pandai Upiak
Kok kan makan hati saumua hiduik.

Takadang kok Tuangku Rumah Panjang
Sadang sada nyo sabanta
Inyo sato,pulo manangih
Mabuek berang Kasumbo Ampai
Pado anaknyo Kambang Aruih
”Kok baitu juo kau buek
Indak maubek Mamak kau
Manambah rusak hatinyo pulo
Indak buliah di siko lai
Pulang kau jo Ayah kau
Sanang mamakiak ateh anjuang
Indak ado urang mandangakan.

”Manolah Amai Sayang ambo
Usah inyo diberangi juo
Indak doh rusak hati Ayah
Mandanga inyo maratok tu

Kok inyo Amai suruah pulang
Iyo kan rusak itu beko
Lauik ko iyo Amai sayang
Iyo kan kami sabarangi
Biduak nan tido tampak pulo
Kok Buyuang garan iyo kini
Nan padusi iyo caro inyo
Mungkin itu pulo karajo ambo
Manangih pagi jo patang
Liek dek Amai bakuliliang
Urang iyo bagadang hati
Ayah Tuo, Andeh Rubiah
Bamain di Anjuang Paranginan
Hampia tu garan tiok hari
Antah apo nan dirundiangkan
Baduo sajo nyo di ateh
Kak Majo Lelo rang pandai
Bagalauik jo si Hindun Sari
Kadang di muko mato kami
Indak lai tampak pandiam nyo
Sari Alam apo nan lai
Barani duduak baduo
Iyo di rumah pambujangan
Urang nan masuak tiok sabanta
Adiak kakak dek Reno Intan
Kami iyo manggigik jari
Taragak ambo mah mancium
Aia mato si Kambang Aruih
Inyo salalu mailakkhan garan
Takuik kok ado rang maintai
Jo ratok ko nyo mangecek
Kok kami manjago ayah
Siang hari banyak nan kan manjago

Kami lai indak bakarajo
Tapi indak dapek manyisiah diri
Dek bapuluah urang nan datang
Dari pagi lalu patang

Malam-malam ado nan maintai
Ado nan duduak di bawah rumah
Satantang lamen tampek ayah ko.”

Lah agak cegak Sutan Rumah Panjang
Lah amuah makan nasi bulek
Lah dapek dibaok mangecek
Barundiang liau jo Majo Lelo
Tantang utang padu Dukun Sati
Kok bareh lauak untoak kanduri
Dapek ibininyo mangaluakan pitih
Banyak pitih pambaokan urang
Manti Pangulu, rang kayo-kayo
Saudaga jo rang bakadai garan
Nan ado di Koto Tujuah
Abih baragiah kasadonyo.

Sasudah rundiang nan bak itu
Inyo sampaikan itu garan
Iyo hasia karajo nyo
Nan pai ka Palimbayan
Basuo jo *Datuak Tungga*
Tuak Tungga urang Palimbayan
Iyo rajo nagari tu
Taaluak ka Paga Ruyuang juo
Indak doh urang kayo bana
Tapi ruponyo anggun jayo
Tampan takah dipandang mato
Putiah kuniang bak padusi
Kapado inyo Mamak mintak
Kok amuah kawin jo si Kambang
Iyo untoak satahun sajo
Sudah satahun nyo caraikan
Si Mambang indak kan kawin
Kok indak jo si Kambang ko
Baitu sumpah dibueknyo
Bia si Kambang alah jando

Alah baranak pulo ciek
Indak kan baapo dek nyo garan
Kito suruah malah si Kambang
Mamiliah Tuangku Datuak Tungga
Dalam galanggang itu isuak
Kito lalaikan iyo kawinnyo
Batumangan agak satahun
Buliah kito mandapek pitih
Untuak panabuiih Kambang Aruih
Dari tangannya Datuak Tungga
Bia inyo indak mamintak
Tapi adaik itu Buyuang
Sabagai pulo itu garan
Alek wakatu kawin nanti
Iyo kito nan manangguang
Inyo cuman maanta pitih
Barapo takao di hatinyo
Iyo dek kito nan bakandak
Kito ndak buliah mintak tolong
Kapado Rajo Mamak Buyuang
Dek kito alah pancang galanggang.

”Ampunlah Buyuang Mamak Kanduang
Alah koh tahu Kambang Aruih
Iyo rancangan nan baiko
Adokah inyo samo suko
Paja ko gadih tagilan-gilan
Payah bana itu garan
Inyo manarimo kabananan
Dek itu acok kanai berang
Iyo dek Andeh sarato Ayah.”

”Dek itu mangko Ayah suruah
Si Mambang mambanarinyo
Mungkin alah disabuik nyo
Tapi makalum urang nangko
Takuik bana nyo mangecek
Mangecek baduo-duo

Dek Bujang nan sambilan
Taruih maintai siang malam
Elok juo sabuik dek Buyuang
Bakeh si Upiak Andeh Buyuang
Sarato *Datuak Gampo Bumi*
Tapi paralu barasio bana
Indak buliah ado urang tahu
Salain kito nan baranam
Urang nan baduo ko
Suruah maumbuak Kambang Aruih
Amak inyo manuruik kato.”

4. Galanggang Puti Kambang Aruih.

Galanggang dibuek di Ustano
Ustano lamannya laweh
Balerong untuak urang datang
Iyo ditambah duo sajo
Undangan indak banyak bana
Sutan manantik alah banyak
Galanggang ado kan ramai juo
Sagalo anak Tuangku Rajo
Tigo baleh mah banyaknya
Mambang Langik jo Sari Alam
Turuik polo masuak galanggang
Jadi urang panarimo halek
Rajo Janangnyo Tuangku Rumah Panjang.

Tasabuik Tuangku Datuak Tungga
Duo hari galanggang kan dimulai
Alah mah datang inyo garan
Sarato pandeka jo pangulu
Limo urang kasadonyo
Inyo masuak laman Ustano
Mairik kabau gadang gimpaa
Baagiah palano kain upiah
Tanunan urang dari Hindu
Pakaian Tuangku ko sandiri
Sarato ampek pangiriangnyo
Iyo mah rancak-rancak pulo
Tanunan dari Taranggano
Urang rancak pakaianyo rancak

Iyo tacenai dari jauah
Rajo Sutan dari nagari lain
Alah ado nan maikiknyo
Ado nan gapuak *gampa* bana
Ado nan randah rindin amek
Ado nan tenggi *janjang talang*
Ado nan kuruih *sigai anau*
Tulangnya nampak batabaran
Tulang mukonyo sagi tigo
Ado juo nan tenggi samampai
Tapi *loyo* bawaannya
Saroman urang kurang makan
Cu'kuik banyak urang nan datang
Ado juo mambaok kabau
Sarato jawi sikua surang
Mungkin dusanak Gampo Alam
Urang nan datang dari Agam.

Pado hari nan alah ditantukan
Lah masuak urang ka galanggang
Mangapik ayam sikua surang
Bamacam-macam pakaianyo
Sumarak tampak galanggang ko
Sutan manantik banyak pulo
Iyo rancak kasadonyo garan
Pakaianyo indak sambarangan
Alah mah tagak Tuangku Tumangguang
Rajo Janang di sabalah kanan
Tungkek nagari di sabalah kida
Babarih alek kida kanan
Turunlah kini Kambang Aruiah
Dari Anjuang Ustano Rumah Gadang
Jalannya siganjua lalai
Lalu di dapan rang babarih
Diiriangkan Puti nan Batujuah
Di dahului Andeh Suri
Sarato Andehnyo Kasumbo Ampai
Katigo Mandeh Rubiah

Manuju Anjuang Paranginan
Nan dibuek di ujuang laman
Dek Anjuang Paranginan Ustano
Tenggi bana itu garan.

Disusun si Kambang mah jarinyo
Iyo tantang dadonyo dangai
Tasanyum inyo kida kanan
Manih sanyumnyo bak tangguli
Lamak manih bak santan pakek
Tagilo bujang nan maliek
Talabiah si Tuo Datuak Tungga
Alah di bibia tapi cawan
Indak manyangko nyo mulonyo
Sarancak itu anak urang
Nan diadokkan bakeh inyo
Indak disabuik dek Sutan Panjang
Kamanakannya iyo rancak bana.

Lah naiak kini puti-puti
Lah duduak di ateh anjuang
Maadoki rabab jo kucapi
Sarato canang jo talempong
Iyo rabano sarato gandang
Galanggang dibukak Rajo Janang
Nyariang kareh suaronyo.

”Mano Tuangku sanak saudaro
Datang dari jauah jo dakek
Batarimo suko kami nangko
Sanak lah namuah samo datang
Mamuji langik jo bumi
Kami iko kasodonyo
Urang nagari Koto Tujuah
Talabiah Tuangku Rajo kami
Iyo Tuangku Datuak Tumanguang Sati
Mamak Kanduang dek Kambang Arujih
Urang nan dicarikan tunangannya
Anak kami lai mah banyak
Inyo mancaliak kanan lain

Dek itu kami mancang galanggang
Indak doh uuntuak baso basi
Iyo uuntuak samando kami
Manjadi ayah cucu kami
Kok langik jo bumi maizinkan
Urang kan ganti rajo isuak.

Sabagai pulo tu Tuangku
Sarato dansanak Rajo jo Sutan
Kok kurang di hati panarimaan
Atou tampek minun jo makan
Mahapkan kami tantang itu
Dalam taruah jo pamaianan
Sarato silang jo salisiah
Iyo antaro halek kami
Usah malah sudahi surang
Agiah tahu kami sipangka
Dek ambo iyo nan tuonyo
Kok ado ayam nan kalah
Lah jaleh ka mati inyo garan
Tolong malah disambaliah
Buliah dagiangnya kito makan
Usah bangkai nan batimbun
Payah kito dek baunnyo.

Salain itu iyo sanak
Mamintak kami ka nan rami
Kok main silek jo sanjato
Usah dipakai barang pusako
Nan baipuah di matonyo
Babunuahan kito di galanggang
Malu gadang tibo di kami
Nan kalah maangkek sambah
Nan manang usah mancido
Taruah latakan padu kami
Kami mambayia ka nan manang.
Galanggang kito mulai
Dari mato hari naiak
Patang hari kito sudahi

Katiko tagalincia matohari
Nasi tahidang di Balerong Sari
Buliah dimakan surang-surang
Buliah juo basamo-samo
Buek hari patamo ko
Kito makan di Ustano
Iyo basamo kasadonyo.
Kok ado nan bakandak
Iyo tahadok anak kami
Talangkai kami tarimo
Pabilo sajo didatangkan
Mamiliah iyo anak kami
Pado hari nan katujuah
Kok alun jaleh dek nyo garan
Kito nantik tujuah hari lai
Putusan pado hari katigo kali tujuah
Indak galanggang lamo bana
Sampai babulan itu garan
Kok dalam duo puluah satu hari
Indak inyo mamiliah juo
Bapikia kami nan tuo-tuo
Siapo garan nan kan ditarimo
Dalam talangkai itu nantik
Jiko talangkai indak ado
Buruak nasibnyo anak kami
Bapikia pulo kami isuak
Sasudah tigo kali tujuah
Apo nan kan kami lakukan
Ambo Sudahi kini sambah
Ambo tarimo siriah sanak

Siapo garan nan bakandak
Maliek si Kambang dari dakek
Manyapo inyo sapatah duo.

Tantang alek nan banyak tu
Indak barabuik nyo garan
Handak manyapo si Kambang Aruih

Nan duduak maribo kacapi
Bunyi lagunyo sayuik-sayuik
Urang nan manang mah ayamnyo
Malakik mancari lawan lain
Maantakan carano ka Rajo Janang
Di lua siriah ado ameh
Atou mah iyo galang subang.”

Lah datang Rajo dari Tiku
Tampan elok parawakannya
Tapi salahnyo agak capuak
Tasanyum inyo bakeh si Kambang
Sambia bapantun maso itu.

Sikaduduak baok lah taruih
Ka kampuang langsek di sa barang
Batang capo dipanjek cacak
Elok duduaknya Kambang Aruih
Urang bangsaik bangsopun kurang
Datang mnyapo gadih rancak
Tasanyum si Kambang Aruih
Baranti inyo bakucapi
Alun lai inyo nak manjawek.

Batang capo dipanjek cacak
Lah runduak batang jo daunnya
Datang manyapo urang rancak
Dek mabuak maliek iyo sanyumnya.

Daun manggih agiah batali
Dikabek basamo daun pulai
Sanyum manih Diak sakali lai
Panguaikkan hati manalangkai.

Manyuruak di bawah batang manggih
Tapijak bangkai anak cacak
Awak buruak indak bapith
Nak manalangkai gadih rancak

Bungo masiak di ateh daun
Daun salasiah daun taleh

Gilo pasiak maliek sanyum
Adokah kasiah kan babaleh.”

Tasanyum si Kambang Aruih
Pantun dibaleh maso itu.

”Indak kami mancabuik capo
Daun salasiah nyo malayang
Indak kami mamiliah rupo
Kami mangharok kasiah sayang.”

Tagalak urang dari Tiku ko
Batapuák urang bakuliliang
Nan mandanga inyo bapantun
Si Kambang babaliak bakucapi.

Ado sabanta antoronyo garan
Datang Sutan surang lai
Urangnyo iyo randah rindin
Tapi kok galak iyo manih
Pakaiannya iyo rancak pulo
Urang nan datang dari Koto Tuo.

”Anak cacak di dalam padi
Taguliang tabuang minyak manih
Tumpah pado daun capo
Urang rancak caliak juo kami
Sunggiangkan sanyum galak manih
Urang rancak sanyum galak manih
Urang randah handak manyapo.”

Baranti si Kambang main kacapi
Maliek inyo josanyum manih
Talonjak Sutan mamandangi
Bapantun inyo ciek lai.

”Bukan tumpah sambarang tumpah
Tabayak minyak ka daun capo
Taguliang ka dalam padi
Bukan randah sambarang randah

Awak randah bangso juo randah
Bapaliang urang malieki.”

Manjawek kini Kambang Aruih.

”Tumpah minyak ka daun capo
Usah tumpah ka ateh padi
Randah badan Kak indak mangapo
Asa mah iyo randah hati.”

Galak badarai Sutan nangko
Babaliak inyo ka tampek manyabuang
Indak doh langsuang maanta siriah
Iyo kapado Rajo Janang.

Ado sabanta antaronyo
Lah datang pulo surang lai
Takajuik mato Kambang Aruih
Nyo sangko mulonyo Mambang Langik
Iyo datang mambaok kato
Alah gak dakek itu garan
Gadang tengginyo samo bana
Iyo jo Sutan Mambang Langik
Putiah kuniang samo pulo
Bak urang kamba jo si Mambang
Hiduangnyo pipih samo manih
Sanyumnyo baitu pulo garan
Hanyo giginyo labiah gadang
Tapi rancak bak diatak
Dari jauah nyo lah galak

Tasirok darah Kambang Aruih
Agak tasirah mah mukonyo
Manambah rancak sanyumnyo garan
Dilayangkan pandangan bakuliliang
Tampak si Mambang nyo mandakek
Mamakai baju biru lauik
Urangko mamakai sirah hati
Di sinan cuman bedonyo.

Basubok pandang keduonyo

Iyo urangko jo si Kambang
Urangko manantang habih
Si Kambang lakeh manakua
Tadanga kini pantun urang ko.

Sakali tateh talang putuih
Ambiak sakarek kan parian
Adiak banamo Kambang Aruih
Ambo Kambang bunyo durian.

Ramo-ramo di dalam rumpuik
Tabang kini ka dalam padi
Samo hanyuik kito ka lauaik
Mari kini kito ka tapi.

Di padi kini nyo malayang
Padi punyo rang Pantai Camin
Mari Andiak marilah sayang
Samo duduak kito ka lamin.

Ka tabiang Diak kito ka tabiang
Ka tabiang dakek pandan batang
Basandiang Diak kito basandiang
Iyo basandiang bulan datang.

Urang Rao nak ka Kinari
Mambaok gagak jo tampuo
Alah lamo Diak kakak mancari
Kini nan baru kito basuo.

Usah dibungkuih dalam kain
Bungkuih jo pandan dilanduangkan
Usah dipilih urang lain
Adiak tunangan daii kanduangan.

Manjawek kini Kambang Aruih
Mandakek si Mambang mandangakan.

Bungo sitawa baru kambang
Tumbuah di dakek rumpun padi
Usah ditateh dicampakkan

Bungo mawa mananti kumbang
Lah datang garan kumbang janti
Mangapo pulo digalakkan.

Mandanga pantun si Kambang ko
Tapuak bagalu maso itu
Si Mambang agak tasunguik
Da tuak Tungga sirah mukonyo
Si Kambang bapantun ciek lai.

”Gagak tampuo dalam padi
Dek rang tuo sadang basiang
Manyabik indak inyo lakukan
Kakak tasuo dalam mimpi
Upiak tajago hari siang
Kiniko langik patamukan.

Tapuak tangan mangkin manjadi
Si Mambang maninggakan galanggang kini
Tampak jaleh dek si Kambang
Inyo mamandang ka urang nan manyapo
Sambia tasanyum lamak manih
Agak lamo urangko manantangnyo
Malangkah pai inyo tataku
Tampak koh itu dek nyo garan
Mato si Kambang malayang jauah
Inyo lai mandanga bisiak-bisiak
Si Kambang alah batunangan

Tapi indak buliah kawin
Dilarang Rajo mamak kanduangnyo
Tapikia dek inyo maso itu
Kok inyo iyo tapiliah
Pandailah inyo isuak marayu
Amak si Kambang malupokan tunangannya.

Si Kambang iyo tapikia pulo
”Lai camburu kakak Mambang
Upiak marayu urang lain
Langik jo bumi kak jadi sasi

Hati Upiak indak barubah.”

Urang cako iyo garan
Nan manamokan dirinyo Bungo Durian
Langsuang p'ai ka Rajo Janang
Mambaok siriah di carano
Barisi ameh lai satahia
Tampak haroknyo itu garan
Inyo masuak ka balerong ketek
Dituruukkan si Mambang jo matonyo
Manggigia raso badannya
Lintuah tulangnya maso itu.

Sasudah pai urang nangko
Masuaklah pulo Datuak Tungga
Basuo jo Rajo Janang
Mamintak inyo maso itu
Supayo galanggang ditutuik dahulu
Alah tagalincia matohari
Barisuak dibukak pulo
Inyo mamintak nan patamo
Iyo manyapo Kambang Aruih.

Tugalak kini Sutan Panjang
”Usah lai sanak cameh pulo
Si Kambang alah bajanji arek
Iyo mah sanak nan dipilih
Takuik malah inyo ka ambo
Kok inyo maubah janji.”

”Manolah sanak sutan Rumah Panjang
Bak ambo katakan patang
Mulonyo ambo amuah sajo
Dek maagak hati sanak
Kito bakawan dari mudo
Indak tatariaik ambo garan
Nak pulang ka rumah lain
Bini ambo sayang ka ambo
Ambo iyo kasiah ka inyo
Tapi kini ko iyo sanak

Ambo iyo kan berang bana
Kok inyo mamiliah urang lain
Ambo lah gilo pasiak kini
Ingin mamaluak urang rancak
Bia samalam duo malam
Nak lapeh dandam birahi
Kunun satahun duo tahun
Sarupo nan dijanjikan
Katokan kawan pado inyo
Iyo si Upiak Kambang Aruih
Ambo amuah mambunuah urang
Kok inyo mamiliah pajak cako.”

”Manolah kawan Datuak Tungga
Usah bapikia nan bukan-bukan
Sanak lah tahu rasionyo
Pajako iyo kambang Aruih
Alah basumpah jo si Mambang
Si Mambang anak kanduang ambo
Surangko sajo anak ambo
Iyo banamo laki-laki
Surang tu pulo kamanakan ambo
Iyo kamanakan nan padusi
Nan banamo si Kambang Aruih
Kaduonyo sayang bakeh ambo
Kasiah sarato tunduak patuah
Kok si Kambang mamiliah nan cako
Manggigik jari anak ambo
Anak ambo si Mambang Langik.”

”Kok baitu kato sanak
Sananglah pulo hati ambo
Dapek ambo samalam beko
Tidua lamak mamimpinkan inyo.”

Tasabuik pulo Mambang Langik
Dicarinya Kasumbo Ampai
Manangih inyo dipangkuan
Maratok inyo maso itu
”Manolah Amai sayang Buyuang

Adokah tadanga dek Amai cako
Pantun si Kambang adiak ambo
Kapado paja nan rancak tu
Nyo manyabuik nyo mamimpi
Kok itu dari hatinyo
Inyo mamiliah paja tampan tu
Manjadi rang gilo Buyuang Amai
Buyuang ambiak padang panjang
Buyuang rambah urang di galanggang
Buyuang manjadi harimau campo
Buyuang rangkah kapalo anak urang tu.”

”Mano nak Buyuang anak Amai
Si Kambang kito lah tahu juo
Pandai mangecek yo marayu
Indak doh itu di hatinyo
Muluiknyo iyo agak lancang
Indak tahu urangkan tasinggung
Mamaknyo Tuangku Rajo Gadang
Ditakuik urang kasadonyo
Lamak sajo disindianyo
Di dapan kito basamo-samo
Untuang mamaknyo sayang kainyo
Indak barubah doh romannyo.”

”Tapi elok Amai katokan juo
Suruah agak hati ambo
Disangkonyo sanang ambo garan
Mancaliak inyo jadi tumpuan
Tumpuan mato urang banyak
Bak matchari sadang tabik
Mamanca cahayo bakuliliang
Alah saba ambo garan
Amuah baralah duo tahun
Manyarahkan gadihnyo ka Tuak Tungga
Lain pulo nan disabuiknyo.”

”Amai katokan beko garan
Sabalah Buyuang tantang itu
Usah Buyuangkusuak kasak

Tampak pulo dek musuah Buyuang
Lain puol nan tasuo.”

Barisuak hari pagi-pagi
Baru sajo galanggang dibukak
Si Kambang juo baru turun
Urang alun lai manyabuang
Mamintak kini Datuak Tungga
Handak manyapo si Kambang Aruih
”Manantik sanak sakutiko
Usah tampak harok awak
Malu kito rang tuo-tuo.”

Tasanyum garan Sutan Panjang
Maliek roman Datuak Tungga
Garambeh, jangguiknyo inyo cukua
Sunguiknyo tingga mipih sajo
Sapuluah tahun inyo, garan
Labijah mudo dari biaso
Mukonyo iyo inyo badaki pulo
Bibianyo sirah dek makan siriah
Mungkin iyo siriah pakasiah
Si Kambang makan siriah juo
Siriah pakirim Sutan Mambang
Nan dimanto (ditawanyo) surang
Indak inyo pai ka dukun.

Alah sabanta antaronyo
Tampak si Kambang bakucapi
Puti nan lain lah main pulo
Pado alaik surang-surang
Badendang Mandeh Rubiah
Mandeh Rubiah Reno Kayo.

”Cari, iyo si Kambang cari
Usah dicari ka nan langang
Cari sajo ka nan rami
Cari, iyo si Kambang cari
Usah dicari masuak rimbo

Atau ka lauaik nan barombak
Cari mah sajo ka galanggang
Cari,yo si Kambang cari
Usah dicari dalam pakan
Di mano galak nan badarai
Di mano tapuak nan bagalau
Iyo ka sinan Kambang cari
Cari yo si Kambang cari
Carilah cari Kambang Aruih.”

Baru tu habih lagu Mandeh
Lah tagak kini Datuak Tungga
Iyo di dapan Anjuang Paranginan
Dakek bana padō si Kambang
Bakato inyo maso itu.

”Manolah Adiak Kambang Manih
Iyolah adiak Kambang sayang
Hantikan sayang bakucapi
Maliek padō rang manyapo
Kakak iyo ndak pandai bapantun
Pantun mudo kakak lah lupo
Dek umua kakak alah tuo
Tapi alun lai ampek puluah
Kakak mah iyo lakeh kawin
Surang tu juo sampai kini
Dari rumah kakak barangkek
Indak makasuik manalangkai
Sakada maanta bilalang sikua
Tando kami lai bakawan
Iyo jo Sutan Rumah Panjang
Disuruh Andeh kanduang kito
Iyo lah caro babaso basi.
Alah tibo kakak disiko
Iyo maliek roman Upiak
Maliek sanyum nan tasunggiang
Mandanga galak nan badarai
Taragak kakak nak manalangkai
Untuang ameh lai tabaok.

Mano Diak sayang Kambang Aruih
Piliah juo kakak Upiak ko
Lai kan lamo kito samo
Hiduik di dalam bakasiah sayang
Tigo limo umua kakak
Limo baleh umua Upiak
Kok kito baumua lapan puluah
Iyo ampek puluah limo lai
Lamo juo tu mah sayang.

Kok kakak indak Adiak piliah
Mungkin gilo kakak agaknya
Dek malam mato ndak amuah tidua
Nasi indak pulo talulu
Payah bana tu Diak sayang
Iyo manaruah kasiah sayang
Kok batapuak sabalah tangan.
Bajanji juo Upiak kini
Talangkai kakak Upiak tarimo
Bulan datang kito basandiang
Alah di tapak Diak tanggo lamin
Alah di bibia tapi cawan
Disusun jari nan sapuluah
Sabaleh jo batu kapalo
Manyambah kakak padu Upiak
Kakak cium jari kaki Upiak
Baitu harok kakak sayang.”

Tasanyum manih si Kambang garan
Bapantun inyo maso itu
Dangakan Kakak pantun Upiak.

”Babelok kak Koto Tuo
Nak lalu ka Simpang Ampek
Elok balaki urang tuo
Paruik Kanyang pangaja dapek.

Pisang kalek banyak akanyo
Batang lado banyak buahnyo

Urang gaek banyak sabanyo
Urang mudo banyak ulahnyo.

Pisang kalek dari subbarang
Buah lado ko panjang-panjang
Urang gaek uatuak awak surang
Urang mudo mato karanjang.

Mano Kakak dari Palimbayan
Bajanji malah kakak kini
Kok Upiak mamiliah Kakak
Upiak ndak namuah mah dimadu
Salain Kakak nan kini ko.

”Kok lai amuah bajanji
Kok Upiak mamiliah Kakak kinin
Indak malengong ka nan lain.”

”Mano Kakak janyo adiak
Ambo nan balun buliah mamiliah
Nantiklah tigo pakan lai
Jiko Upiak indak salah etong
Banyak lai urang di galanggang
Iyo nan ingin nyo dipilih
Dalam maso tigo pakan ko
Antah datang nan labiah tuo
Abuak putiah giginyo Ompong
Batumkek garan nyo bajalan
Tantu inyo nan Upiak piliah
Nasinyo iyo bubua sajo
Gulainyo iyo talua, gulai labu
Bajalan indak usah dikawani
Dek tungkeknyo lai ado.”

Mandanga kato si Kambang ko
Badaraau galak nan mudo-mudo
Nan batapuak ado pulo
Lah senjang tampak itu garan
Iyo sanyumnyo Datuak Tungga
Bagageh inyo babaliak ka balerong

Dijapuiknyo carano ameh
Diisinyo pitih banyak-banyak
Ameh pulo yo duo tahia
Indak kan ado nan maisi
Iyo ameh sabanyak itu.

”Manolah kawan Rajo Janang
Mintak janji ditapeki
Iko lai mah saketek
Ameh dari andeh kito
Tandonyo ambo manalangkai
Kok lah habih galanggang isuak
Andeh jo ayah kan ka mari
Buliah kaimi batimbang tando.”

”Sanak suko mambuhua janji
Alahmah gadang hati ambo
Sarato si Buyuang Mambang Langik
Si Kambang Aurih baitu pulo.”

Manjalang habih tigo pakan
Iyo banyak juo nan manyapo
Sudah manyapo manalangkai
Ado rancak-rancak juo
Tampan anggun bak Mambang Langik
Si Mambang indak camburu lai
Sumpah si Kambang dipaciknyo
Cincin alah batuka pulo
Dek si Kambang Aruih iyo garan
Urang-urang nan manyapo tu
Nyo adoki sapatuik nyo
Talago sanyumnyo indak kariang
Lubuak pantunnyo baitu pulo
Anam bulan inyo baraja
Iyo padu nan tuo-tuo
Andeh jo amainyo sato pulo
Maaja inyo bapantun tu
Sado urang diagiahnyo harok
Nan buruak ado imbuahnyo
Nan rancak ado cacek kurangnyo

Sanang hati urang nan manyapo
Lah habih harok kasadonyo
Pado satangah itu garan
Raso hari kan dicabiak
Nak lakeh habih tigo pakan
Talabiah garan iyo urang
Nan mangaku banamo Kambang Durian
Kurang inyo maadu ayam
Atau iyo bamain silek

Banyak urang nan maajak
Dek inyo iyo acok manang
Si Mambang juo kalah dari inyo
Inyo acok tagak dakek anjuang
Maliek taruuh ka si Kambang
Nan maadoki urang manyapo.

Lamo manantik kito garan
Iyolah hari nan taakia
Urang tagak basamo-samo
Dakek anjuang paranginan
Tuangku Datuak Tumangguang
Sarato Tungkeknyo Sutan Majo Lelo
Batigo jo Rajo Janang
Naiak ka ateh Anjuang Paranginan
Tagak abririk jo Andeh Suri
Sarato Adeh Kasumbo Ampai
Padusi Tuangku Rajo Janang
Barampek jo Mandeh Rubiah
Lah bih baririk kasodonyo
Di tangah iyo si Kambang Aruih
Bakato Rajo Janang kini.
Ampun Ambo Tuangku Rajo
Sarato sagalo alek kami
Kasiah sanak kami tarimo
Patamo iyo lai datang
Kaduo sato maramikan
Katigo taruah dari nan manang
Kami mandapek sabahagian

Kaampek dalam carano nan manalangkai
Kami dapeki ado ameh ado pitih
Iyo uantuak anak kami
Katiko sanak mulo-mulo datang
Adolah pulo pambaokan
Barupo kabau jawi kambiang
Untuak makanan rang di galanggang
Langik jo bumi kan mambaleh.

Sabanta lai iyo sanak
Si Kambang Aruih anak kami
Akan manyabuik itu garan
Siapo urang nan dipilihnyo
Untuak junjuangannya dalam hiduik
Basaba kito manantikan
Kapado kito kasadonyo
Talabiah pado nan manalangkai
Kok indak sanak tapiliah
Jangan malah baketek hati
Kito suruah inyo kini
Manyabuik siapo nan nyo piliah.”

”Ampun Mamak kaduonyo
Sarato Kakak kanduang Upiak
Juo mah Ayah nan di rumah
Sarato Andeh kasadonyo
Ambo sabuik kan kini nangko
Siapo urang nan ambo piliah.

Manolah Kakak kasadonyo
Nan manyapo manalangkai
Labiah mah garan tigo puluah

Kok buliah baapo nyo ambo
Kasadonyo nak ambo piliah
Nan iko rancak nan itu tampan
Nan buruak ado imbuahnyo
Nan rancak ado caceknyo
Ka nan iko Upiak iyo kasiah
Kan kawan duduak ateh lamin

Tapi kan nan surang lai sayang
Sayang pulo mah tatumpah
Kan kawan barundiang babicaro
Kian kasiah ka mari sayang
Payah bana Upiak mamiliah
Sasudah ditimbang di suok kida
Sasudah barundiang hati jo kapalo
Mupakaik mato jo talingo
Duo puluah hari Upiak manuangkan
Dita tokkan piliahon jo aia mato
Upiak piliah iyo garan
Kakak Upiak dari Palimbayan
Nan bagala Datuak Nan Tungga
Upiak ukua iko nan labiah panjang
Ditimbang inyo nan labiah barek
Mintak ampun mintak mahap 'Upiak
Pado Kakak nan lain-lain
Tarimo suko kasiah sayang Kakak
Upiak kanangkan saumua hiduik."
Indak ado urang nan tampak suko
Salain Datuak Tungga surang
Nan lain manakua yo mandaceh
Mandanguih sambia mambarunguik
Tamasuak Tuangku Datuak Tumangguang
Indak manyangko inyo garan.

Bakato kini Rajo Janang
"Mano sanak nan dari Palimbayan
Mintak naiak ka ateh anjuang nangko
Amak diliek sanak nan lain
Siapo urang nan tapiliah."

Lah naiak Tuangku Datuak Tungga
Inyo iyo indak galak
Tapi mancucua aia mato
Dek hati iyo sangek suko.

Inyo iyo disuruah tagak

Di dakek Puti Kambang Aruih
Indak doh babedo bana
Tampan jo rancak kaduonyo
Tapi dek umua babedo banyak
Banyak nan manyabuik salah piliah.

Bakato pulo Rajo Janang
"Manolah sanak kasadonyo
Mamintak mahap ambo sakali lai
Kok ado talabiah iyo takurang
Kiniko galanggang ambo tutuik
Kito baurak selo malah
Masuak Ustano nagariko
Nasi tahidang lah manantik."

Basalaman urang nan banyak
Iyo jo urang nan salapan
Lamo tampak Bungo Durian
Mamacik tangan Kambang Aruih
Tapi inyo indak mangecek
Inyo tampak naiak kudo
Indak sato naiak Ustano
Untuak makan basamo-samo.

Lah sudah makan jo minum
Urang barangkek anyo lai
Pulang ka kampuang surang-surang
Salain Datuak nan Tungga garan
Iyo urang nan surang ko
Mamintak pado Sutan Rumah Panjang
Nak singgah sahari duo
Ka rumah Sutan Panjang ko
Basuo jo anak jo bininyo
Tando inyo iyo bakawan.

Lah sahari inyo di sinan
Nyo mintak japuik Kambang Aruih
Jo rang gaeknyo mah sakali
Handak baretong manatokkan

Pabilo tando kan dianta
Iyo hari patunangan
Sudah itu pabilo pulo
Hari baralek pakawinan.

Malam-malam si Kambang dijapuik
Inyo naiak kudo jo ayahnyo
Andehnyo jo Sutan Majo Lelo.

Lah sudah minun jo makan
Mangapua siriah sakapua surang
Mambukak kato Datuak Tungga
Manolah Mamak Datuak Gampo Alam
Sarato Mintuo Kasumbo Ampai
Iyo Kakak Sutan Majo Lelo
Kaampek bapak Sutan Panjang
Jo Andeh nan di rumah ko
Kini ko ambo alah maraso
Ambo Sumando urang Koto Tujuah
Hati malambuang nyo ka langik
Sagadang Gunuang Tujuah nangko
Tapi cameh banyak pulo
Sabab itu ambo mintak
Karajo baiak dilakehkan
Usah disalo dek nan buruak.

Pabilo garan kami datang
Iyo ambo jo rang gaek ambo
Maanta tando itu garan
Mambuhua janji taguah satia.”

Manjawek Sutan Rumah Panjang
”Pabilo garan bakandak tu
Handak babaliak mah ka mari?“

”Kok kandak di hati ambo
Satiob ambo di rumah nantik
Ambo ajak ayah jo Andeh

Manyadiokan siriah di carano
Sarato barang nan kan tando
Dek nagari bajauahn
Indak doh kami kan banyak bana
Nan kan datang isuak iko
Kok alah ase sahari duo
Kami barangkek malah lai.”

”Kok nan datang maanta tando tu
Bagageh dusanak garan
Bakabek tantu jo talinyo
Bajanji iyo jo tando bukti
Tapi baralek nikah kawin
Mamintak kami bakeh sanak
Iyo saketek dilalaikan
Agak satahun itu garan
Nak kami baase mah dahulu.”

”Agak barek tu diambo
Manantik satahun lai
Adiak sayang lah raso dalam ganggaman
Sampai ambo manantikan
Ambo mintak tigo bulan lai
Cukuik hari untuak baase
Mangapo baralek gadang bana
Tantang balanjo itu garan
Kok ambo indak salah etong
Dalam galanggang kapatang ko
Lai mah banyak pitih masuak
Ambo iyo akan maagiah balanjo
Sambia maanta tando isuak
Maanta balanjo alek malah sakali
Buliah alek dapek digagehkan.”

Jujuik bajujuik maelo hari
Dari kaduo balah pihak
Ditatokkan malah garan
Salapan bulan sasudah tando

Iyo tando ditarimo garan
Urang baralek nikah kawin.

"Barisuak ambo mintak bana,"
Katomyo Datuak nan Tungga
Si Upiak tunangan ambo
Tingga di siko mah dahulu
Bisuak ciek lai ambo pulang
Indak doh ambo kan mamintak
Iyo duduak baduo sajo
Tasisiah dari nan lain
Asa lai dapek bapandangan
Mangecek sapatah duo patah
Untuak mamadu kasiah sayang
Dek basuo sakali ko baru
Cukuiklah itu untuak ambo.

Manuruik adaik kito juo
Kok alah batimbang tando nanti
Ambo indak buliah lai
Iyo basuo jo inyo garan
Malakik kami basandiang
Iyo tabendang nyo ka langik
Dibumi pulo tabarito.
Sabuah lai pintak ambo
Kini ko di hadapan basamo
Ambo pacik ujuang jarinyo
Ado mah cincin buruak sabantuak
Pusako dari Andeh ambo
Ambo pakai di kalingkiang
Mungkin sasuai di jari manihnyo."

?Pintak itu ka nan punyo badan
Alah mah sato nyo mandanga
Kok inyo suko manarimo
Tantu inyo tagak kini nangko
Manjalang urang pilihannya,"
Kato Sutan Panjang sambia galak
Badarai galak urang banyak.

Alah mah tagak Kambang Aruih
Inyo sambah dahulu Andeh Ayahnyo
Sudah itu Mamaknyo pulo
Baru nyo duduak itu garan
Di dapan Tuangku Datuak Tungga
Manarimo cincin dijari manih.

Barawari Datuak nan Tungga
Diambiaknyo cincin dari kalingkiang
Dielonyo tangan kida si Kambang
Dilingkakannya cincin pamato
Iyo kajari nan rancak tu.

Lah tagak kini Kambang Aruih
Nyo kilekkan cincin pamato intan
Ka sagalo urang nan duduak tu
Sudah itu inyo manakua
Agak lamo iyo garan
Aia matonyo mahujan labek
Lah basah muko jo baju
Iyo urang si Datuak Tungga
Sudah itu nyo pacik pulo
Majo Lelo kakaknya garan
Kudian inyo babaliak garan
Ka urang nan di sabalah Sutan Lelo
Iyolah Sutan Mambang Langik
Nyo latakan lutuang di pangkuan
Sambia manangih taisak-isak
Sudah itu Andeh si Mambang pulo
Sarato adiaknya Hindun Sari
Dihelonyo tangan Hindun Sari
Diajaknya lalok ka Anjuang
Indak nyo malengong lai.

Tamanuang urang nan tingga
Habih maapuuh aia mato
Alah mah rado hujan labek
Lah gak tarang pandangan mato
Bakato baliak Sutan Panjang

”Manolah sanak Datuak Tungga
Janji lahia alah dibuak
Lah lakek cincin di jarinyo
Janji batin mintak ditangguahkan
Adokah rela Sutan isuak
Mancaraikannya sudah stahun.”

”Ampun lah ambo dinan banyak
Talabiah Ayah jo Andehnyo
Iyo Mamak jo Mintuo
Kok alah lalok ambo jo inyo
Iyo samalam duo malam
Alah tu gadang mujua ambo
Bagai mandapek gunuang ameh
Kok kunun pulo lai satahun
Babaliak mudo ambo garan
Saelok itu paja nangko
Indak saketek ambo manyangko
Inyo kan mambueknan bak cako
Indak ado urang mendorong
Indak mah ado nan manyuruah
Usah lai nan mamaso
Iyo mah tabik di hatinyo surang
Ambo manyangko mah mulonyo
Inyo dipaso digagahi
Sakadauntuak urang banyak
Inyo manyarah inyo patuah.

Sabagai pulo itu garan
Adiak Mamcang lah ambo liek pulo
Barapo gadang kasiah sayangnya
Mangapo inyo kan ambo asab
Iyo labiah dari satahun.
Satahun itu mah lah lamo
Kito nan samo laki-laki
Tantu samo kan maraso.”

”Manolah Kakak Datuak Tungga
Jiko baitu janji Kakak

Batarimo suko ambo Kakak
Langik jo bumi kan mambaleh
Jaso Kakak itu garan
Pado kami nan baduo.”

” Baitu hino badan ambo
Ayah bangsaik Andeh ndak bapitih
Dek rupo indak mah balabiah
Sapuluah gaduh dapek dicari
Kok hati ambo iyo ka sinan
Tapi dek kasiah sayang ka si Kambang
Amuah mananti inyo rando
Kasiah talimpah dari Kakak
Tapi iyo kan ambo sabuik juo
Nan paik kito kunyah-kunyah
Amak nan manih dapek beko
Nyampang Kakak mungkiakan janji
Dek sayang Kakak bakeh inyo
Ujuang padang Kak pamutuih tali
Tagolek mayik salah surang
Baitu di ambo nan katuju
Langik jo bumi sasi ambo.
Sarato sagalo nan duduakko.

Sabagai pulo itu Kakak
Manjalang Kakak basandiang
Kakak jauah ambo di siko
Usah cameh Kakak garan
Ambo kan manggaduhan inyo
Dari ketek Kak kami basukoan
Mambuek janji ndak batando
Jo kato-kato lai indak
Kok kunun dangan pabuatan
Basumpah ambo dakek basamo ko
Alun panah sasek saujuang jari
Ambo manggisia badan inyo
Salain jari nan sapuluah
Katiko maagiah manarimo
Dek itu ambo cako ko

Indak dapek manahan hati
Raso kan pangsan ambo garan.”

”Picayo Diak ambo tantang itu
Kok tibo di bujang lain
Lah lamo inyo Adiak larikan
Antah ka rimbo antah ka lauik
Di mano napasu kan balapeh
Sarancak itulah urang
Iyo rancak lua dalam
Inyo tampaknya manyarah habih.”

Bakato kini Sutan Panjang
”Dek hari alah laruik malam
Balapeh arak kito dahulu
Mancari banta surang-surang
Manolah Adiak Gampo Alam
Sarato Puti Kasumbo Ampai
Tinggakan si Kambang sahari bisuak
Malam hari ambo antakan
Kok Buyuang Lelo nak di siko
Ado mah rumah pambujangan
Tampek Buyuang salamoko.”

Hari barisuaknya itu garan
Dari pagi sampai patang
Iyo dipakai dek nan mudo-mudo
Untuak bagaluik basando gurau
Di Anjuang Paranginan
Gilo bapantun baibarat
Iyo barabab bakucapi
Sarato badendang basinanduang
Babaliak mudo Datuak Tungga
Inyo iyo sagalo pandai
Indak kalah doh dek si Mambang.

Katiko hari alah sanjo
Lah kan pulang si Kambang garan
Kini indak manangih lai
Jo hati gadang nyo bakato,

”Barangkek lah sayang Kakak Upiak
Elok-elok Kakak bajalan.

Usah ado bala bancano
Lakeh juo Kakak babaliak
Baokkan campago jo inango
Minyak harum agak saboto
Kan tando kasiah Kakak sayang.”

Indak manjawek Datuak Tungga
Amak si Kambang indak mangecek
Aia amto nyo bacucuran

Si Kambang pai ka Mambang Langik
”Mano Kak Mambang kasiah Upiak
Kito mah iyo kan bapisah pulo
Salamo satahun salapan bulan
Dalam hati salintuah iko Kakak
Sadang sahari lai lamo
Kok konon labiah satahun
Turuikkan bayang-bayang Upiak
Usah Upiak Kakak lupokan
Takana Upiak siang hari
Pai baburu malah Kakak
Kan paisi-isi maso kosong
Kok tabayang Upiak dipaguik
Iyo dek kakak Datuak Tungga
Paluak banta buah tangan Upiak
Usah bamain jo nan lain
Kok Kakak mungkia kan janji

Ka rimbo jadi harimau campo
Ka lauik jadi lumbo-lumbo
Kawan jadi alang tabang
Upiak manuruik sudah satahun.

Dek si Mambang maso itu
Indak takana sapatah kato
Untuak manjawek iyo garan

Kato baitu dari si Kambang
Mambisu sajo inyo garan
Sampai si Kambang naiak kudo
Inyo lari ka paraduan
Duo hari ndak basuo urang.

5. Kambang Aruih kanai Pitanah.

Heboh urang di Koto Tujuah
Manyabuik si Kambang Aruih
Mambuek ulah inyo garan
Marompak pantang jo si Mambang
Inyo di dalam batunangan
Banyak tu garan ndak picayo
Nan picayo ado juo
Pangka balanyo iyo garan
Iyolah Bujang nan Sambilan
Banyak ragam nan disabuiknyo
Pabuatan urang baduo ko.

Acok bana inyo maadokan rapek
Manyabuik ado nan maliek
Si Mambang pai surang-surang
Iyo ka rumah Sutan Panjang
Bamalam inyo di sinan
Ruponyo urang gaeknyo garan
Iyo kaduo balah pihak
Manyukoi nan bak iko
Dek itu urang ko yo mamiliah
Datuak Tungga urang jauah
Untuak sumando di rumahnyo
Buliah urangko indak tahu
Pagaulan si Kambang jo si Mambang
Saroman urang laki bini.

Datuak Tungga panah juo datang
Bamalam di rumah Kambang Aruih

Itu juo marompak pantang
Indak doh buliah dalam adai
Si Kambang balaki baduo garan
Batambah gapuak inyo kini
Mungkin alah barisi dangai
Antah siapo nan punyo anak.

Panah pulo si Mambang garan
Manantik si Kambang di tapian
Samo mandi nyo di sinan
Tantu sasudah mambuek nan ndak elok
Conto buruak pado rayaik.

Sakali urang ko sadang rapek
Rapek di dalam balerong sari
Rapek tatuutuik dalam biliak
Didangakan Sutan Panjang dari lua
Jo hati bangih nyo hantam pintu
Pintu tabukak inyo masuak
Mamacik padang nan tahunuih.

Bakato sanan Sutan Nan Gadang
"Mangapo Ayah masuak sajo
Kami barapek samo kami
Kami urang badusanak
Indak amuah kami garan
Disatoi dek urang lain."

Bakato sanan Sutan Panjang
"Ambo ko niniak mamak siko
Buliah ambo kalua masuak
Di mano sajo di Koto Tujuah ko
Malunjak ambo indak tasundok
Malenggang ambo indak mamampeh
Kalian iyo urang datang
Nak mangacau di nagari ambo
Indak satuju ambo garan."

" Manolah urang niniak mamak

Iyo di Koto Tujuah nangko
Urang nan manyuruah marompak pantang
Kapado anak kamanakannya
Kami ko iyo anak rajo
Rajo nan batanguang ajwab
Kok ado cacek jo calo
Tajadi dalam nagari ko
Rajo tu dikunyah-kunyah urang
Ditijak-tikjak mangkutonyo
Indak amuah kami garan
Buruak ayah buruak kami.
Malu ayah malu kami
Kami ko darah dagiangnya.”

Bakato kini Sutan Nan Tangah
”Elok Ayah kalua sajo
Usah kami dilawan pulo
Ayah surang kami banyak
Rapek nagari kan mamutuihkan
Siapo kito nan bana dangai.”

”Mangapo ambo kan baranjak
Ambo iyo di balerong ambo
Kalian indak punyo balerong
Jangan ambo nan disuruhai pai
-Tapi kalian mah nan pai.”

”Bakato Sutan nan katigo
Mano Ayah Mudo urang nan tahu
Usah kami Ayah lawan
Suruah ka mari Mambang Langik
Inyo nan patuik lawan kami.”

”Mangapo inyo kan ambo suruah bunuah
Kalian sambilan inyo surang
Sakali lumpek kalian lawan
Hancua badannya dek tangan kalian.”

”Kami ko bukan urang jahek

Mampasamokan urang surang
Kami tahu adaik baparang
Iyo surang lawan surang.”

”Mungkin juo itu garan
Kalian kan melawan surang-surang
Tapi kok panek nan surang tu
Nan lain kan manggantikan
Siapo manggantikannya garan
Kok inyo panek iyo latiah.”

Baok malah tuntutan kalian
Kapado rapek nagari
Nak tantu siapo nan salah
Nanluruih indakkan sumbiang
Nan bungkuak dimakan saruang.”

”Kok baitu kato Ayah
Katonyo Sutan Ampiang Basi
Salasaikan tugu patahanan ayah
Sarato Puti Kambang Aruih
Baitu pulo Kakak Mambang Langik
Kami ampunyo bukti-bukti
Bapuluah mato jadi sasi.”

Bakato pulo surang lai,
”Mauik ko ayah nan kan manyudahi
Mauik ut tibo padu si Mambang
Baitu si Kambang Aruih
Indak ado hukuman lain
Untuak urang marompak pantang
Selain iyo hukuman mati
Hukuman rang kampuang buliah garan
Iyo diiringankan rapek nagari
Dicukua iyo rambuiknya
Nan laki-laki dibuang jauah
Tapikok nan mamaçik adaik
Iyo marusak adaik itu
Tantu siparusak nan dihabihkan.”

Tadiam Sutan Rumah Panjang
Nyo hantam lantai, nyo tenju dindiang
Inyo ka lua dari balerong
Diriangkan urang jo galak badarai
Pulang Sutan Rumah Panjang
Barundiang inyo jo si Mambang
Manangih si Mambang mandanga ko
Indak manyangko inyo garan
Baitu buruak saudaronyo
Iyolah Bujang Nan Sambilan
Sangkonyo garan gunjiang sajo
Mambuekheboh urang banyak
Sumbang cando nan dikaji
Iyo jangga di mato rang banyak.”

Ayahnyo iyo manyabuik garan
Nak pai ka rumah Kambang Aruih
Bakato inyo maso itu
”Manolah Ayah kanduang Buyuang
Baok sato Buyuang pai
Bapadu padan kito sanan
Baapo padang kan ditangkeh
Bak mano karih diilakkan
Nan kan mambunuah kami baduo
Basuo taakia iko ayah
Indak kan dapek kito mailak
Padang lawan dapek ditangkeh
Padang algojo jo apo dilawan.”

Katiko hari badirok sanjo
Barangkek urang ampek baranak
Iyo ka rumah Kambang Aruih
Takajuik pulo rang barampek
Nan ado di rumah tu garan.

Sabalun rundiang dimulai
Diajak makan dek Puti Kasumbo
Duduak barapek nan salapan
Payah mamicik nasi sasuok

Dibaok ka muluik indak talulua
Iyo basiso kasadonyo garan.

Sasudah diangkek piriang mangkuak
Dek si Kambang jo Hindun Sari
Ditolong dayang nan barampek
Duduak pulo urang barapek
Sutan Panjang mambukak kato
Nyo caritokan habih-habih
Sapatah kato indak nan tingga
Apo nan tajadi di pagi tu
Iyo di balerong ustano gadang.

Lah habih carito Sutan Rumah Panjang
Urang tamanuang kasadonyo
Agak sabanta antaronyo dangai
Bakato Sutan Majo Lelo
"Ampun Ayah ampun Mamak
Sarato Andeh nan baduo
Ambo kan batanyo kini nangko
Kapado Adiak nan baduo
Nan barapek kan jadi sasi
Urang nan membaok padu kami
Dagiang darah hati jo jantuang
Utak banak nan bapikia.
Kito dangakan jawek kaduonyo
Langik jo bumi saksi tenggi
Mano Diak Sutan Mambang Langik

Darah dagiang kami nan duduak
Katokan kini kato bana
Nan luruih bak batang pinang
Indak akan diubah lai
Nan tarang bak cahayo matohari
Indak dapek disuluah disigi lai
Jaan Adiak bakicuah kincang
Usah dicari kato-kato
Nan kan maringangkan Buyuang beko
Duto jo tipu jadi kutuak

Indak dapek manolong Adiak.”

Badarai kini aia mato
Aia mato si Mambang Langik
”Ampun urang nan barapek
Sarato Kakak Majo Lelo
Darah jo dagiang di badan ambo
Mangalia dari ayah jo Andeh
Darah Amai ado dalamnyo
Kalua dari paruik Andeh
Barasiah suci bak aia hujan
Ambo diaja dari bayi
Bajalan luruih bakato bana
Nan barampek jadi pambimbiang
Kinijo sumpah ambo sabuik
Baso darah jo dagiang itu kini
Barasiah bak samulo jadi
Indak dicampua kicuah kincang
Indak dikaruahkan dek tipu tepok
Angok nan datang dari langik
Baitu pulo barasiahnya garan
Barasiah dahulu, barasiah kini.
Kan suci juo sampai nantik
Sampainyo baliak mah ka langik
Tubuah masuak nyo ka bumi
Iyo bumi nan batuah
Iyo hati jantuang nan suci
Jo utak banak nan barasiah
Ambo basumpah bakeh Kakak
Sarato nan Tuo nan Barampek
Ambo indak marompak pantang
Ambo indak manyinguang kulik si Kambang
Salain di muko nan ramai-rami
Kakak sasi kan jo mato Kakak
Kok lain kato dari pabuatan
Kutuak malah ambo dek Kakak
Sarato sagalo nan duduak ko.”

”Mano Diak kanduang Kambang Aruih

Apo jawek Adiak kini ko
Sabuik pulo nan kato hati Adiak
Usah sakato diubah-ubah
Nan barásiah suci kaluakan
Indak dicampua jo nan kumuah.”

”Mano Kakak kanduang Upiak
Darah dagiang hubungan jiwo
Tanyo dahulu jio Kakak
Baru mah Upiak ditanyoi
Darah dagiang dari Andeh – Ayah
Nan kito makan pagi patang
Iyo dari nan baduo ko
Guru kito sajak alun bamato

Iyo nan baduo ko juo
Takao garan koh dek Kakak
Malangga kato babuek salah
Nan dilarang urang nan baduo
Batigo jo mamak Mudo iko
Kok dek kakak indak takao
Kok kunun pulo mah dek ambo
Ambo ko lamah dari Kakak
Lamah badan lamah hati
Jawek Upiak samo jo Kak Mambang
Indak usah Upiak ulang pulo.”

Tantang Kakak Datuak Tungga
Duo kali inyo ka mari
Kito mangecek di nan rami
Dek Upiak iyo iko kainyo
Dek kasiahnyo gadang bana
Upiak amuah inyo pacik
Tapi di muko mato nan banyak
Inyo iyo urang tuo garan
Indak inyo kan marompak pantang.
Sabagai puloiyo Kakak
Salah Upiak dicari-cari
Iyo dek Kakak nan sambilan

Katiko kak Tungga itu garan
Baru turun dari kudonyo
Upiak tagak di muko tingkok
Ado garan Kakak nan Gadang
Tagak jauah di tapi laman
Mungkin nak datang nyo ka mari
Tapi maliek Kak Tungga datang
Inyo indak jadi naiak rumah.

Tantang mangecek di tapian
Bauta ado mah sakali luruih
Hari jumahaik iyo hujan
Hari Satu Upiak ka tapian
Nampak Kak Mambang dari jauah
Manyandang ambuang mamacik sumpitan
Ruponyo sadang mamburu ungeeh
Tampak dek Upiak inyo maliek
Upiak kubik buliah nyo datang
Datang inyo balari-lari
Upiak sonsong ka tangah padang
Indak doh kami dalam samak
Dayang-dayang indak nyo mandakek
Kami bagurau bakucingkah
Takana juo dek Upiak lai
Pantunnyo kakak Mambangko
Dek Kak Tungga baru mah datang
Datang ka mari nan kaduo.

”Dicari daun salasiah
Diagiah urang daun lobak
Alah babagi ruponyo kasiah
Lah gak lupo urang ka wak.

Lah panuah sumpik jo tampian
Panuah dek barek galu-galu
Lah acok manyumpik ka tapian
Indak doh tampak urang lalu

Tapijak anak si barabah

Disangko pucuak batang labu
Ruponyo hari lah diubah
Awak nan jauah mano tahu.

Manjawek Upiak maso itu
Iyo sambia galak kareh
Jaleh bana dek Upiak garan
Camburu kak Mambang iyo gadang.

Kok tapijak anak barabah
Usah dicabuik anak lado
Batang pandan iyo ndak babuah
Hari mandi iyo barubah
Usah disangko disangajo
Hujan labek nan punyo ulah.

Anak Nuri anak unggeh gagak
Manyuruak di bawah daun labu
Daun labu ateh pamatang
Kok iyo lai samo taragak
Pasangkan di angin lalu
Ka kampuang Ateh Upiak datang.

Pangabek batang iyo tangga
Untuang bungo alah mah kambang
Untuang lai datang Kak Tuak Tungga
Dapek basuo jo Kak Mambang.”

Kak Lelo kan tahu juo
Kok batua-batua Upiak amuah garan
Iyo amuah mambuek salah
Si Hindun acok ka mari
Inyo datang basamo samo
Upiak masuak ka kain saruang
Inyo pulang Upiak manuruik
Siapo urang kan mancenai
Gadang kami hampia samo
Samo tenggi samo samampai.
Kak Mambang iyo lalok surang

Lalok di rumah pambujangan
Kok masuak Upiak kasinan
Siapo urang nan kan tahu.

Kok Kak Tungga datang ka mari
Liau lalok di Koto Ateh
Pagi-pagi Upiak Kakak antakan
Dek inyo alah tunangan
Patang-patang Upiak Kakak japuik
Iyo basuko kami Kakak
Dari pagi sampai patang
Tapi kak Mambang sato juo
Baitu kawan-kawan lain
Indak panah kami garan
Iyo duduak baduo sajo
Tigo hari liau di koto ko.”

”Kini ko jaleh iyo Kakak
Pitanah mah nan datang
Dari dusanak kito juo
Iyolah Kak Bujang nan Sambilan
Elok iyo Upiak caritokan.

Nak tarang bana ko pitanah
Panah Kakak Sutan nan Gadang
Basalimuik jo kain saruang
Manyuruak-nyuruak masuak rumah
Upiak surang di ruang tapi
Andeh iyo pai ka Pakan
Kawan-kawan di ateh Anjuang.

Inyo tangkok Upiak inyo paluak
Upiak gigik Upiak garumeh
Upiak takuik kan mamakiak
Kok heboh urang baeko
Bakato inyo sambia galak,
”Upiak sayang iyo kan dicubo
Upiak kan Kakak kinyam kini
Baapo lamaknyo itu garan
Iyo badan urang rancak

Dari ketek kakak taragak
Tiok hari Kakak intai
Kini ko mah baru dapek.”

”Mangapo Kakak marompak pantang
Ambo nan dalam batunangan
Disambahkan Datuak Tungga beko
Iyo salapah indak barisi
Kapado niniak mamak siko
Malu gadang rang Koto Tujuah.”

Batambah badarai mah galaknyo
”Adiak kan indak gadih lai
Alah dicubo dek Datuak Tungga
Si Mambang alah mandapek pulo
Hari ko giliran Kakak
Malakik Upiak baralek
Dek kami sayang kasadonyo
Upiak tabuang jauah-jauah
Kami tingga manggigik jari,”
Tadanga pintu tabukak
Andeh pulang dari pasa
Inyo duduak agak manjauah
Mungkin Andeh lai maliek
Inyo nak maneteng Upiak
Kan dibaok ka biliak ruang tangah
Sudah itu Upiak iyo jaro
Duduak tagak surang-surang.”

”Mano Diak sayang Kambang Aruih
Sakuku Kakak indak ragu
Kakak tahu jiwo Upiak
Kakak pacamin tiok hari
Tapi iyo itu garan
Kakak handak mandanga juo
Sumpah Upiak di dapan kami nangko
Nan kan Upiak sabuik nantik
Iyo di dalam rapek nagari
Dalam rapek itu nantik

Tantu kakak nan kan manimbang
Dek kakak tungkek nagari
Indakkan amuah Mamak garan
Iyo maagiah kaputusan
Dek nan manuntuik anak-anaknyo.”

Bakato pulo maso itu
Iyo Sutan Rumah Panjang
”Mano Ang Buyuang Majo Lelo
Usah Buyuang nan mamutuihkan
Sarahkan pada Manti Tuo
Kami manupang di balakang.”

Bakato sanan Mambang Langik
”Mano Kak tuo Majo Lelo
Sabalun rapek diadokan
Suruah kami pai jauah-jauah
Manyabarang lautan leba laweh
Manuruik carito nan ambo danga
Niniak moyang kito dahulunyo
Babulan di dalam lauik
Baru sampai inyo ka mari.”

Tamanuang urang mandangakan
Bakato sanan Kambang Aruih
”Mano Kakak Mambang Langik
Mangapo kito kan lari
Urang lari urang panakuik
Rang panakuik urang salah
Kito indak doh urang salah
Barani Kak manantang mati

Kini mati isuak kan mati
Mati Upiak kanai pitanah
Isuak – isuak kan tampak juo
Bukti suci barasiah Upiak

Manusia banyak nan tak adia
Langik jo bumi inyo adia
Nan bangkuak kan dimakan suruang;
Nan bana kan tagak luruih.

6. Hukum Putuih.

Sabalum urang rapek nagari
Marapekkan tuntutan Bujang Sambilan
Mupakaik urang kini garan
Mancari pandeka jo dubalang
Nan kan disuruah ka Palimbayan
Manjapuik Tuangku Datuk Tungga
Inyo iyo kan jadi sasi
Untuak kasalahan Kambang Aruiah
Dek alun dapek rang nan tahu
Rapek iyo diundukan dulu.

Tapi sabalun rang barangkek
Lah tibo garan Datuak Tungga
Iyo di laman Kambang Aruiah
Didapekinyo urang ramai-ramai
Agak takajuik inyo garan
Apokah garan nan tajadi
Nan baruak atau nán elok
Kok nan buruak indak tadanga tangih
Kok nan elok ndak ado bunyi-buynian
Malumpek inyo dari kudo
Tali diagiahkannya ka Dubalang
Balari inyo naiak rumah
Disambuik dek Sutan Rumah Panjang
Dilieknyo urang banyak duduak
Habib tamanuang kasadonyo
Tapi ndak ado tilam bungo
Di tangah-tangah urang banyak.
Si Kambang duduak di ujuang bana

Iyo di bawah palaminan garan
Lamin batirai balangik-langik
Kok ndak ado nan baralek
Indak ado pulo yo nan mati
Maliek inyo tacangang-cangang
Batanyo jo mato lia
Didakekinyo dek ayah si Kambang
Iyo lah Datuak Gampo Alam
Dicaritokan kini dek urang ko
Apo garan nan tajadi.

Tagak kini Datuak Nan Tungga
Manghantam lantai iyo garan
Balari ka ujuang ruang
Dipaciknyo si Kambang Aruih
Di dapan urang nan bapuluah
Urang gadang kasodonyo
Laki-laki parampuan garan
Tamasuak Tuangku Datuak Tamangguang
"Elok ambo marompak pantang bana
Mari adiak kito ka Palimbayan
Nan tidak-tidak dituduahnyo
Hukuman mati tantangannya
Kok itu bunyi kasalahan
Kok Upiak indak di siko lai
Siapo urang kan dihukum."

Tagak kini Sutan Majo Lelo
Diranguikkannya urang iko
Dari badan si Kambang Aruih
Saba kito iyo Adiak
Rapek nan alun dimulai
Mangapo kito putuihkan sajo
Si Kambang indak amuah lari
Dek inyo indak basalah
Nyo tantang mati jo galak
Nyo sambuik jo senyum manih
Urang manangih kasadonyo
Satitiak indak kalua garan
Aia mato Adiak kito ko."

Lah tagak kini Datuak Tungga
Disambahnyo Puti Kasumbo Ampai
Nan duduak dakek si Kambang
Sudah itu Tuangku Rajo
Lari inyo duduak ka pangka ruang
Batangisan jo Sutan Rumah Panjang
Sarato urang Mambang Langik.

Bakato sanan Tuangku Rajo
Pado Tungkeknyo Majo Lelo
Barisuak kito adokan rapek
Gualah aguang tigo kali
Guguah tabuah tigo galugui
Kito panggia Manti jo Pangulu
Indak rayaik kasadonyo.

Dijapuik si Mambang dek pandeka
Duo dubalang mairingkan
Datang bakudo kaampreknyo
Inyo tamasuak rang basalah
Dek sato marompak pantang
Kok jaleh salahnyo beko
Hikumnyo indak dari kito.

”Ampunlah ambo Mamak Kanduang
Kok buliah ambo mamintak
Ambo ndak sato dalam rapek
Mamak putuihkan mah sandiri
Sarato Manti jo Pangulu.”

”Manolah Buyuang anak Mamak
Mamak ndak buliah mamutuihkan
Lawan iyo dusanak Buyuang
Anak kontan mamak lahiakan
Sadapek-dapek kito batenggang
Tagakkan bana Kambang Aruih
Sarato Mambang Langik garan
Mamak iyo indak picayo
Urang ko babuek salah.”
Barisuaknyo pagi-pagi bana

Baru sajo tabik paneh
Lah duduak urang di balerong
Si Mambang datang bakudo
Baitu pulo Datuak Tungga
Si Kambang datang malenggang
Sarupo urang kan pai baralek
Bapakaian adaik inyo garan
Lah lakek tangkuluak tanduak
Kainnyo tanunan urang Hindu
Baitu salendang balapaknyo
Bapandiang ameh di pinggangnyo
Cukuik jo subang jo galangyo
Sarato dukuah tujuah untai
Dari lihia sampai ka pandiang
Bacincin pulo kida kanan
Tigo di kanan ampek di kida
Tasanyum inyo ka urang banyak
Laki-laki parampuan garan
Nan tagak di kida kanan labuah
Rayaik indak diundang dangai
Tapi nyo datang kasadonyo
Indak buliah masuak balerong
Inyo tagak di laman Ustano
Tamasuak ayah kanduangnyo garan
Sarato Andeh Mambang Langik
Baitu pulo Hindun Sari
Nan masuak ka dalam balerong
Iyo Andehnyo nan kan jadi sasi
Sarato Mandeh Rubiah garan
Inyo ko Pangulu Parampuan.

Lah duduak urang manuruik aturan
Rajo di ateh tilam tenggi
Tungkek saketek labiah randah
Manti Tuo sabalah kanan
Datuak Bandaro sabalah kida
Di balakangnyo Manti jo Pangulu
Sarato Niniak Mamak lain
Tamasuak Sutan Rumah Panjang

Nan manuntuik di dakek dindiang kida
Nan ditamtuik dakek dindiang kanan
Sarato sasi-sasinyo.

Rapek tampaknya muram bana
Bujang sambilan galak badarai
Tampak bana galak buenknyo
Si Kambang iyo tasanyum manih
Sagalo mato maadok ka inyo
Ado sabanta antaronyo
Ditokokkan palu dek Rajo
Manitah inyo maso itu.

”Manolah Tungkek Koto Tujuah
Sarato Mamak Manti Tuo
Manti Pangulu kasadonyo
Tamasuak Mandeh Rubiah
Rapek kini ko denai bukak
Dek nan manuntuik dakek ka denai
Baitu puño nan dituntuik
Nan surang jantuang suok denai
Nan lain jantuang kida denai
Dek itu rapek denai sarahkan
Iyo kepado Tungkek kito
Tuangku Sutan Maharajo Lelo
Kaduo Manti Tuo kito
Iyo sutan Tumangguang Tuo
Hingga iko titah denai.”

”Ampunlah ambo Rajo kami
Sagalo titah ambo jujuang
Manolah rapek saandiko
Manarimokah rapek kaputusan ko
Bañato Manti jo pangulu
”Manarimo” garan
Inyo bakato lambek-lambek
Antaro tadanga jo indak tadanga
Manunjuak urang nan manuntuik
”Kami indak manarimo
Katonyo Sutan nan Gadang

Nan dituntuik sakandang jo Tungkek Rajo
Mano buliah nyo madili
"Manolah urang nan dituntuik
Manarimo kah Puti Kaputusan ko
"Ambo iyo manarimo Tuangku."

Kantonyo Puti Kambang Aruih
Jo galak pulo nyo mangecek
Galak manih dari hati
Ambo tahu Tuangku Tungkek
Urang nan adia di nagari
Tibo di mato indak kan nyo piciangkan
Tibo di paruik indakkan nyo kampihkan."

Batigo urang nan rapek
Nan surang indak manarimo
Rapek buliah kito taruihkkkan
Katonyo Tuangku Tungkek Nagari.

"Manolah pihak nan manuduah
Cubo padangkan mah tuduahan
Nak dapek kami maadili."

Tagak kini Sutan Nan Gadang
Disabuiknyo sagalo tuduahan
Nan dikecekkannyo pada Sutan Rumah Panjang
Nan alah kito danga juo
Siapo garan nak manambah tuduahan
Iyo tantang kasalahan garan
Kasalahan urang nan dituduh
Manunjuak kini Sutan Nan Tangah
"Puti nan dituduh indak sopan santun
Lamak sajo nyo galak
Wakatu tunangannya garan
Datang mamaluaknyo di hadapan orang banyak"
"Kok indak ado lai nan manuduah."
Kito pindah pada nan dituduh
"Manolah Puti nan dituduh
Apo garan dari tuduhan

Iyo nan lai Puti pabuek
Apo pulo mah tido dipabuek.”

”Sado tuduahn ambo tulak
Indak ambo marompak pantang
Baiak jo tunangan ambo
Atau iyo jo urang lain
Indak panah tunangan ambo
Iyo bamalam di rumah ambo
Sajak samulo nyo ka mari
Sampai hari nan kini ko
Inyo bamalam di Koto Tujuah Ateh

Indak panah ambo pai surang
Ka rumah tampek tunangan ambo
Iyo padō malam hari
Kok padō siang hari
Itu buliah manuruik adaik
Ambo dianta Kakak ambo
Ditarimo dek rang banyak
Tamasuak Mamak kanduang ambo
Iyo urang niniak mamak
Nan mamacik adaik jo limbago.”

”Amuah kah Puti kini nangko
Basumpah padō langkik jo bumi
Baso Puti bakato bana?”

”Ambo basumpah padō langik
Sarato bumi nan batuah
Bahaso nan ambo sabuikcako
Kato bana kasadonyo
Kok ambo bakato duto
Ambo rela dikutuak
Dikutuak langik jo bumi.”

”Manolah kito nan mandanga
Nan punyo hak untoak mamutuihkan
Bak Apo bunyi kaptususan.”

Manunjuak kini nan manuduah

Sabalum diambiak kaputusan
"Cubo tanyokan padonan tatuduah
Adokah inyo punyo sasi
Salain urang lingkungannya."

Manolah Puti nan tatuduah
Adokah garan sasi Puti
Salain dari urang nan basangkutan?"

"Siapo kan sasi ambo
Salain cacak jo tokek
Inyo indak pandai bakato
Buruang Nuri ambo garan
Inyo lai pandai bakato
Buliahkan inyo jadi sasi."
Banyak urang sanyum mengejek
Mandanga jawek nan baitu.

"Mano Sutan nan manuduah
Adokah garan sasi Sutan
Atau bukti nan dapek dipacayo?"

Bakato saurang Sutan kini
"Tadi ado mah disabuik
Puti Kambang Aruih sarato Sutan Mambang
Mandi baduo di tapian
Nan biaso urang mandi baduo
Iyolah urang laki bini
Sasudah inyo bakarajo."

"Manolah Sutan Mambang Langik
Adokah Sutan panah mandi
Iyo di tapian puti-puti?"

"Basumpah ambo bakeh Tuangku
Sarato rapek nan duduak ko
Kok ambo panah mandi di tapian
Iyo tapian Puti-Puti
Ambo rela itu garan
Dikutuak langik jo bumi."

”Manolah Sutan nan manudua
Adokah Sutan caliak sandiri
Urang ko mandi baduo?”

”Ambo iyo indak mancaliak
Ambo mändanga kecek urang.”

”Kecek uang indak doh bukti
Indak buliah diparentangkan.”

Bakato kini Manti Tuo
Manolah Tuangku Tungkek Nagari
Tuduahan indak dapek ditarimo
Elok kito ambiak kaputusan
Dek bukti tarang indak ado.”

”Manolah kito nan duduak ko.”
Katonyo Sutan Majo Lelo
”Baapo bunyi keputusan.

”Bakato surang Pangulu Tuo
Ambo picayo ka muluik Puti
Sarato sumpah nan disabuiknyo
Putusan indak doh nan lain
Kito beralek lakeh-lakeh
Manghabisi sagalo tuduhan buruak.”

Bakato Datuak Bandaro
”Ambo manyabalah kawan cako
Dek lamo baolak olai
Batuungan sampai salapan bulan
Kini lah sampai anam bulan
Pakan datang ambo mintak
Kito iyo baralek lai”

”Lah duo kato kito danga
Siapo garan nan manukeh
Mintak didanga suaronyo.”

Dek indak ado nan manukeh
Lah kan ditokokkan palu rapek

Tagak kini Sutan nan Gadang.

”Mano Tuangku nan maadili
Dangakan malah bukti nan nyato
Nan handak ambo katangahkan
Nak jaleh dek urang banyak
Cuma sagan ambo manyabuikkan
Pado satu hari garan
Ambo pai ka rumah bako ambo
Handak mintak dibuekkan samba
Lah lamo ambo ndak kasinan
Ambo dipaluak Kambang Aruih
Diciumnyo saluruah badan
Mamintak inyo bakeh ambo
Nak tidua agak sabanta
Inyo katokan pulo garan
Inyo indak gadih lai
Alah lalok jo tunangannya
Sarato Sutan Mambang Langik
Inyo sabuik iyo garan
Inyo iyo salah piliah
Mangapo nan tuo dipiliahnyo
Nan mudo iyo lai banyak
Batanang kami di biliak gadang
Malapehkan dandam birahi
Dandam birahi nan lah lamo
Idaman kami nan baduo
Alah pueh ambo rasonyo
Ambo teteng inyo ka ruang tapi
Baru nyo tagak ambo latakkkan
Datang Andehnyo dari pakan
Nyo caliak kami nan baduo
Taruih sajo inyo ka dapua.”

”Manolah Andeh Puti garan
Andehnyo Puti Kambang Aruih.”

”Mano Tungkek nagari ko
Kato pitanah itu Tungkek

Inyo mamacik pinggang si Kambang
Ambo masuak inyo lapehkan
Langsuang nyo turun dari rumah.”

”Manolah Puti Kambang Aruih
Cubo sabuikkan kini garan
Apo tajadi di hari tu,?”

”Ambo turun dari anjuang
Maninggakan kawan nan banyak
Ambo liek pintu di ruang tapi
Dibukak urang dari bawah
Tampak garan Sutan nan Gadang
Masuak ka rumah capek-capek
Ambo dikaja dipaguiknyo
Nak lari indak dapek lai
Ambo garumeh ambo gigik
Mungkin tandonyo tingga juo
Dipaciknyo pinggang ambo
Kan diangkeknyo ka biliak dalam
Andeh pulang dari pakan
Ambo iyo indak mamakiak
Takuik ambo urang kan heboh.

Ambo basumpah kini nangko
Ambo indak dapek dek nyo
Ambo dikutuak langik jo bumi
Kok ambo baduto kini nangko.”

”Manolah urang nan manuduah
Amuahkah Sutan Basumpah
Bahaso kato Sutan nan cako tu
Iyo mah garan kato bana.”

”Sabalun ambo basumpah
Bia mangecek adiak ambo
Nan banamo si Sutan Tangah”,
Bakato kini Sutan Tangah.

"Ampun Tuangku Tungkek Nagari
Dangkan pulo kato ambo
Si Kambang anak bako kami
Iyo kami bujang nan Sambilan
Tunangan kami dari kaciak
Bakasayangan kasadonyo
Katiko kami alah tahu
Inyo nan indak gadih lai
Kami datang baganti-ganti
Inyo nan turun dari anjuang
Mambukakkan pintu uuntuak kami
Mamak jo Amai di anjuang ameh
Kawan-kawannya di anjuang perak
Tidua lamak kasadonyo
Inyo manantik kami garan
Di biliak gadang ruang tangah
Di sinan kami bagaluik

Bagaluik sapueh hati
Lah tigo bulan ko lamonyo
Takadang duo samalam
Iyo indak sakali baduo
Tapi baganti kami naiak
Batambah rancak inyo kini
Mukonyo basari-sari
Dalam paruik nyo ado anak
Antah siapo punyo anak
Nan acok jo inyo garan
Iyo kakak Sutan nan Gadang
Tantu inyo amuah basumpah."

Bakato kini Sutan nan Gadang ;
Ambo lai amuah basumpah
Tapi sabalun itu garan
Dukun sati ado di siko
Dek inyo pangulu juo
Inyo pandai mah mananuang
Si Kambang barisi kini
Atau lai nyo gadih juo."

Dipanggia kini Dukun Sati
Datang kamuko untoak mananuang
Inyo datang jo mundam barisi aia
Cukuik jo limau tujuah ragam
Talua kamanyan ado pulo
Taheran urang nan maliek
Tagagah inyo bakato=kato
Iyolah urang Dukun Sati.

”Ampunlah ambo pada Tuangku
Iyo Tuangku nan baduo
Tuangku Rajo, Tuangku Tungkek
Sarato Pangulu saandeko
Iyo tampak . . . tampak . . . garan
Di dalam tanuang ambo . . .
Puti indak yo indak gadih . . . lai
Alah . . . barisi . . . ”
Inyo ndak dapek bakato lai.

”Jo kasa Tungkek bakato
Manolah Puti nan tatuduah
Apo jawek Puti kini?”

”Apo lai kan dijawek ambo
Satu pitanah, kaduo duto
Katigo *sumpah palasu*
Jo apo iko'kan ditukeh
Jo caro apo ambo manyanggah
Jatuahkan hukuman dek Tuangku
Ambo indak kan mailak.”

Lamo manggigia Majo Lelo
Hampia indak dapek nyo mangecek
Urang nan rapek batangisan
Talabiah garan Datuak Tingga
Sarato Sutan Rumah Panjang.

Ado sabanta mah antaronyo
Lah tagak garan Tungkek nagari
Bakato inyo *kareh, tapek*

Manolah Puti nan pakaro
Dangakan kini elok-elok
Tuntutan nan lain indak paralu
Putusan ambo *Hukuman Mati*
Indak buliah *diubah lai.*"

"Batu Tuangku Tungkek Nagari
Urang nan arih bijaksano
Urang mamintak *nyawo ambo*
Untuak apo *dipatahankan*
Saasa sakaturunan
Ambo indak *takuik mati*
Darah tatumpah di Koto Tujuah
Bia nyo *baliak* ka Koto Tujuah
Darah ambo ko kan *manguntuak*
Indak *salamaik* Koto Tujuah
Kok darah ambo alah mangalia
Cumah sabuah pinta ambo
Usah lai ado nan picayo
Ambo ko iyo *marompak* pantang

Ambo ko *barisi kini*
Kawan samo-samo di anjuang
Buliah ditanyo inyo garan
Batuakah ambo lah barisi
Atau ado nyo maliek garan
Alun barapo hari nan lalu
Ambo iyo *maliek bulan*
Tujuah hari mah lamonyo.

Lai pulo pintak ambo
Usah disuruh pancuang ambo iko
Dipancuang jo padang *algojo*
Usah hambo *dihukum gantuang*
Antakan ambo ke puncak Gunuang Tujuah
Di puncak itu iyo garan
Ado talago putiah barasiah
Ula gerang di dalamnya

Buayo putiah ado pulo
Samo *sati* keduonyo
Samo bak *Dukun Sati* cako
Dapek maliek nan ndak ado
Ambo iyo mah kan masuak
Ka paruik ula gerang ko
Amak paruik nyo tu iyo barisi.”

”Manolah kito nan basamo
Adokah kito manarimo
Pintak puti nan kanai hukum.”
Bakato kini Datuak Manti Tuo

”Ampun ambo Tungkek Nagari
Mangapo Tuangku putuihkan surang
Kito iyo duduak basamo
Untuak apo kami ko datang
Banyak hukuman nan lain-lain
Mangapo diputuihkan hukuman mati.

”Mamak urang pamagang adaik
Tantu tahu macam hukuman
Kok Mamak lah lupo garan
Bia ambò sabuikkan juo
Kok Puti sabahan nagari
Nan kan manurunkan rajo isuak
Babuek *serong marompak pantang*
Hukuman nyo *hukuman mati*
Lawan nyo nan laki-laki
Dibuang saumua hiduik
Sabab nan patuik *manahan diri*
Iyolah *urang nan padusi*
Kok inyo dipaso digagahi
Inyo dibuang saumua hiduik
Indak dibuang ka nagari urang
Tapi dibuang ka dalam rimbo
Atou ka pulau *nan indak bapaunyi*.

Kok Puti nan anaknya indak garan
Iyo indak kan jadi rajo
Manuruik alua katurunan
Inyo buliah dibuang sajo
Basamo urang nan basalah
Saumua hiduik ndak buliah pulang
Kok Puti tu anak Panggulu
Dicukua mah rambuik nyo
Dibuang duo puluah tahun
Kok anak rayaik biaso sajo
Dicukua mah rambuiknyo.
Diarak dalam nagari
Jo tampuruang inyo diarak
Salamo inyo alun barambuik panjang
Alun buliah inyo kawin
Ukuran lamonyo iyo garan
Sampai abuak ko dapek disanggu.

Adiak ambo cukuik babangso
Tuah nagari Koto Tujuah
Hilang inyo hilang katurunan
Indak kan ado kamanakan lain
Nan kan malahiakan Puti baru
Di nagari Koto Tujuah ko.”

”Urang nan lawan ndak basumpah
Katonyo Datuak Bandaro
Mangapo putusan kito ambiak.”

”Tibonyo kan sinan juo
Lawan inyo amuah basumpah
Siapo dapek maasiangkan
Mambari tando bateh sumpah
Nan mano nan palasu
Mano nan bana itu dangai
Apo gunonyo itu Mamak
Ambo labiah suko garan
Inyo mati di Gunuang Tujuah
Dari sangsaro dalam rimbo

Ka mano kubuanyo kan dicari
Harimau sabanyak itu
Ula gadang iyo banyak pulo
Nan mano nan kan disambaliah
Mancari tulang Adiak awak.”

Elok rapek Mak kito taruihkan
Nak salasai sahari ko
Palu kini nyo tokokkan baliak
Bakato inyo maso itu

”Manolah Sutan Mambang Langik
Apo jawek dari Sutan
Baitu bunyi tuduhan?”

”Sarupo garan jawek ambo
Jo si Puti Kambang Aruih
Ambo indak basalah
Indak panah marompak pantang
Kasiah ambo sagadang gunuang
Sayang ambo saleba lauik
Kan apo si Kambang ambo rusakkan
Ambo azab ambo aniayo
Ambo tahu jo hukum adai
Jiko ambo babuek salah
Baiko kasudahannyo garan
Ambo saba manarimo nasib
Bia nyo sanang di tangan urang
Dari sangsaro di tangan ambo.”

”Sungguah baitu jawek Sutan
Sutan dituntuik salah juo
Dek indak ado tando bukti
Manyabuik Sutan indak basalah.”

”Ambo basumpah jo langik
Ambo basumpah pado bumi
Basasi ka bulan matohari
Ka angin nan mambaok jiwu
Ka cahayo nan mambaok tarang

Kok ambo mambuek salah
Manuruik tuduhan nan tadanga
Ambo rela manarimo *kutuak*
Dari sagalo nan ambo sabuik
Ambo mamintak pulo kini
Kutuak *babaliak* ka nan *salah*
Surang ambo mah nan pai
Alun nagari yo kan langang.”

”Kok baitu jawek Sutan
Kami manuntuik Sutan dihukum
Denai putuihkan hukum buangan
Iyo dibuang saumua hiduik
Dibuang ka dalam *rimbo rayo*.

Ambo manarimo putusan Tuangku
Tapi kok buliah ambo mamintak
Ambo mintak mati basamo
Iyo jo Puti *Kambang Aruih*. ”

”Pintak tu ndak buliah kami tarimo
Indak adia namonyo garan
Kok itu kami lakukan
Nyawo Sutan sakahandak Sutan
Pabilo kan disuruh tabang
Tapi indak basatno si Kambang
Disasikan mato rang Koto Tujuah.”

”Ambo tarimo hukuman ambo
Nak sanang Nagari Koto Tujuah.”

”Kini denai bapindah garan
Kadado Tuangku Datuak Tungga
Rajo dek urang nagari Palimbayan.”

”Mano Tuangku Rajo Palimbayan
Baitu bunyi tuduhan
Apo jawek Tuangku garan?”

Tagak Tuangku Datuak Tungga
Nyo hantam lantai sampai bagarak

Bagarak sarupo gampo
Nyo tenju dindiang sabalah kanan
Kini bakato inyo garan
"Salah bana rang Koto Tujuah
Manghukum tunangan ambo
Disabuik marompak pantang
Siapo garan nan kan tahu
Dek inyo marompak pantang
Salain ambo tu mah isuak
Sasudah ambo naiak lamin
Kok ambo sarahkan isuak
Salapah kosong indak barisi
Ambo barangkek pagi tu juo
Maninggakan bini ambo garan
Baru inyo buliah dituntuik
Mambuek malu ka nagari

Kok ambo iyo amuah garan
Manarimo gadih nan lah rusak
Tangguang jawab ambo sandiri
Indak ado nan buliah berang
Ambo nyatokan kini nangko
Kawinkan ambo jo si Kambang

Bia lah lanyah dek rang banyak
Jo saribu urang nyo lah tidua
Ambo kan manarimo inyo
Batakan sakalian putusan
Nan alah dipabuek cako."

Bakato kini Tuangku Datuak Tumangguang
"Denai rajo nagari ko
Manyabalalah ka Tuak Tungga
Inyo isuak kan labiah tahu
Gadih indaknya si Kambang ko."

Tagak kini Sutan nan Gadang
Sabalam ado izin babicaro

Inyo alah manghariak sajo
Manghantam manapuak dado,
"Si Kambang alah manarimo putusan
Tandonyo iyo nyo basalah
Inyo indak amuah mangaku
Iyo di muko rapek nangko
Itu biaso yo Tuangku
Maliang ma nan amuah garan
Mangaku salah dalam rapek
Mambang Langik alah garan
Inyo iyo manarimo pulo
Tando iyo turuik basalah
Karajo baduo ko Tuangku
Indak dapek mangaku surang.

Tantang urang nan mangecek
Sabanta ko iyo garan
Lah jaleh *inyo mamulai*
Lah tigo kali nyo ka mari
Tuo bangka salero tajam
Lah *lanyah* paja nyo pabuek
Baru kami sato pulo
Iyo alah saribu kali
Rajo ko marompak pantang
Kami saratuh kali surang
Sambilan urang kami garan
Sapuluah jo Mambang langik
Inyo manyarah bak bátang pisang
Anak sarau anak cilako.

Andeh bapaknyo manyukoi
Baitu mamak jo kakaknyo
Niniak mamak dalam nagari
Tigo hari tunangannya siko
Diantanyo si Kambang dek kakaknyo
Ditarimo dek mamaknyo
Tigo hari siang malam
Diulikkan dek Datuak Tungga
Apo nan kumuah dari itu

Alah tigo kali nyo ka mari
Cubo malah dusanak etong

Barapo kali nyo babuek
Tantang si Mam̄bang iyo garan
Alun lai mancang galanggang
Ayahnyo sadang sakik kareh
Inyo bagaluik jo si Kambang
Bapakan-pakan si Kambang sinan
Apo garan nan dibueknyo
Mato kami ko nan mancaliak.

Adaik nagari di alamko
Kok anak gadih alah dippingik
Palang pintunyo dari lua biliak
Ayahnyo iyo nan ma malang
Kok inyo ingin kalua
Inyo bunyikan ganto giriang-giriang
Andehnyo nan magawani
Handak ka mano inyo pai
Tapi si Kambang lain pulo
Pintunyo indak doh bapalang
Siang malam tabuka sajo
Ayahnyo taruih badagang
Andehnyo taruih ka pakan
Kok kawannya indak jo inyo
Kami diajak ka anjuang perak
Kok kawannya tidua jo inyo
Kami nyo baok ka biliak dalam
Baganti kami mangarujak
Inyo nan labiah mangandaki
Lah pagi baru nyo ka anjuang
Saleronyo sagadang gunuang
Indak pueh sakali duo
Paja gata indak baradaik
Tuo mudo nak diluluanyo.

Elok bana rang Koto Tujuah ko
Ayah ambo alah mah gaek
Rajo nagari Koto Tujuah

Pai basuo jo dusanaknyo
Maagiah balanjo agak saketek
Dusanaknyo rando indak mancari
Disabuik bak iko bak itan
Liau ditagua dek nan mudo.

Kok putusañ dibatakan
Mambuek malu ayah kami
Mambuek busuak nagariko
Busuak labiah dari bangkai
Tabaun ka saluruah alam
Basumpah kami kini nangko
Kami bukan sambilan ko sajo
Kami baka Koto Tujuah ko
Kami pancuang sagalo urang
Gadang ketek tuo mudo
Laki-laki parampuan
Surang sajo ndak buliah tingga.

Manggigia urang mandangkan
Satangah alah agak ragu
Tagak kini Sutan Majo Lelo
Bakato inyo gagok-gagok
Payah inyo manahan barang.

”Manolah rapek saandiko
Denai kini ko Tungkek nagari
Bukan lai Tungkek salamo ko
Putusan indak denai batakan
Mambatakan bararti parang
Parangkan marusak nagari
Mambuek rusuah risau rayaik banyak
Dek iko ka angak ciek
Baribu manusia jadi bangkai
Langik indak maliek bangso.

Dangakan putusan elok-elok
Putusan iyo dari ambo
Mamak ambo tampaknya garan
Agak sakik lua jo dalam

Barek iko untoak baliau
Tangan kanan baliau garan
Iyo mancancang tangan kida
Atou mah iyo sabaliaknyo
Inyo rang gadang sunduik basunduik
Alun panah dihino urang
Alun panah mandapek malu
Kini ko *hancua* di nan rami
Diinjak dek tulang jo *dagiangnyo*.

Putusan ambo iyo garan
Mano Tuangku Datuak Tungga
Talangkai kami pulangkan
Patunangan Tuangku jo si Kambang
Diputuihkan Rajo Koto Tujuah
Tando akan kami pulangkan
Kami anta ka Palimbayan
Iyo mah duo kali lipek
Baitu manuruik adaik
Nan mandapek hukuman mati
Bukan lai tunangan Tuangku.

Manolah Mamak Datuak Tumangguang
Sarato Mamak Manti Tuo
Baitu rapek saandiko
Kiniko hari Sinayan
Hari Kamih itu garan
- Kito antakan Mambang Langik
Iyo ka rimbo Gunuang Tujuah
Nan banyak sampai di luar kampuang
Duo Datuak duo Pandeka
Dua baleh dubalang garan
Maantakan sampai Batang Masang
Lah manyabarang inyo garan
Baru nyo buliah ditinggakan.

Tigo hari sasudah itu
Hari Sinayan mah tiboñyo
Kito antakan basamo-samo
Tantu siapo nak nan pai

Iyo si Upiak adiak denai
Nan banamo si Kambang Aruih
Bungo kambang dalam nagari
Gadih suci gadih barasiah
Kito antakan inyo garan
Iyo ka puncak Gunuang Tujuah
Kawah talago sati
Kito sarahkan jo hati suci
Kapado ula girang sati
Sarato buayo putiah garan
Dalam maso tigo hari ko
Sutan Mambang buliah nyo basuo
Iyo jo siapo sajo dikahandakinyo
Laki-laki parampuan
Tapi nyo tatok di rumah andehnyo
Indak nyo buliah ka mano-mano
Cuman sakali diizinkan
Inyo basuo jo si Kambang
Untuak bapisah salamonyo
Dijapuik anta dek dubalang
Siang malam itu nantik
Dubalang tagak di laman Andehnyo
Untuak manjago inyo garan
Tantang puti Koto Tujuah ko
Puti banamo Kasumbo Ampai
Basamo anaknyo Kambang Aruih
Nan punyo Ustano Koto Tujuah
Dek anak ko iyo kan bapisah
Di nagari Koto Tujuah ko
Inyo babaliak ka Ustano
Untuak duo kali tujuah hari sajo
Ustano ko baanjuang perak
Di tangah anjuang nan duo ko
Ado garan biliak dalam nan tenggi
Satantang anjuang paranginan
Rajo tingga di anjuang ameh
Iyo Tuangku Datuk Tumangguang
Di anjuang perak tampek gadih
Di sinan tampek Puti Kambang

Sarato Puti Reno Intan
Di anjuang tenggi biliak gadang
Tinggi Puti Kasumbo Ampai
Jo suaminyo Datuak Gampo Alam
Denai di rumah Gadang nan baru
Anak anak Mak Datuak nan laki-laki
Tingga di rumah pambujangan.

Tujuah hari nan patamo
Si Kambang Aruih iyo dangai
Manarimo sagalo urang
Laki-laki parampuan garan
Nan bakandak basuo jo inyo
Hari katujuah hari Ahad

Digua aguang bagaluguik
Diguguah tabuah bagaluguik pulo
Puti Kambang turun ka laman
Kok lah tibo rayaik banyak
Inyo mamintak batang tubuahnyo
Direla dimaapkan dek nan banyak
Inyo dilulua ula gerang
Malamnya kito makan basamo
Iyo makan pangabisan garan
Jo Puti Koto Tujuah ko
Hari sinayan nan kan tibo
Kito tandu Puti kito
Diiringkan Manti jo Pangulu
Sarato Pandeka jo dubalang
Barang nan punyo kudo tunggang
Buliah inyo naiak kudo.

Manolah Mamak dan baduo
Mamak Tumangguang Mamak Panjang
Sampai di siko karajo ambo
Satahun ambo jadi Tungkek
Sahariko ambo jadi rajo
Barisuak jadi Bujang Pakan
Ambo iyo kan baniago
Mancarikan paruik indak barisi

Sarato pungguang indak basaok
Ambo pulangkan kini nangko
Iyo mangkuto di kapalo
Iyo tungkek nan di tangan
Padang jo karih nan di pinggang
Tolong tarimo Mamak Manti
Sarahkan pado rajo kito."

Lah tagak kini Manti Tuo
Bakato inyo maso itu
"Ampun ambo Tungkek Nagari
Dangakan kini sambah ambo
Patamo mintak nan banyak ko
Usah sarahkan ko dahulu
Jiko Tuangku kan barangkek
Baru inyo kami tarimo
Tuangku manyabuik tadi
Liau sakik lua dalam
Taraso tu dek rang banyak
Tangan kida mambunuah tangan suok
Hati jo jantuang dibaoknyo
Indak sakik saparah itu
Jiko ambo taka garan
Alah sacupak aia matonyo
Nan kalua dari pagi
Baitu aia mato ambo
Sarato Pangulu nan tuo-tuo
Aia mato iyo Tuangku
Bamuaro nyo di mato garan
Hulunyo iyo hati jantuang
Kok kariang inyo mato bileh
Hati jo jantuang dijujuiknyo.

Nan kaduo pintak ambo
Manuruik adaik jo limbago
Jiko urang kamatian
Urang iyo manigo hari
Manujuah, manduo kali tujuah hari
Maampek puluah manyaratuih

Indak ameh bungka diasah
Indak kayu janjang dikapiang.

Kito antakan Puti kito
Saroman maanta bangkai ula
Kito pulang ka rumah surang
Indak lai kito kamatiān
Sakuku ambo indak picayo
Baitu sanak-sanak lain
Bahasa Puti ko iyo basalah
Dari sajangka dari tanah
Kami pacamīn mah budinyo
Garik jo langkah dituruukkan
Laku parangai indak cacek
Budi bahaso sopan santun
Tabaok garan kasadonyo
Inyo ko iyo Puti tungga Koto Tujuah
Baitu pulo mah Andehnyo
Bukan tungga di Ustano sajo
Tapi tungga di Koto Tujuah
Tungga dalam bangsonyo
Tungga pulo dalam romannyao
Indak ado urang nan manandiangi
Baitu dalam laku parangai
Bukan itu Tuangku sajo
Inyo urang nan kahilangan
Tapi kito kasadonyo
Manjanguak Tuangku ka tingkok tu
Maliek ka halaman Ustano
Barapo labek hujan garan
Iyolah hujan aia mato
Amuah hanyuik Ustano gadang
Dihanyuikkan banjia aia mato.”

Kito manigo manujuah hari
Saroman kato mambao tadi
Sampai garan saratuuh hari
Sudah itu iyo nantik
Kito ka sawah jo ka ladang

Mangarajokan karajo surang-surang

Manolah Mamak Manti Tuo
Ambo baok ka diri ambo
Iyo raso urang nan banyak ko
Lah payah urang di balerong dapua
Mamasak nasi jo gulai
Urang nan rusuah kamatian
Indakkan makan inyo garan
Nasi busuak samba tacampak
Untuak apo itu garan.

Kok Mamak sarato mamak lain
Nak mambari cahayo tarang juo
Kapado padiah nan manahan dado
Nan kan hilang tumpuannyo
Usah manangih surang-surang
Di rumah inyo sandiri
Kito pasang mah palaminan
Iyo di sarambi tapi Ustano kito
Dibari batirai langik-langik
Sarato tabia bakuliliang
Kito latakkan tilam bungo
Iyo di muko palaminan
Dibaka kamanyan putiah
Diserakkan bungo tujuah ragam
Kok nak manangih nak maratok
Kito biakan itu garan
Tapi indak buliah saratuuh hari
Cukuiklah tujuah hari sajo
Rayaik haruuh bakarajo
Mancari minun makannyao
Indak buliah inyo digaduah
Dek tangih ratok di Ustano.

Sasudah tujuah hari isuak
Kami nan batigo baranak
Kan pai ka rumah bako ambo
Itan di rumah Lubuak Alung

Palabihan namo nagarinyo
Alah mah datang rang manjapuik
"Kok baitu kato Tuangku
Wakatu itu ambo tarimo
Barang nan Tuangku sarahkan ko
Pakai juo dek Tuangku
Salamo limo baleh hari ko."

"Manolah rapek saandiko
Indakkan ambo ulang lai
Manarimo kah rapek tantang itul.?"

"Tantang manangih basamo samo tu
Tantu kami manarimo garan."
Kato saurang pangulu tuo
Tapi Tuangko usah garan
Manyarahkan kajrajo Tuangku
Usah kami ditinggakan
Pai surang pai baduo
Langang nagari Koto Tujuah
Tantang Mamak Tuangku garan
Iyo mah Sutan Rumah Panjang
Alah basumpah liau garan
Kan bacarai jo Koto Tujuah
Salamo Bujang nan Sambilan
Iyo tingga di nagariko
Tuangku kahilangan surang
Liau kahilangan baduo
Labiah parah tu di baliau."

Taisak kini Tuangku Rajo
Tagak inyo maninggakan rapek
Indak amuah mangecek lai
Inyo naiak ka Ustano
Diantakan Datuak Bandaro Sati.

Bakato kini Majo Lelo
"Manolah rapek saandiko
Sarato urang duo jinh
Nan manuduah nan dituduah

Putusan tadi alah tagak
Indak dapek diungkai lai
Hari Sanayan duo lali tujuah lai
Kito barapek mah babaliak
Nyo takahkan palu ka landasan
"Denai tutuik rapek nangko."

Urang nan tagak duduak baliak
Dek balerung digoyang gampo
Patuih tungga manembak pulo
Baguncang saluruah Koto Tujuah
Takuik lah urang kasadonyo
Balari urang ka halaman
Untuang gampo tu indak lamo

7. Sapakan sabalun mati

Katiko gampo indak taraso lai
Urang naiak ka Ustano
Nasi manantik di hidangan
Kabanyakan dari urang ko
Labiah-labiah nan tuo-tuo
Nasi asa dikakok sajo
Sasuok duo dibaok ka muluik
Tangan dibasuah inyo lai
Bakato kini Kambang Aruih.

”Mano Mamak Mandeh jo Ayah
Bapak-bapak kasadonyo
Mangapo nasi indak dimakan
Mambaok Upiak rusuah sajo
Batambah latiah malah kito
Kok habih sakik kasadonyo
Siapo maanta ambo ka gunuang
Upiak mintak padō sadonyo
Bagalak-galak kito garan
Mamatiak rabab jo kacapi
Sarato gandang jo rabano
Baitu canang jo talempong
Sambia badendang basinanduang
Iyo basaluang jo mambuek makanan
Dubalang disurauah mancari buah
Mano nan musim di bulan ko
Dalam hari nan tujuah ko
Kito bagadang siang malam
Siapo takantuak pai tidua

Siapo manangih Upiak hukum
Indak bilih basuo jo Upiak
Iyo urang nan manangih tu
Tando ndak sayang nyo jo Upiak
Kok banyak juo nan manangih
Upiak iyo kan mamakiak-makiak
Maluluang maruang-ruang
Maratok manghantam lantai
Bagolek-golek di Ustano ko
Dari ujuang sampai ka pangka
Mari kito bagadang hati
Hari sapakan raso sahari
Kalau kito berang rusuah risau
Dandam kasumaik dalam hati
Urang salah rasokan ditalan
Manggigia badan tulang lamah
Iyo panyakik nan ka tibo
Hari sapakan raso satahun.

Mano kalian pajapaja
Dayang-dayang dalam Ustano ko
Sarato dayang rumah baru
Bagageh kalian adiak kanduang
Angkeklah nasi jo samba ko
Indak ado lai nan makan
Sadiokan nasi untuak mamak
Nan di ateh anjuang Ameh
Ambo kan naiak mah sabanta
Maliekkan Mak Tuo ko makan.
Lah sudah Datuak Tumangguang makan
Disudukan dek si Kambang garan
Tadanga kacapi dimainkan
Diikuikkan rabano lambek-lambek
Mangecek si Kambang garan
Inyo manyuruah dayang-dayang
Manjapuik bunyi-bunyian
Dari anjuang di rumah gadang baru

”Mamak iyo nak sato pulo

Duduak basamo jo kalian
Untuak paubek hati risau
Lah sanang hati urang banyak.

Bakato kini Mambang Aruih,
"Manolah kito nan sabanyak ko
Mamak Andeh, Ayah jo Kakak
Baitu pulo Adiak-adiak
Upiak ko iyo dukun pandai
Upiak tahu maliek ragam panyakik
Kito iyo sakik kasadonyo
Ado nan alah parah bana
Ado nan kurang mah parahnyo
Tapi iyo payah juo garan
Indak barapo mah nan enteng
Dangakan kini Upiak sabuik
Patamo parah itu garan
Iyolah kakak Sutan Gadang
Kaduo kakak Majo Lelo
Katigo ayah kanduang Upiak
Kok indak pandai manyabalahkan
Amuah malaruik panyakikko
Buliah sampai saumua hiduik
Dek banak jo utak nan lah kanai
Kok lah laruik itu isuak
Kak Gadang kan galak gadang
Dari pagi sampai patang
Inyo dikaja panyasalan
Kak Majo maninju-ninju dindiang
Manghantak manghantam tanah
Panyakik disababkan dek sangek berang
Ayah managih jo bamanuang
Di tapi tabek, danau jo talago
Malantua-lantua ujuang jarì.

Nan kaduo parah itu garan
Mamak Sutan Rumah Panjang
Mamak Rajo Tuangku Tuo
Sarato Andeh kanduang Upiak

Kalau urangko indak ditolong
Iyo ditolong dari kini
Nyo mungkin lumpuan — layua
Sakik kareh muntahkan darah
Dek rabu jo hati nan lah hancua
Kuruih kariang inyo ko isuak
Tingga kulik pambaluik tulang
Mato sirah bibia pucek
Kulik hitam bak tapanggang.

Katigo iyo nan kan parah juo
Panyakik Kakak Datuak Tungga
Sarato Kakak Mambang Langik
Kok dibiakan balaruik-laruik
Indak amuah manyabalahkan hati
Mungkin gilo mungkin pasiak
Badan lumpuan, dagiang pai
Sabanta manangih sabanta galak
Banak jo hati nan lah hancua
Tantang amai Nan baduo
Hindun Sari jo Reno Intan
Iyo urang sakik juo
Tapi lai kan lakeh cigak
Dek banyak karajo dihadoki
Nan tampak tacenai juo
Iyo Mak Datuak Manti Tuo
Sarato Mak Datuak Bandaro
Tapi kan lakeh juo cigak
Dek inyo urang bijaksano.
Ado pulo saurang lai
Bukan hatinyo digambilakan
Tapi iyo inyo tu bana
Haruih dijago baiak-baiak
Lah duo kali dari cako
Mamacik hulu pisau tajam
Ambo mancaliak nyo suruakkan
Babahayo itu beko Mamak
Dahulu inyo dari ambo.
Tagak kini Sutan Majo Lelo

”Mano Adiak sayang Kakak
Kito Diak sayang samo pandai
Dari tadi Kakak ramalkan
Itu mah mungkin nan tajadi
Kok Upiak indak ado lai
Dari tadi alah tampak
Di badan kakak alah taraso
Kapalo pusiang mato kabua
Pangana ilang-ilang pulo.”

”Upiak indak amuah garan
Sagalo itu kan tajadi
Dek batuang sarueh rusak
Punah tandeh sarumpun sajo
Rugi nagari Koto Tujuah
Panyakik tu dapek diubek
Maubeknyo iyo diragu jo nan lain
Sibuak kito jo karajo
Cari nan kan manggadangkan hati
Kito badendang basinanduang
Iyo manyanyi jo manari.”

Tagak kini Datuak nan Tungga
Mamacik sahalai saputangan
Dikabeknyo Sutan Rumah Panjang
Manari manyanyi nyo baduo
Tarinyo wakatu inyo mudo.

”Iyo, iyolah iyo si Banio
Pagi digatak si Barabah
Iyo, kato siapo nadak kan iyo
Bulan di muko kami nikah.

Pantun tu dijawek garan
Iyo dek Puti Kambang Aruih.

Tanah, tanah liek jatuah badarai
Ditimpo dahan batang manggih
Taragak-taragak jadi marapulai
Pulang ka kampuang yo manangih
Lah duduak urang nan baduo

Diambiak kini buluah parindu
Iyo dek Datuak Tumangguang garan
Inyo iyo pandai basuliang
Alah gak galak nan mudo-mudo
Banyak nan amuah mairiangkan
Iyo jo rabab jo kucapi.

Tagak kini Sutan Mambang Langik
Dikabeknyo kawannya limo urang
Disuruh naiak ka Ustano
Diambiaknyo rabano 6 buah
Diajaknyo manari indang jo rabano
Malagu basamo-samo garan.
Kalau harilah barambang malah patang
Anak bidadari yo duduak marangkai bungo
Jiko takuik bayayo kan datang
Anak gaduh urang diago usah diago.

Kalau hari lai barambang malah patang
Anak bidadari yo juntai, duduak bajuntai
Kalau takuik yo dilimbua pasang
Usah barumah yo rumah di tapi pantai.
Sabab hari alah badaruik sanjo
Dek dama alah tapasang
Andeh Suri Ustano gadang
Mamintak rang masuak ka ruang tangah
Nasi manantik di hidangan

”Baurak silo malah kito
Makan basamo kito kini.”

Alah agak elok tampak suok
Alah talulua iyo nasi
Gadanglah hati Kambang Aruih
Lah sudah minun jo makan
Nak tagak Manti jo Pangulu
Mamintak pulang inyo garan
Bakato kini Kambang Aruih
Manolah Niniak Mamak ambo
Iyo Manti jo Pangulu

Kawani juo kami garan
Iyo di dalam sapakan ko
Sabuah pulo pintak ambo
Kakak Mambang buliah ka mari
Iyo sakali sajo garan
Untuak basuo jo ambo ko
Indak doh buliah duo kali
Cako ko inyo alah naiak
Kamih pagi inyo pulang
Itu namonyo yo sakali
Kok ibo pado Mak Sutan Panjang
Payah ka sinan jo ka mari
Kabuakan pintak ambo iko
Sabagai pulo itu garan
Mangapo urang ko di sinan nantik
Tantu manangih jo bamanuang.

Sabagai pulo tu Mak Manti
Dusanak hambo Bujang Sambilan
Ajak juo pai ka Gunuang
Hari Sinayan nan kan datang
Nak langkok karik dusanak ambo
Urang nan dari Koto Di tangah.”

”Bijaksano anak Mamak.”
Katonyo Datuak Manti Tuo
Indaklah ado nan mangana
Tantang Tuangku Sutan Panjang
Nan kapayah kahilia ka mudiak
Mandaki manurun pulo
Sasuai sajo kami sayang
Mambang Langik ditahan siko
Iyo kok batahan inyo namonyo
Sabagai pulo itu garan
Bujang Sambilan Upiak kana juo
Indak ado dandam kasumiak
Iyo ambo satuju sajo
Mungkin nan lain indak manulak.”
Tagak kini Sutan Mambang Langik

”Manarimo suko ambo Ayah
Mangapo ambo bamanuang sinan
Di siko urang badendang sayang.”

Tagak pulo Sutan Nan Gadang
”Mangapo kami indak kan pai
Iyo maanta nan baduo
Nan kami banci parangainyo
Badannya darah dagiang kami
Sabagai pulo itu garan
Kok ndak ado kami nan manuntuik
Dilapehkan sajo nyo ka rimbo
Iyo sakali keduonyo
Siapo urang kan manukeh
Adaik kinilah banyak dilangga
Putusan banyak nan barubah.”

Bakato pulo Manti Tuo
”Ampun hambo Tuangku Rajo
Sarato Tuangku Tungkek Nagari
Pulang malah kami dahulu
Kan barulang juo ka mari
Talabiah ambo nan tuo ko
Ingin malipua lipua hati
Iyo mambujuak-bujuak jio
Buliah indak taraso bana
Iyo baban nan barek ko
Manolah Upiak Kambang Aruuh
Barisuak Mamak ka mari
Basamo Puti Amai Upiak
Dari pagi inyo manangih sajo.”

Barisuaknyo hari Salasa
Batambah banyak urang duduak
Tuo mudo badatangan dangai
Kawan si Mambang Sutan-sutan
Kawan si Kambang Puti-puti
Maalum anak mudo-mudo
Kalau basuo samo mudo

Talipua juo raso susah.

Hari Rabaa baitu pulo
Hari Kamih pagi-pagi
Baru taraso dek nan banyak
Bahaso inyo kan bapisah
Lah naiak kudo Mambang Langik
Mamakai pakaian marapulai
Tapi badeta sabang-sabang
Alun lai buliah pakai saluak
Dek inyo iyo bujang baru
Di balakangnya duduak Andehnyo
Nan kan maanta hingga tapi rimbo
Sagalo urang dari Ustano
Pakai kudo kasadonyo
Puti 'duduak di balakang
Si Kambang sakudo jo kakaknyo
Iyolah Sutan Majo Lelo
Puti nan lain habih manangih
Inyo tasanyum kida kanan
Kudonyo pambukak jalan
Dek kakaknyo Tungkek Nagari
Lah sampai ka tapi rimbo
Lah turun sadonyo dari kudo
Rayaik balari-lari anjiang
Lah banyak pulo mah nan sampai
Tagak si Mambang ateh batu
Iyo batu nan agak tenggi
Di kida kanannya Kasumbo Ampai
Sarato Mandehnyo Reno Sari
Di balakang ayahnyo nan baduo
Sarato Mamaknyo Datuak Gempo Alam
Tamasuak pulo Datuak nan Tingga
Di dapannya si Kambang Aruih
Diapik puti Hindun Sari jo Puti Reno Intan
Di kida Datuak Manti Tuq
Di kanan Datuak Bandaro Sati
Indak ado urang nan manyusun
Mancari tampek surang-surang

Alah rami Manti jo Pangulu
Sarato Pandeka jo Dubalang
Ditambah pulo dek rayaik
Baru bakato Mambang Langik
Aia matonyo jatuah badarai
"Manolah Andeh jo Ayah kasadonyo
Niniak mamak sanak sagalonyo
Ambo bajalan hanyo lai
Relakan sagalo nan tamakan
Mahapkan sagalo kasalahan
Ambo tarimo hukuman ambo
Tapi sabuah itu dangai
Ambo basumpah indak basalah
Langik jo bumi sasi ambo."

Disusunnyo jari nan sapuluah
Diadokkannya ka muko ka balakang
Iyo ka kida jo ka kanan
Dinaiakkannya tangan tenggi-tenggi
Tampak kini baapo tampannyo
Bak Mambang turun dari Langik
Tabaok namo dek romannya
Balari inyo ka kudo garan
Sakali lompek inyo naiak
Dipaciknyo tali kuaik-kuaik
Indak inyo malengong lai
Dituruikkan urang nan anam baleh
Pangulu Pandeka jo Dubalang
Tarauang urang nan tingga
Habih manangih kasadonyo
Si Kambang juo mah nan tanang
Indak bariak indak bagalombang
Sarupo taluak indak dapek angin
Lakeh-lakeh iyo garan
Iyo Sutan Maharajo Lelo
Naiak nyo ka ateh kudo
Dinaiakkan ayahnyo si Kambang Aruih
Dipacunyo kudo kancang-kancang
Langsuang sakali ka Ustano

Tibo di rumah nyo bagolek
Nyo suruah si Kambang naiak anjuang.

Barisuaknyo hari Jumahaik
Lai mah urang rami juo
Tapi rami dek nan tuo-tuo
Indak barapo lai nan mudo
Nan mamaçik bunyi-bunyian
Lah banyak mangecek iko itan
Iyo mamuji nan baduo
Kambang Aruih jo Mambang Langik.

Hari Satu baitu pulo
Lah payah si Kambang maagiah samangaik
Urang alah latiah alah lintuah
Talabiah isi Ustano garan
Sampai Mak inang jo dayang-dayang
Lah habih bileh mah matonyo
Untuang karajo iyo banyak
Indak buliah inyo bamanuang.

Hari Ahaik lah tibo pulo
Disuruah guguah iyo tabuah
Digua aguang sakali sajo
Tando rayaik disuruah datang
Iko pintak si Kambang Aruih
Lah datang urang kasadonyo
Lah panuah tampak halaman
Urang tagak basasak-sasak
Tagak inyo di pangka tanggo
Sanyum kida sanyum kanan
Bakato inyo maso itu.

”Mano Andeh sarato Ayah
Mano Mamak sarato Amai
Andeh ketek Andeh Tangah
Andeh gadang Andeh bungsu
Ayah tuo ayah mudo

Mamak tuo mamak mudo
Baitu Amai nan tuo mudo
Kakak jo adiak kasadonyo
Dangakan malah kato ambo
Lapeh ambo bajalan jauah
Relakan nasi nan tamakan
Mahapkan sagalo kasalahan
Lapeh jo muko barasiah hati suci
Usah ambo ditangisi.

Sabagai pulo nan kan ambo sabuik
Ambo iyo bamimpi buruak
Gunuang tujuah malatuih garan
Iyo manyimpan bangkai ambo
Inyo kan maluahkan isuak
Mamuntahkan dari paruiknyo
Basahlah badan Koto Tujuah
Jaleh disabuik dek rang Tuo
Nan datang bakeh ambo
Patang Kamih malam Jumahaik
Lambek lakeh nyo iyo garan
Indaknyo sabuik dalam mimpi.

Tapi lai nyo sabuik juo
Nan barutang nan kan mambayia
Nan bana iyo tagak luruih
Mamintak kito padō langik
Iyo di tampek surang-surang
Ditadahkan tangan tenggi-tenggi
Dipuji langik nan mulia
Dibuangkuakkan badan ka tanah
Ditakuakan batu kapalo
Tangan dilutuang kida kanan
Sarahkan diri padō bumi
Unjamkan lutuang nan duo
Tinggikan talapak kaki
Tumpukan ujuang induak jari
Latakan kaniang di tanah
Cium bumi nan batuah

Mintak inyo kasiah ka kito
Baiko niniak tuyang kito
Iyo mamintak ka langik jo ka bumi
Usahlai pulo kito takuik
Langik iyo pambari mahap
Baitu bumi nan batuah.

Barisuak usah pai pulo
Maanta ambo naiak gunuang
Gunuang tenggi hari kok paneh
Kok hujan labek payah pulo
Licin malah jalan nangko
Iyo nan dakek mah ka puncak
Jalan tagak bak sigai anau
Indak pulo batakuak-takuak
Payahlah kito kan mamanjek
Talabiah urang parampuan
Di siko ambo sanak lapeh
Nak salamaik ambo di jalan.”

Batambah kareh tangih urang
Si Kambang masuak ka dalam
Langsuang sakali naiak Anjuang
Dituruukkan dek Andehnyo Kasumbo Ampai.

8. Hari taakia dek Si Kambang.

Wakatu makan tangah hari
Lai mah turun inyo garan
Tampak dek inyo di siko sinan
Urang bagolek baguliangan
Sapanuah Ustano nan gadang
Ayahnyo, Kakak, jo Mamaknyo
Iyo mamaknyo Sutan Panjang
Barampek garan jo Tuangku
Iyo Tuangku Datuak Tungga
Di dalam lamin iyo bagolek
Di antaro banta-banta banyak
Iyo di lamin tampek Rajo
Sagalo Manti jo Pangulu
Iyo di lapiak pamadani garan
Nan tabantang sapanuah rumah
Nan mudo-mudo yo ruponyo
Sato pula nyo tagolek
Di sarambi muko Ustano tu
Bakato si Kambang kareh-kareh.

”Mamak jo Ayah, Kakak-kakak
Mari kito makan basamo
Barisuak kito kan mandaki
Di mano ado kakuatan
Kok rusuah risau macam iko
Ambo nan ketek kuaik juo
Mangapo nan gadang jo nan tuo
Amuah didayo dek ibilih
Maro ketek kito hadoki

Alah baiko mah sadonyo
Kunun kok tibo maro gadang
Di mano ado kakuatan.

Lah duduak surang baduo
Dituruik pulo dek nan lain
Alah mah masuak ka ruang tangah
Di sinan nasi dihidangkan
Naiak si Kambang ka Anjuang Ateh
Pai maimbau Tuangku Rajo.

”Mamak rajo lakeh lah ka bawah
Mari kito makan basamo
Liek dek mamak ujuang tapi
Sadonyo bagolek bagalimpangan
Bak urang kalah dalam parang
Mamak nan patuik jadi conto
Iyolah kalah dek ibilih
Kok kunun pulo nan banyak tu.

Lah turun Rajo dari anjuang
Baru bagageh kasadonyo
Duduak basamo di ruang tangah
Maadoki nasi nan tahidang.

Disanduak nasi dek si Kambang
Iyo ka piriang nan tuo-tuo
”Nasi ko paralu Mamak habihkan
Kok indak berang ambo beko
Indak pulo amuah ambo makan.”

Balari pulo si Kambang ko
Iyo ka dalam biliak gadang
Diimbaunyo Andeh jo Amainyo
Ado baduo tigo lai iyo nan lain-lain
Tamasuak Mandeh Rubiah.

”Mano Andeh sarato Amai
Mangapo mangko lalai juo
Bapak-bapak alah manyuok
Nasi tahidang untuk kito

Di pangka ruang tangah garan
Haruuh kuaik batin jo jio
Maagiah kakuatan ka laki-laki
Urang ko badan tubuahnyo mah nan kuek
Hati jionyo iyo lamah
Kok baiko caro rang padusi
Maadoki parang, gampo bumi
Baitu banjia kabakaran
Handam karam kasudahannya
Laki-laki indak amuah makan
Kakuatannya lari sandiri
Tapi inyo kito paso garan
Dek sayang inyo ka kito
Inyo iyo kan amuah juo garan
Rang mamaso haruuh maagiah conto.”

Lah tagak sagalo Andeh-andeh
Babaliak si Kambang ka Bapak-bapak
Disuoknyo duo tigo suok
Dari piriang ayahnya garan
Baitu pulo dibueknyo
Tahadok mamak jo kakaknya
Tibo di piriang Datuak Tungga
Nasi alun disuok-suok juo
Ditambah si Kambang duo tigo sanduak lai
Inyo sandiri mulai manyuok
Bakato inyo maso itu
Sambia manapuak bahu urang ko
Kakak Rajo kato Kakak
Rajo nagari Palimbayan
Nagari rami nagari gadang
Baapo gran caro Kakak
Mamarintah urang nan banyak
Malawan musuah kida kanan
Urang Rajo Kak haruuh kuaik
Kuaik tubuah kuaik jionyo
Jadi conto pado nan banyak
Dalam sagalo buatan karajonyo
Kakak tinggakan nagari Kakak

Untuak pai, untuak pai, bagadang hati
Indak sadonyo urang suko
Talabiah anak bini Kakak
Kakak pulang sakik, lumpuah, layua
Patah hati patah samangaik
Untuak makan sajo indak badayo
Kok kunun untuak nan lain,
Ambo ko tantu kanai kutuak
Dek ambo sabab karanonyo
Mangko baitu jadi Kakak
Indak amuah ambo garan
Habihkan nasi iko Kakak
Kok indak Upiak berang bana.”

Lah nyo makan duo tigo suok
Baru manyuok Datuak Tungga
Lai habih nasi sapiriang
Baru si Kambang tagak kini,
Di hadapan Niniak Mamak Upiak,”
Galak badarai Kambang Aruih
Galakko iyo galak tasabuik
Tasabuik di Koto Tujuah
Kok ado pajak galak manih
Iyo bunyi galaknya nyariang
Ditambahkan itu garan
Dikatokan galak Kambang Aruih
Tapi pado maso itu
Galak bacampua aia mato
Aia mato manghujan labek
Galak tasalek dalam risau
Bak paneh manganduang hujan
Tatagak kini Majo Lelo
Diraihnyo adiaknya ka palukan
Usah baulah Adiak sayang
Handam karam duria ko beko
Kakak antok bukan takuik mati
Kakak iyo takuik parang
Ibo dinyao nan baribu
Ibo pado mamak kito

Lah kuaik Upiak sapakan ko
Lah kukuah tagak bak benteng basi
Usah taban, usah rubuah
Dalam hari sahari ko.”

”Mangapo pulo Kakak cameh
Upiak galak aia kalua
Kan biaso itu Kakak
Andeh ketek adiak ayah
Kok datang inyo ka mari
Upiak dipaluak sambia galak
Aia matonyo bacucuran.”

Sudah makan rang makan siriah
Babaliak ka ruang tapi
Diambiak rabab kucapi suliang
Bunyinyo indak bakanantuan
Tapi urang indak pai lalok
Urang jauah banyak nan datang
Dari Bayua, Sungai Batang
Rang Tiku rang Lubuak Basuang
Ruponyo baru nyo mandanga
Kak Rajo Datuak Gampo alam
Kudian pulo dari dusanaknyo nan lain
Dek bakaba babarito garan
Habih hari samalam tu
Lah laruik malam baru tidua.

Pagi-pagi urang baase, jo tanju
Jo kudo banyak-banyak
Babagai karajo nan dibuek
Padusi batanak jo manggulai
Manyadiokan bungo tujuah ragam
Tabik paneh baru barangkek
Si Kambang iyo dipakai
Dipakai bak anak daro
Basubang galang dari ameh
Pandiang jo dukuah ameh juo
Kain salendang banang ameh

Baju baludu nan batalua
Rancak nan bukan alang-alang
Mambuek gilo Datuak Tungga.

Katiko si Kambang naiak tandu
Urang yo tagak bakuliliang
Taluluang kareh Datuak Tungga
Untuang iyo sakali sajo
Muluiknyo dipakok dek Tuak Panjang
"Mangapo kawanko garan
Kito sadonyo samo sakik
Kok baitu pangsan kasadonyo
Si Kambang dicancang dek musuahnyo
Apo jadinyo Koto Tujuah.

Lah naiak si Kambang garan
Lai tasanyum Kambang Aruih
Si Kambang ditandu sapanjang labuah
Nan ado di Koto Tujuah
Katujuah kampuang dikuliliangi
Baru pai ka tapi rimbo
Lah sampai ka jalan nan mandaki
Alah turun si Kambang kini nangko
Naiak kudo inyo lai
Di balakang kakaknyo Majo Lelo
Sakalian padusi nan kan pai
Duduak di balakang bapak-bapak
Urang manganta indaknyo pulang
Bamacam-macam parangainyo
Ado nan turuik bajalan kaki
Ado nan duduak tapi labuah
Bamanuang malantua jari
Ado nan masuak gubaak-gubaak
Nan ado di tapi jalan.

Urang nan bakudo itu garan
Indak sampai pulo ka puncak
Dek tabiang puncak tagak bana
Bajalan kaki urang kini
Samo marangkak nyo ka ateh

Untuang hari ado rancak
Indak hujan indak paneh bana
Mato hari ditutuik awan putiah
Tangan si Kambang dipacik kakaknyo
Sabalah dipacik Datuak Tungga
Gampo Alam mambuka jalan
Iyo baduo jo Kak Rajonyo
Datuak Tumangguang jo Reno Intan
Di balakang si Kambang Aruih
Sutan Rumah Panjang Kasumbo Ampai
Di balakang itu pulo dangai
Baitu sataruihnyo sampai ka balakang
Bia jalan alah dirambah
Dek dubalang jo urang kampuang
Tapi urang indak babaruh banyak-banyak
Baduo-duo inyo naiak.

Kok si Kambang panek mandaki
Tagak Inyo sabanta dinan data
Bapantun inyo maso itu.

”Bukik putuih tampek baladang
Dirandang jaguang diangui
Hukum putuih badan tabuang
Didaki gunuang ditangisi.

Lah habih pantun sabuah
Bajalan pulo inyo lai
Marangkak naiak ka gunuang
Pakaian iyo barek pulo
Lah tibo pulo di nan data
Bapantun pulo inyo ciek.

Tulang putuih dipancuang urang
Dipancuang urang nak ka ladang
Kambang Aruih balayia surang
Balayia diparuik Ula gerang.

Sabanta lai baranti pulo
Bapantun pulo inyo kini
Urang haniang kasadonyo
Indak ado nan manyatou
Cuman Bujang Sambilan nan batapuak
Kadang basurak indak tantu arah.

”Kain dikabek jo rotan sangik
Kain tapanggang yo dek puntuang
Ingin kawin jo Mambang Langik
Ula Gerang mah nan baruntuang.”

Pantun kaampek babunyi kini
”Tangga tali pangabek kudo
Kudo dikabek mangarintang
Tuak Tungga harok kawin mudo
Iyo diambiak pambahaya utang.

Baitu sampai ka puncak garan
Suaronyo nyariang bak biaso
Disawuiti sipongang kida kanan.
Pantunnya lah tibo di tapi kawah.

Tanah liek di Bukik Putuih
Dibuekkan pinggan tampek makan
Habih riwayaik Kambang Aruikh
Tamaik carito Bujang Sambilan.

Tak ado sayak nan baaleh
Ndak ado kumbang dalam aia
Ndak ado cakak ndak babaleh
Ndak ado hutang nan ndak kan dibayia

Ka tabiang kito ka tabiang
Ka tabiang mambaok aka
Basandiang Upiak basandiang
Basandiang dalam paruik Ula.

Pantun habih nyo malumpeks
Tangango urang kasadonyo

Urang tacangang pulo kini
Dari sabalah ilia urang banyak
Ado pulo urang malumpek
Katiko dicenai bana-bana
Jaleh urang tu Mambang Langik
Tapakiak Andeh jo adiaknyo.

Baranang si Mambang sakuaik tulang
Bakato inyo maso itu.
"Kambang Aruih kasayangan urang banyak
Indak buliah bajalan surang
Ambo manjadi *panjagonyo*."

Lah pangsan garan Kasumbo Ampai
Ditangkok si Lelo kapalonyo
Gampo Alam manangkok kaki
Dihelo sajo turun tabiang.

Baitu si Hindun Sari garan
Sarato Andehnyo Puti Diateh
Dihelo kan ayahnyo jo rang lain
Andeh ditolong Manti Pangulu.
Manti Tuo sarato Datuak Tungga
Manantang juo ka dalam aia
Aia janiah riaknyo tanang
Indak doh tampak ula gerang
Indak ado buayo putiah
Nan tampak iyo si Mambang
Manyalam tantang si Kambang malumpek.

Ado sabanta antaronyo garan
Bakato Datuak Manti Tuo
"Kok indak barek pakaianyo
Si Kambang pandai nyo baranang
Danau di bawah kan ado pulo
Di tapi nagari Koto Tujuah
Acok inyo baranang sinan
Basamo puti-puti lain.

Inyo diagiah pakaian banyak

Buliah lakeh nyo tabanam
Indak dilulua ula gerang
Bia ditalan gunuang Tujuah.

Ula indak ado tampak
Mungkin inyo takuik datang
Meliiek urang nan banyak ko
Kito nantik sabanta lai.

Sudah sabanta maso lalu
Tampak aia bariak kareh
Agak jauah iyo ka hilia
Indak jaleh doh mah dangai
Antah dek duo kapalo paja-paja
Antah dek Ula gerang
Iyo duo jo buayo putiah.

Dek hari alah agak sanjo
Urang alah pulang kasadonyo
Salain bujang nan sambilan
Inyo ko saruman urang gilo
Manari-nari di tapi talago
Manukiak-nukiak kareh-kareh
Maimbau namo Kambang Aruih
Galak-galak sarupo ibilih
Jijik Datuak Manti Tuo
Dihelonyo tangan Datuak Tungga
"Mari kito lakeh pulang
Banci ambo iyo garan
Maliiek parangai paja-paja ko
Indak lah pulo paja bana
Batigo tuo dari Majo Lelo
Jauah tuo dari Mambang Langik
Tapi dek indak dapek pangaja
Dari Ayah jo andehnyo
Baiko mah jadinyo Datuak.
Satibo urang ko di tampek kudo
Baru Tuangku Tungkek Nagari
Bagarak pulang mambaok Andehnyo
Untuang Andehnyo lah tahu diri

Dapek di baok naiak kudo
Dikapiknyo jo tangan kida.

Lah tibo urangko di rumah inyo
Indak langsuang ka Ustano
Diantakan si Lelo iyo Andehnyo
Naiak kateh anjuang Ameh
Inyo naiak ka Anjuang Perak
Iyo ka biliak Kambang Aruih
Manalungkuik inyo ateh katia
Samalam tu indak bagarak-garak
Ayahnyo lai datang maliek
Tapi indak digaduahnyo garan
Buliah inyo malapehkan tangih
Nan tatahan dalam sapakan.

Barisuaknyo urang bakumpua
Iyo kuliliang tilam bungo
Tilam bungo di muko lamin
Urang manangih yo maratok
Tapi bukan doh andehnyo
Andeh nyo lai duduak sinan
Indak inyo babunyi-bunyi.

Hari Rabaa barisuaknyo pulo
Iyo Sutan Majo Lelo
Alun juo datang ka Ustano
Datang ka inyo Hindun Sari
Sarato Ayah jo Andehnyo.

Si Hindun masuak kadalam
Dituruukkan dek Andehnyo

”Manolah Kak Lelo Kakak sayang
Mangapo Kakak cando iko
Apo pasan si Kambang Aruih
Kapado kito kasadonyo
Inyo indak amuah diratoki
Baitu pulo Kakak Upiak.”

”Manolah Adiak Hindun Sari
Kakak indak doh maratok
Kakak iyo sakik kini
Handak batanang kakak bapikia
Usah kakak digaduah-gaduah
Takasa kakak bakeh Upiak
Kok ibo hati Upiak beko
Mintak ka mari Mamak Panjang
Sarato Tuangku Datuak Tungga
Kakak iyo nak mangecek.”

”Liau lai mah dilua
Upiak imbau liau dahulu,”
Lah datang urang nan baduo
Bakato garan Majo Lelo
Ambo mandanga dari Mak Manti
Mamak kan pai jo Tuak Tungga
Ka nagari Palimbayan nan agak jauah
Untuak batanang-tanang diri
Ambo iyo satuju bana
Kok kito di siko' juo
Indak kan tanang utak kito.

Nan saeloknyo iyo garan
Mamak barangkek mah barisuak
Andeh jo si Hindun Mamak baok
Kok satuju Tuangku Datuak Tungga ko.

Kami barangkek hari Sinayan
Iyo kami batigo garan
Barampek jo Ayah Rajo sinan
Iyo ka nagari Palabihan
Kok alah tanang Andeh isuak
Ambo datang mah barundiang
Tantang ambo jo Hindun Sari
Kini elok dianiangkan sajo
Utak ambo sadang panuah
Nantik pulo kito pikiakan
Bilo kan baliak ka nagari ko.

Sabuah pulo itu Mamak
Mimpi ambo iyo samo bana
Jo mimpi si Kambang nan disabuiknyo
Di malam tu juo ambo bamimpi
Cuman ujuangnyo agak lain
Rasonyo urang kaduo tu
Mangaja ambo dari jauah
Mamacik suluah di tangannya
Padohal hari indak malam
Inyo datang bapacik tangan
Sakali baduo nyo mamaguik
Tabayang dek ambo kini nangko
Urang ko lai hiduik juo
Ataukah inyo indak iduik
Ambo malah mak kan mati
Pendeknyo kami kan lakeh basuo.”

”Kito pintak padō langik
Mudah-mudahan nan elok nan tasuo.”

”Tapi tantang nagari ko garan
Agak rusuah ambo Mamak
Jaleh bana disabuikkan
Iyo dek urang tuo nan tun
Gunuang Tujuah nyo kan muntah.”

”Kok barisuak kami pai
Bilo kito basuo lai
Kok pai sajo kito samo
Ka Palimbayan nagari ambo
Alun kan balabiah urang surang
Mamak jo mintuo ka Palabihan.”

”Ambo iyo amuah sajo
Pai ka mano-mano jo Tuangku
Asa jangan di Koto Tujuah ko
Tapi kasihan Andeh ambo
Kok mabuak bana inyo beko
Bisuak pagi ambo ka Koto Ateh

**Basamo kito ka Ustano
Mamak ndak elok pai sajo
Batamu dahulu jo Mamak Rajo.”**

9. Penutuik.

Hari Sinayan ciek lai
Sasudah si Kambang masuak talago
Barangkek Datuak Gampo Alam
Iyo jo anak jo bininyo
Barang balian inyo baok
Barang pusako nyo tinggakan
Cuman pakaian Kasumbo Ampai
Indak ditarimo dek kakaknyo
Dek indak ado lai katurunan
Nan patuik mamakai itu.

Urang barangkek dari Ustano
Manunggang kudo duo ikua
Surang dayang mintak di baok
Andehnyo indak ado lai
Dilapeh Tuanku Datuak Tumangguang
Jo tangih kareh itu garan.

”Pai kalian kasadonyo
Sabatang tubuah ambo ditinggakan
Nak pai lamo mah tampaknyo
Sagalo harato kalian baok
Si Upiak si Kasumbo Ampai
Iyo kan gati Andeh Ambo
Si Buyuang Sutan Rumah Panjang
Iyo pangganti Ayah ambo
Kini lah pai kasadonyo
Kalian baok anak kalian

Langang nagari Koto Tujuah
Anak ahmbo nan basalah
Kaambo kalian berang
Jo siapo kakak Upiak tinggakan
Iyo Upiak Kasumbo Ampai
Urang Lawang sajo Upiak tinggakan
Kok elok, tantu nyo sayang
Kok lah sakik babaun busuak
Urang sadarah nan kan sayang.

Upiak pai ka rantau urang
Rumah Upiak iyo iko
Sawah ladang Upiak di siko pulo
Usah Diak kakak Upiak tinggakan
Lah payah niniak moyang kito
Manaruko sawah ladang kito
Siapo isuak nan kan buliah.

Bakato Puti Kasumbo Ampai
Kakak kanduang balahan jiwo
Kok taduah galombang, pai kabuik
Lah tarang tanah kan dipijak
Lah tanang garan hati Upiak
Tantu babaliak Upiak ka mari
Mangapo Upiak di rantau urang.”

Dipaguik si Kasumbo kakaknyo tu
Baitu pulo Puti Ambun Pagi
Indak inyo bakato lai
Dinaiakkan inyo ka kudonyo
Nan sadang dipacik dek dubalang
Manyambah pulo Majo Lelo
Iyo ka urang nan baduo
Anaknyo ndak tampak surang juo
Sanang hati Sutan Majo Lelo
Indak bapai batinggalah
Iyo jo urang nan sapuluah ko.

Lah basalam Datuak Gampo Alam
Sarato iyo Kak Rajonyo
Barangkek urang nan barampek
Maninggakan Tuangku Datuak Tumangguang
Sarato Ustano jo nagari
Iyo nagari Koto Tujuah.

Barek taraso dek Puti Kasumbo
Maninggakan nagari tumpah darah
Tabayang Ayah jo Andehnyo
Inyiak jo Anduang iyo pulo
Tapi indak mah nyo sabuik
Hatinyo padiah pikiran kusuik
Dituruiknyo kandak Majo Lelo.

Duo hari urang tu dijalan
Bamalam di Piaman garan
Ado karik jauahnyo mah di sinan.
Di Palabihan itu garan
Urang iyo bagadang hati
Dusanak rajo iyo surang tu
Indak nyo baradiak nan padusi
Anaknyo indak ado pulo
Nan laki-laki itu garan
Si Majo buliah jadi rajo
Manuruik adaik nagari tu.

Sapakan urang di Palabihan
Gampo Gadang di Ampek Koto
Salingkaran gunuang Marapi
Takajuik urang kasadonyo garan
Nan mano gunuang nan malatuuh
Gunuang Marapi jo Singgalang
Indak mungkin itu dangai
Dek puncaknyo lai tampak juo
Takana si Lelo jo mimpinyo
Inyo kecekkan ka Ayah jo Andehnyo
Nak pai maninjau garan
Maninjau ka Koto Tujuah.

Dipakainyo pakaian urang sudaga
Disalangnyo kudo ayah tuonyo
Diagiah ayahnyo dubalang surang
Iyo baduo nyo barangkek
Naiak kudo sikua surang
Pagi buto nyo barangkek
Pagi tasangai matohari naiak
Lah tibo inyo di Bayua
Nagari tu indak rusak bana
Tapi rumah indak barisi
Gampo iyo taraso juo
Tapi indak kareh bana.

Dari Bayua indak dapek taruuh
Tabanam tanah dek lumpua hangek
Nak ka Sungai Batang indak dapek
Nagari dibateh aia gadang
Urang tampak surang baduo
Laki-laki nan kuaik mah tampaknyo

Disapo si Lelo urang nantun
Batanyo inyo maso itu
"Manolah Kakak rang di siko
Bari jaleh ambo batanyo
Ambo ko urang Palabihan
Biaso manggaleh ka Koto Tujuah
Gampo lai mah taraso
Tapi indak kami tahu
Gunuang Tujuah mah nan jatuah
Tahukah iyo Kakak garan
Apo sabab karanonyo dangai
Takauik kami malieki
Utang piutang ado sinan."

"Manolah Adiak rang manggaleh
Kami ko iyo ndak rang siko pulo
Tapi lai mandanga kaba
Manuruik kato rang di siko

Gunuang Tujuah acok berang
Ula gerangnya indak diagiah makan
Dek itu inyo mutah-mutah

Dicari urang gadih rancak
Kamanakan rajo Koto Tujuah
Disambahkan urang ka Ula Gerang
Batambah berang Gunuang Tujuah
Mangapo garan urang bana
Urang nan tido basalah pulo
Kambiang biri-biri cukuik garan
Indak amuah Gunuang Malulua paja tu
Dimutahkannya mah ka bawah
Tibo di danau nan di bawah
Gadidilulua mah dek bumi
Tampak jaleh dari jauah.
Barasok tampeknyo tabanam.”

Tampak urang duo lai
Batayo pulo Sutan Majo Lelo
Balain bunyi caritonyo
Iyo ado Puti rancak
Tajun ka dalam talago ateh gunuang
Indak doh jadi pasambahan
Inyo dipaso mah dek Rajo
Iyo lalok jo Rajo tu
Rajo itu mamak kanduangnya
Dek itu inyo lari kateh gunuang
Tajun sakali ka talago
Urang mangaja yo talambek
Gunuang Tujuah berang bakeh Rajo
Dek itu nagari diimpoknyo
Rajo ndak tampak doh bangkainyo
Mungkin luluih samo jo paja tu.”

Babaliak si Majo lelo garan
Ka nagari Lubuak Basuang
Nyo lalu di sinan tangah malam

Alun lai tampak nagari itu
Katiko nyo tibo yo di sinan
Rumah banyak nan tabukak
Urangnyo antah di mano
Tampak rang gaek laki-laki
Batungkek-tungkek dakek rumah
Inyo batanyo kaurang tu
"Manolah Inyiak rang di siko
Batanyo ambo saketek
Apo carito Koto Tujuah
Habih koh urang kasadonyo
Atou mah lai juo tingga
Di mano urang tu kini?"

"Ambo yo lari katakutan
Baru kapatang ko babaliak
Kami lari arah ka lauik
Tapi tahinda hilia aia
Lai banyak nan salamaik
Baampua urang ko garan
Rang Bayua rang Sungai Batang
Koto Tujuah jo Lubuak Basuang
Bagalaù bunyi carito nyo
Alun lai jaleh mano nan bana
Sabalun gampo iyo garan
Ado ambo mah mandanga

Anak gaduh kamanakan Rajo
Dipaso kawin jo rang tuo
Anak gaduh pambayia utang
Rajo ko banyak mah barutang
Paja tu lari ka gunuang Tujuah
Malumpek ka dalam kawah gunuang
Iyo talago nan di ateh
Dek itu gunuang ko berang,"
"Tarimo suko kaba inyiak
Hambo taruihkan jalan ambo."

Nyo taruihkan mah jalannya
Tampak rang padusi satangah bayo
Manujuang sumpik barisi bareh
"Manolah Andeh rang di siko
Barek tampaknya baban Andeh
Handak ka mano Andeh garan
Mari kito samo bajalan
Kami tolong mambaok bareh Andeh."

"Usah ambo dikicuah pulo
Kok kalian maraso lapa
Cari bareh di rumah rumah
Ado sajo nyo tu beko
Di rumah ambo ado pulo
Bareh ko untuak anak ambo
Inyo balimo kasadonyo
Ado pulo cucu mah surang
Sajak kapatang makan bubua

Bapaknyo mati ulah gampo
Paja gadih mati karancakan
Inyo surang nan baulah
Baribu urang jadi bangkai
Baribu pulo nan sangsaro."

"Manolah Andeh rang di siko
Usah ragu padu kami ko
Kami bukan rang parampok
Indak pulo rang kalaparan
Iko pitih lai saketek
Ambiak pambali lado garam
Duduak Andeh sabanta di siko
Kami iko iyo nak batanyo
Andeh salahkan anak gadih
Baapo bunyi caritonyo garan."

"Anak gaduh rancak pamenan bujang
Bujang sapuluah anak rajo

Indak mancari ka nan lain
Inyo surang jadi rabuitan
Indak doh manyuruak-nyuruak
Di Ustano di balerong sari
Di tapian tampek mandi puti
Inyo disudahi baganti-ganti
Dek itu berang Gunuang Tujuah
Dihimpoknyo nagari Koto-Tujuah
Hanyuik sadonyo mah ka hilia
Anak mudo-mudo tu nan dahulu
Dimasuakkan ka lubang kawah

Tampak barasok dari jauah
Ado pulo urang mangecek
Bukan anak gadih mah nan salah
Tapi dukun nan batanuang palasu
Tantuangnya salalu indak bana
Tampak dek urang mah bangkainyo
Pisaunyo manikam dadonyo
Paruiknyo panuah dek limau
Baratuih limau kalua dari paruik buncik.”

”Alah mandapek carito ko
Dek awak iyo mudo pulo
Elok pandai manjago diri
Kok Andeh amuah dianta
Kami antakan baban Andeh
Mandeh lamah babannya barek.”

”Usah ambo dianta pulo
Lah tigo kali ambo kanai kicuah
Katonyo manolong hambo
Bareh pindah ka tangannya
Rang mudo kini jahek-jahek
Indak cukuik dapek pangaja
Indak nyo takuik kanai sumpah
Indak ganta nyo dikutuak.”

Tagalak sangaik Sutan nan mudo ko

Bajalan pulo inyo lai
Takuiknyo pai jauah-jauah
Kok kudonyo diambiak urang
Pai batanyo jo bakudo
Indak kan namuah urang mangecek
Sabab urang nan bakudo
Iyolah urang nan kuaso.

”Babaliak kito ka Palabihan
Barundiang ambo jo Ayah
Apo garan kan dipabuek
Mangecek jo urang-urang kampuang
Indak doh dapek kaba nan bana.”

Sampai inyo di Palabihan
Hari lah pagi pulo baliak
Indak bamalam nyo di jalan
Tapi lah talambek inyo barangkek
Dari nagari Lubuak Basuang
Indak doh malam nyo sampai
Agak takajuik mah si Lelo
Maliek kudo banyak di laman
Alun di baok mah ka kandang
Labiah takajuik inyo garan
Maliek kudo Mambang Langik
Kudo pambarian dari inyo
Inyo campakkan tali kudo
Bagageh inyo naiak rumah
Pintu indak mah ba palang
Sakali lumpek nyo lah tibo
Tapakiak urang malieknyo
Urang nan banyak sadang duduak
Si Kambang balari mangaja nyo;

Ditangkok di julangnyo tenggi-tenggi
Si Mambang lah tagak pulo
Bapaluakan urang ko garan
Ado mah pulo Datuak Manti Tuo
Sarato datuak Bandaharo

Dek gadang hati Majo Lelo
Nan baduo ko dipaluaknyo juo.

Duduak orang ko mah barapek
Manantik nasi tahidang
Baganti-ganti babarito
Ruponyo sadonyo baru tibo
Alun lai mambukak carito
Batangisan baru nan jaleh
Hati gadang ndak tabado
Aia mato mancucua ndak disangko.

Dimulai kato dek si Mambang
"Kami lai mah maliek
Nan kudian sakali turun gunuang
Iyolah Mamak Manti Tuo
Antah siapo mah kawannya
Kami baranang dari matohari hiduik
Kami lintasi talago tu
Manuju matohari mati, arah ka lauik
Indak doh ado nan basuo
Indak ado ula indak buayo
Nan jaleh ikan iyo banyak
Panuah sisiaknyo yo dek lumuik
Dek lah lamo umua nyo garan
Talago tu indak gadang bana
Ketek dari talago di bawah
Kok si Kambang ndak banyak barang
Dapek inyo baranang surang
Lakeh juo kami ka tapi
Aia indak dingin bana
Saroman panah ambo dapeki
Basamo-samo kawan ambo.
Aia iyo angek kuku
Mungkin dek gunuang kan malatuih
Mungkin juo dek hari paneh
Tabiang talago iyo randah

Di tapi sabalah ka lauik
Dek hari alun lai kalam
Tampak lauik barono kuniang
Indak kami payah bana
Mamanjek ka ateh tabiang
Anok-anok kami bajalan
Iyo ka tampek kudo ambo
Suaro urang nan sambilan
Tadanga jauah sayuik-sayuik
Kami tapaso iyo garan
Manuruni tabiang agak jauah
Takuik basuo jo urang ko
Kudo indak dapek dinaiki
Dek jalan alun lai data
Untuang bulan lai tarang
Kami maresek dalam rimbo
Lah latiah garan Kambang Aruih
Kami cari batang kayu gadang
Nan gadang pulo banianyo
Baganti kain nya garan
Iyo jo kain baju ambo.

Cuman saketek agak lungga
Kaki sarawa ambo guluang
Ambo suruahnyo lalok
Ambo hiduikkan malah unggung
Ambo iyo lah sadio jo api jo makanan
Hari kameih ambo barangkek
Patang Ahad ambo tibo sinan
Dari Batang Masang ambo babaliak
Iyo alah ambo ancang-ancang

Sajak barangkek dari Koto Tujuah
Ndak lain makasuk di hati
Salain dari kan samo mati
Tapi lai talinteh garan
Kok ula tu sadang lalok
Dek hari iyo mah siang
Mungkin kami dapek baranang.

Lah siang kironyo hari
Ambo lalok iyo sabanta
Si Kambang maangek katupek
Sarato lamang dalam buluah
Aia indak doh diabuuh
Diminum sajo aia talang
Alah tabik matohari
Lah sudah makan saketek surang
Kami turuni lereng gunuang
Manuju ka Batang Masang
Duo hari kami bajalan
Kadang-kadang iyo jo kudo

Takadang pulo jo kaki sajo
Kok iyo di tampek data
Malam kami bajalan juo
Kami sampai ka Batang Masang
Di sinan ado mah garan
Pondok urang manjua nasi
Dapek kami makan agak elok
Baka nan dibaok hampia habih
Nan tingga alah mah agak basi
Kami mudiakkan Batang Masang
Acok mah dapek iyo bakudo
Di sinan ado jalan satapak.

Duo hari sudah itu
Tibo kami di nagari Bonjo
Lah tanang raso paratian
Bamalam kami di sinan
Katiko kami kan barangkek
Nagari tu digoyang gampo
Takuik kami kan taruuh
Dek rimbo gadang nan kan ditampauah
Tujuan ka Palimbayan
Kato urang indak doh jauah bana
Bisuaknyo kami nak barangkek
Taraso pulo gampo lai
Gamponyo iyo labiah kareh

Dilarang urang kami barangkek
Rimbo labek bukik tenggi pulo
Kok payah kami bajalan

Baduo sajo mudo-mudo
Kami manumpang di rumah rang kampuang
Dek lapau nasi iyo rami
Takuik ado rang nan tahu
Bahaso kami iyo sapasang
Indak laki-laki kaduonyo
Abuak si Kambang nan panjang tu
Payah manyuruakkan dalan deta
Kami tantu diagiah urang
Iyo sabuah biliak sajo
Tagalak si Kambang maso itu
"Kok kakak nak marompak pantang
Indak ado urang nan kan manghukum."

"Kito sangsaro dek pakaro ko
Kito ditolong langik jo bumi
Mangapo kito babuek kini
Kanai kutuak malah kito."

"Kok kakak iyo mah amuah
Ambo babaliak ka Batang Masang
Mancuboi kakak Upiak cako."

"Kan apo ambo dicuboi
Batahun-tahun ambo manahan
Sapakan lai kito sampai
Iyodi nagari Palabihan
Di Palimbayan ndak dapek kawin
Ayah adiak indak di sinan
Kakak indak ado pulo
Niniak mamak ayah ambo surang
Indak buliah inyo mangawinkan."

"Indak ambo nak kawin sinan
Babaliak luko hati kakak

Iyo kakak Tuangku Dautak Tungga
Kito pai ka Palabihan
Kaok kito alah kawin isuak
Kito pai manjalang Mamak jo Amai.”

Kironyo datang gampo gadang
Dek itu kami lambek tibo
Lah sudah gampo gadang tu
Kami upah urang baduo
Nan amuah maanta kami
Iyo hingga Padang Panjang
Dari Padang Panjang ka mari
Ambo iyo alah tahu.”

Mancaliak si Sutan Majo Lelo
Iyo kapado Kambang Aruih.

”Dek Mak Datuak Manti datang
Iyo ambo baliak pakai baju padusi
Kini Mak Datuak bacarito malah
Tantang gampo di Koto Tujuah.”

”Gampo gadang datang siang hari
Balari ambo tigo baranak
Iyo jo kain di badan sajo
Manuju ka Ustano gadang
Tampak Tuangku Rajo lah di laman
Ambo guguah tabuah tando bahayo
Ambo ajak Tuangku lari

Baliau indak amuah garan
Andeh Suri pai ka pakan
Baduo jo si Reno Intan
Bujang Sambilan antah di mano
Lah duo hari indak tampak.

Ambo takana mimpi Upiak
Dek itu ambo ndak batahan

Ambo basalam jo Tuangku
Taruih lari ka Sungai Batang
Di sinan urang dahulu lari
Tampak jaleh dari jauah
Puncak gunuang alah rangkah
Talago di ateh alah mahilia
Tajun bak aia mancua
Ambo taruih ka rumah Andeh
Urangko manantik ambo
Nak lari indak ado laki-laki
Adiak di rumah bininyo
Ipa ambo pai ka Piaman
Ambo ambiak pakaian nan ado
Indak tantu siapo punyo
Ambo agiahkan ka bini ambo
Sarato anak ambo garan
Ambo cari sumpik bareh
Adiak ambo mambaok lado garan
Andeh mambaok ameh perak
Barankgek kami ka lubuak Basuang;

Lubuak Basuang lah kosong pulo
Kami masuak ka tangah Padang Laweh
Takuik pai ka tapi lauik
Kok datang beko banjia gadang

Padang tu iyo laweh bana
Tampeknyo katenggian pulo
Iyo mah Padang Pangimpauan
Banyak di sinan kabau jawi
Adiak ambo lai mambaok lapiak
Di lapiak ciek kami basamo
Nan ciek bajadikan dindiang
Untuanglah hari indak hujan
Barisuaknyo ambo baru dapek

Mancari Tuangku Rajo kito
Babaliak ambo ka Lubuak Basuang
Ambo cari ka Ustano Ketek

Tampek kadiaman adiak Rajo
Bini mudo dek Tuangku kito
Indak ado urang di sinan
Kosong bana rumah tu garan
Baitu juo mah Ustano
Ambo babaliak ka Padang cako
Banyak basuo urang awak
Indak ado mah nan tahu
Ambo basuo jo Datuak Bandaro ko
Baduo kami mancari garan
Basuo di rumah pondok ketek
Iyo alah di tapi rimbo bana
Liau dijago dek bininyo
Batigo sajo nyo di sinan
Iyo dubalang nan katigo
Baliau iyo sakik bana
Indak makan indak minum
Bukan ndak ado nan kandimakan
Baliau tu indak balasero lai.

Maliek kami liau manangih
Manangih taisak-isak
Indak ado keceknyo garan
Salain mamintak bana-bana
Mancari Tuanku Puti garan
Mintak basuo jo Tuanku
Iyo katonyo panghabisan
Sabalun ambo mati dangai
Ambo nak basuo jo Kasumbo Ampai.”

”Kami pai mah kiniko
Iyo ka nagari Palabihan
Indak kan payah mancarinyo
Tantu nyo diam di Ustano
Indak lamo kami garan
Barisuak kami babaliak.”

”Bakudo kami siang malam

Iko mah baru kami tibo
Apo pikiran Tuangku kini.”

Habih manangih nan mandanga
Talabiah Puti Kasumbo Ampai
”Barangkek juo kito ko kini
Kito turuik kakak ambo
Padiah hati ngilu jantuang
Mandanga nasibnyo tingga surang.”

Bakato kini Sutan Majo Lelo
”Usah Andeh pai kini
Baitu si Upiak Kambang Aruih
Manjadi baban rang padusi
Ambo jo Ayah nan kan pai
Sarato mamak baduo ko
Dapek kami mamacu kudo
Siang malam kami bajalan
Mamak Rajo kan kami baok
Bia mayiknyo mah nan tingga
Kok izin langik jo bumi
Barisuak kami lah babaliak.

Tantang Diak Sutan Mambang Langik
Japuik Mak Sutan ka Palimbayan
Japuik tabaoknyo handaknyo
Bia Amai jo Hindun Sari
Tingga di sinan nyo dahulu.”

Kato Sutan Majo Lelo ko
Iyo saparati biaso juo
Manjadi titah ka nan banyak
Indak surang mah nan manukeh
Alah sudah minum jo makan
Barangkek urang laki-laki.

Si Kambang duduak jo Ayah Tuonyo
Baru rang lain di Ustano tu
Dapek mangecek mah jo inyo.

Barisuak patang badirok sanjo
Datang rang banyak dari Lubuak Basuang
Tabaok Taungku Datuak Tumangguang
Sárato bininyo Puti Reno Bulan
Anaknyo indak surang juo
Manuruik carito nan bagalau
Alah mati ka anam balehnyo

Nan sambilan hanyuik dari lereng gunuang
Baputa-puta inyo di sinan
Saroman urang batuka aka
Ambun Pagi jo Reno Intan
Basamo Sutan Sari Alam
Mandeh Rubiah sato pulo
Indak amuah basamo Rajo
Manantik anaknyo nan Sambilan
Dek kudo habih dibaoknyo
Jo apo urangko kan barangkek
Mati sadonyo ditimpo Ustano
Anaknyo nan baranam lai
Nan di Bayua di Sungai Batang
Ka Koto Tujuah mancari ayahnyo
Dek tadanga Ayahnyo sakik
Mati pulo di baok aruih
Iyolah aruih aruih hangek
Ado dubalang nan maliek
Iyo nan tigo puti-puti
Indak dapek nyo ditolong.

Satibo Tuangku Rajo Tumangguang
Dalam palukan Kasumbo Ampai
Pangsan inyo iyo sabanta
Patamo dek latiah mah dijalan
Dikapik dek Sutan Majo Lelo
Iyo kudo dipacu kancang
Keduo dek hati iyo talantuang

Dalam risau basuko pulo
Datang si Kambang mambaok bubua

Mangecek inyo lamah lambuik
Usah dikanang Mak nan hilang
Mamak beko batambah sakik
Kami pulo kahilangan
Kakak jo Andeh lari tu garan
Dek mandanga mimpi ambo
Gunuang Tujuah iyo kan mutah
Ruponyo indak doh mutah sajo
Rangkah puncaknya katujuahnyo
Nan anam turun mah ka bawah
Nan ciek sabalah lawang
Lai mah tagak juo kini
Banyak urang datang maninjau
Dari puncak ko mah ka bawah.

Mamak indak buliah dibaok lari
Batangguang jawab ka nagari
Baitu Mamak Manti Tuo
Sarato Mamak Bandaro Sati
Kini ndak ado nan kan berang
Dek tabuah tando bahayo
Lai sahari manggaluguik
Tantu panabuah mati juo
Sanangkan hati Mamak kanduang
Usah nan mati diratoki
Iyo inyo mambayia utang
Sampai hari ko iyo mamak
Upiak lai gadih juo.”

Lah amuah Datuak Tumangguang makan
Disudukan bubua dek si Kambang
Alah gak tanang inyo garan
Barisuaknya datang Mambang Langik

Baduo sajo jo Ayahnyo
Maraok garan Sutan Panjang
Manangisi kakak kanduangnyo

"Ampun ambo Kakak Rajo
Ambo iyo agak berang
Dek kakak talampau lamah
Tahadok anak kito nan Sambilan
Baitu pulo kak Puti Ambun Pagi
Kakak biakan nyo babuek
Nan elok dek inyo sajo
Nan lain mano barani
Inyo ko iyo anak Rajo."
Indak manjawek itu garan
Iyolah Rajo Koto Tujuah
Inyo iyo tahu dilamahnyo
Dek itu anaknya basilanteh nangan.

Manyambah pulo Sutan Mambang
Ampun Buyuang Ayah Tuo
Ayah Tuo jadi landasan
Bak panggang diapik api bakuliliang
Buyuang indak berang bakeh ayah
Buyuang iyo ibo ka Ayah Tuo
Barek bana baban Ayah
Kini saba lah Ayah Sayang.

Nak lakeh Ayah iyo cegak
Buyuang manjokan jo si Kambang
Makan Ayah banyak-banyak
Tidua Ayah lamak-lamak.

Malam tu urang barundiang
Kan baralek iyo mangawinkan
Si Mambang Langik jo Kambang Aruih
Tuangku Datuak Gampo Bumi Tuo
Rajo nagari Palabihan
Minta janji 6 bulan lai
Dek inyo nak baralek gadang
Lah lamo indak baralek
Sajak adiak nyo Gampo Alam
Kawin jo Kasumbo Ampai
Ndak ado alek di Ustano.

Tagalak garan Sutan Majo Lelo
"Ampunlah ambo Ayah Tuo
Usah salambek itu bana
Ibo niyo di paja-paja
Lah'salamo iko nyo manahan
Beko inyo marompak pantang
Kutuak pulo nan kan tibo."

Bakato kini Tuangku Datuak Tumangguang
Usah balambek-lambek bana
Ambo indak kan lamo lai hiduik
Ambo ingin iyo garan
Maliek urang ko jadi anak daro
Iyo manjadi marapulai
Anam baleh urang anak ambo
Duo urang kamanakan garan
Duo pulo anak adiak ambo
Duo puluah kali patuik baralek
Kok ambo mati bak kini

Sabalun urang ko kawin
Indak ado ambo basuo
Jo alek sakali juo
Baralek sajo ketek-ketek
Koto mah baru kasusahan
Mangapo baralek gadang-gadang."

Bakato kini Majo Lelo
"Ambo mamintak bakeh Ayah
Usah bajanji anam bulan
Jangan pulo bagageh bana
Elok juo agak gadang
Maundang ka Bayua, Sungai Batang
Ka Tiku ka Lubuak Basuang
Ka Piaman Sungai Limau
Ka Lawang ka Palimbayan
Ka Secincin Lubuak Aluang
Dek saroman ambo katokan

Bamacam macam gunjiang urang
Tantang berangnya Gunuang Tujuah
Nak tampak dek urang garan
Si Kambang indak cacek celo
Dek inyo indak badoso.

Baundua angsujo rundiangan
Kasudahannya putuih itu garan
Iyo tigo bulan lai
Salamo tigo bulan tu
Sutan Majo Lelo jo si Mambang
Badagang ketek inyo garan
Indak doh mancari pitih untuak alek
Tapi mancari pangalaman
Jo apo urang ko hiduik nantik
Sasudah inyo barumah tanggo
Sabagai pulo itu garan
Usah si Mambang Langik garan
Basuo jo Kambang tiok hari
Bia inyo indak di Ustano
Makan minumnyo iyo di sinan.

Sasudah habih rundiangan
Bakato Sutan Rumah Panjang
"Si Kambang alah mah jaleh
Apo nan kan dinantikannya
Tapi baapo Hindun Sari
Sampai pabilo nyo manantik."

Tagalak pulo Sutan Majo Lelo

"Usah kini itu dipikiakan
Sudah kito baralek nantik
Kito barundiang pulo baliak
Di mano kito kan baralek
Siapo kan mamparalekkan
Nan baralek bukan ambo

Tapi iyo pihak si Hindun Sari
Baitu adaik nagari kito.

Bakato pulo Sutan Rumah Panjang
"Tuangku Datuak nan Tungga
Ado mah manyabuik kan dek sari
Inyo amuah mah baralek
Mamparalekkan si Lelo jo si Hindun."

Batambah kareh galak Sutan Lelo
"Baso basi itu mamak
Palamak-lamakkan kecek
Inyo urang nan marugi
Pitihnyo banyak kalua
Si Kambang indak dapek dek nyo
Inyo kan barugi pulo
Barapo kan ketek alek kawin
Alun kan buliah dimintakkan
Dek mamak indak bapitih
Ambo iyo indak pulo
Kok sakada manumpang sajo
Alun baapo itu mamak
Dalam kamiskinan macam iko
Iyo bangsaik takarak aleh
Indak amuah ambo garan
Maadoki alek pulo
Nantik satahun duo lai
Kok lah bapitih ambo garan
Baru itu kito pikiahan
Si Hindun iyo ketek baru
Ambo bajanji bakeh basamo
Indak mancaliak ka nan lain.

Tigo hari sasudah itu
Urang alun ka mano-mano
Datuak Manti Tuo jo Bandaro
Alun lai pulang ka Lubuak Basuang
Katiko hari badaruik sanjo
Matohari sadang rambang kuniang

Dipangia Tuangku Datuak Tumangguang
Urang mandakek bakeh inyo
Dadonyo tampaknyo sasak.

Balari urang sa Ustano
Si Kambang langsuang mamaluaknyo
Si Mambang di tangan kanan
Si Majo Lelo di tangan kida
Sutan Panjang jo Kasumbo Ampai di kakinyo
Nan lain agak tajauah.

Lah hadia urang kasadonyo
Mangecek kini lambek-lambek
Iyo Tuangku Rajo Koto Tujuah
Mano kalian kasadonyo
Dangkan bana elok-elok
Babaliak kalian ka Koto Tujuah
Usah iyo maninjau sajo
Tapi mambuek nagari baru
Si Sutan Panjang jadi rajonyo
Si Majo Lelo jadi Tungkeknyo
Si Kambang Aruih jadi Putinyo
Sagalo tanah nan tatimbun
Taruko niniak moyang kito

Kalian nan punyo kini
Bagikan ka rajaik nan lamo
Sabanyak patuik uuntuak parumahan
Sarato sawah jo ladang
Agiahkan kaurang baru
Iyo sapaduo dari itu
Usah dipiliah urang datang
Nan amuah jadi rayaik
Bia tengkak bia buto
Nan paralu iyo urang elojk
Usah parampok jo panyamun
Iyo dipiliah pulo isuak
Tagakkhan duo Ustano
Ustano gadang uuntuak Rajo
Baduo jo Puti manantunyo

Ustano ketek untoak Tungkek
Báduo jo Andeh jo Ayahnyo
Tagakkan pulo rumah gadang
Iyo untoak Mandeh Rubiah
Urangnyo iyo padusi ambo
Si Upiak Puti Reno Bulan
Lah sudah Ustano nan tigo ko
Dirikan pulo untoak Manti Tuo
Sarato Datuak Bandaharo
Kok itu alah sudah isuak
Baru dikana yo nan lain
Iyo balerong jo rangkiang

Sabalun itu sudah dangai
Tasaroh pada kalian
Di mano kalian kan tingga
Kato habih angoknyo hilang
Tapakiak si Kambang Aruih
Tatangih urang kasadonyo.

T a m a t.



Pekanbaru, 1 Desember 1985.

(S E L A S I H).

MALATUIHNYO GUNUANG TUJUAH

Perpustakaan
Jenderal Keb

899.224
SEL
m



BALAI PUSTAKA — JAKARTA